

MEGHALAYA

ADOKO DONGGIPA GARO HILLS-NI A'CHIKRANG

G. A. MARAK, EX-M.L.A.



Acc. No. 3717/1

Class No. _____ Book No. _____

Author Mazab G.H.

Title Meghalaya

**DISTRICT LIBRARY
WEST KHASI HILL DISTRICT
NONGSTOIN (MEGHALAYA)**

Accession No. 3717/1

1. Books should be returned on or before the date last stamped on date due slip.
2. Books may be renewed on request at the discretion of the Librarian.
3. Dog-eared the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence. Unless a borrower points out the injury at the time of borrowing the book, he shall be required to replace the book or pay its price.*

Help to keep the book fresh and clean

MEGHALAYA

A'DOKO DONGGIPA GARO HILLS-NI
A'CHIKRANG

G.A. MARAK, EX-M.L.A.



CAPT. WILLIAMSON A. SANGMA

THE FOUNDING FATHER OF MEGHALAYA STATE
(MEGHALAYA STATEKO RA'BADILGIPA PADOT)

"Gisik a'ning bitgipa,
Katta chimik na'gipa,
Sengna mitchi mitchio,
Duramani patalo,
Simsang do'mesal gita,
Gisikgipa dong'esa,
A'chik A'song jasengjok,
Sangma nangko ba'esa."

*Diviri t' L'w
Wes. East Hills D. M.
Nongstoin*

Published by : G. A. Marak
Tura

Copy Rights Reserved

*District Library
West Khasi District
Nongstia*

Printed at :
Eeu Dee Printers,
Tura- 794001
West Garo Hills, Meghalaya.

(i)
AGANSOANI

1934 bilsio London songjinmao International Congress of Anthropological aro Ethnological Science students-rang tom'e dal'a melaaniko dakaha. Ua tomanio chanchiani "Know thyself" chongmotan na'a antangko uibo ingipa japang kattako ra'e gisik a'ning bite chanchianiko dakaha. Ia senggipa matgipa kotokan New Delhi-oba 1978 bilsio apsan japang kattako ra'e tom'aniko dakaha. A'gilsak gimikni delegaterang sak 3500 sokchimongaha. Delhi-o chanchianio mongsongbate Indiani Tribal manderangni gimin chanchibataha. Indiao Tribal jatni mamalrang 200-na baten dongachim aro uamang ku'sikming 150 dingtang dingtang kusikrangko aganachim. Ia tom'ani a'gilsakni ongbachenganiko sandie sakki on'na mangiparang (palacontologists) aro janggi gnanggipa mamaloni mande ong'bachenga ine sakki ongiparangba (Evolutionary biologist) tom'ao donge namen chanchigrikbeaha. Uamang Charles Darwin Evolution Theory-ko compare and contrast-dingtanggrikaniko uina japang jadil, anchi minsuko nisusaha. Maina Charles Darwin evolution theory gitade mandea chengode ki'me donggijagipa dalgipa makkre-oni (Orang-Outang) ong'baachim ine namen bilake sakkiko on'achim.

Mitam A'chikrangni gimin kitap segiparang A'chikrangko dalgipa makkre-rangna gadangsa batkalessan mesokaiaha. Miksongani na'a an'tangko uichengna nanga, badia songoni, mai jat aro mai kusikko agana, uan bebe chongmot ong'a. Ia pilakko mangope "MEGHALAYA A'DOK-O DONGGIPA GARO HILLS-NI A'CHIKRANG " ine kitapko bimung donaha, aro kitapko anga amani kusikchi seaha. Maina banga skia mangipa A'chik-rang aro gipin jatrangba A'chikrangni gimin English kusikchisa seani gimin aro hajalni hajal A'chikrang English-ko poraina mankugijagiparang dongengkuani gimin, jattang Amani kusikchi sena sikbeaha. A'chik a'song ong'na skang nangni ambi atchu badia a'songo dongachim aro mai kusikko aganachim, uarangko uina joton ka'e sandichina angni seani miksonga ong'a.

Dao dongenggipa A'chik a'song jekon British-ni sason ka'mitingo Garo Hills ine bimung mingahachim unon A'chikrang chengonin dongchenggiparang ong'a ine na'aba bebe ra'ama ? (autochonus)

Beben, sako bilenggipa do'drangna ia a'gilsakni geographical boundary-sima ari dongja. Jechi sika uarang darangoba hukum bi'na nanggijan bilange dongena manaia. uagita chengode mandenaba rakgipa champingani dongjachim ine Itihaas anchingna sakkiko on'a. Jekai Israel manderang

(ii)

Egypt A'songoni bilsu 430 dongani jamano Canaan A'songchina reongkatangaha ine Reo. Odhai 12:40-ni gita uina man'a. Ritcha bilsirangna skang Africani Negrorang America-chi nokkol etna rimanganiko man'e jelbra jelsuaha gita. Daosa America-ni manderang "Africans to Africa" ine agampilengaha.

Ua gita A'chikrangko Tibet apil jangsaoni brangrorobae dao dongenggipa A'chik A'song, jekon Garo hills minga unona sokbaaha ine, banga kitap segiparangni seanina anga aiao inmanja. Jeba ongbo anga antangko uina nanga aro kusiktangko gamchatnikna nanga. Jekai poedo segipa saksa A'chik me'apa indake seaha" Pangnaba chamgya A'king gore, Aganja gipin kutangna agre" - Surendro Sintang Marak. ua kutangni gamchataniko raken sakkiko on'e donangaha. A'chikrangko M.A. degree-ko pass ka'chenggipa Prof. H.W.Momin indake seaha," Sako bile mikoenga rokomanti do'orang, Knatonikbata ina antangtangni ku'rang". Do'drangmangba mikoronga sulni kurangna agre gipin do'oni kurang ba sulchi mikojachim ine uni miksongani ong'a. Indiani Salgro Salaram A'kitiko donggipa A'brini A'dokrangoni "MEGHALAYA A'SONG" atchiaha. 1972 bilsini January 20-gipa walni waljatchio (12 O'clock midnight) million-ni milliion Indiani manderangni sari gri tusiengmitingo "Meghalaya" atchiaha, indake manderangna gital janggi tangani sal nabaaha.

"We want Hills State, No Hills State, No rest". Chingna A'brini Sorkariko nanga, manjaskal dontongjawa ine chrik abokanirangko gamchakgipa 'Rongkuchak' (Echo) dongjaha. January jao Shillongo namen sinbeoba, hajalni hajal manderang sorokjoljol reinmae kasrok kasrok cheani gitrangko ring'e dalbea Isolni patianiko unwalo gisik ra'aha.

1972-ni January 20-ni walni 11:50 P.M. bajio, Autonomous Meghalaya State-ni Chief Minister, Capt. Williamson A. Sangma resigned ka'aha. Indiba minute 10-ni jamano, 1972, January 20-ni waljatchio "Full Pledged" State-ko Meghalaya manahani gimin Capt. W.A. Sangma, Meghalaya Full Pledged State-ni Chief Minister ong'taina gita, uni seoke donsoimin, uni minster-rang baksa His Excellency, the Governor of Meghalaya, Shri B.K. Nehru-chi Meghalaya-ko sason ka'na dongimin niam gita kumikchetaniko daktaiaha.

Minister-rang,

1. **Captain Williamson A. Sangma, Chief Minister.**
2. **Shri B.B. Lyngdoh, Cabinet Minister.**
3. **Shri Nichols-Roy, S.D.D. Cabinet Minister,**

(iii)

4. Shri Edwinson Bareh, Cabinet Minister.
5. Shri Sandford K. Marak, Cabinet Minister.
6. Shri Darwin Diengdoh Pugh, Minister of State,
7. Shri Grohonsing A. Marak, Minister of State.

Uni bak jaman tapan Governor-ni atilao bilisi 18-na Hill State-ko manna ukelaniko gisik ra'na gita salgichi gaman/ kaman pong 18 goaha.

Ua somoio kusi ong'an rengsiko anchingni jongada noabirang, jemangan Assam-ni Goalpara aro Kamrup district-rango donggipa A'chikrang manpajaha. Barlin Great Wall-ko salsao goaha gita ia mandeni daggipa geographical ari-simako salsao anchingna ogen.

Ia kitapko anga bak 5 dake toktok sualaha.

- Bak-1, British Garo Hills-ko maikai chapataha.
- Bak - 2, British-ni somoio Assam Government-ni sason mongsongbate Garo Hills-ni gimin.
- Bak - 3, India jakgitelko manmano Assam-ko sason ka'anio A'chikrang maidaggipa sasonni bilrangko Meghalaya atchina skang manaha.
- Bak-4, Maikai Meghalaya State-ko manaha.
- Bak - 5, Garo Hills District Council aro uni sason-ni gimin aditako mesokaha.

Capt. W.A. Sangma-ni ka'donge aro niksamsoe re'dilanichisa Garo, Khasi aro Jaintiana dingtang State Meghalaya-ko man'aha. Anga uko Gisik ra'na gitasa ia chongipa kitap-ko A'chikkuchi seaha. Uni gimin uni jagamgipa bimangko kitapni a'bachengao donaha. Poraigiparangko molmola maina gualanirang dongnaba donga, uarangko angna uiatpilode anga mitelbegen. Chai ku'dimna gitik, tom'e minokna gitik daggipa ku'mitimchi sena sikoba, gisik a'ning bitjae kuwakhmachisa seaha. katta Doro ringgipani ring gita, "Kore bima redingko mala, Asillikma a'ningko bita" ineba anga rasong chajane. Angni Salgro-Salaramni A'chikku, Late Rangam G. Momin aro late Dingmin Nengminza-ni Dictionary-oniko jakalaha. Ia kitap-ko poraigipa sakantikon mitelbegen.

Dated Tura
July 7, 2001

G. A. Marak, Ex. M.L.A.

KITAP-KO SEGIPANI GIMIN

Ia ' Meghalaya A'dok-o donggipa Garo Hills-ni A'chikrang ingipa kitap-ko segipa Shri Grohonsing A. Marak ong'a. ua 1925 bilsini August jani 31 tariko Goalpara District-ni Budalong minggipa chongipa songo atchiaha. Uni pagipa-ko Namjang N. Areng aro Magipako Sare A. Marak mingachim. Songtang Lower Primary School-ko matchote 1940bilsio Nishangram Govt. Aided M.E. School-o poraie, 1945 bilsio matchotaha. Ua Goalpara P.R. Govt. High School-o 1945-1948 bilsiona poraie matchotaha. Ua Theological Trainingko, Cherrapunjee Welsh Mission Theological College-o adita bilsina poraiaha, indiba chusokgipa onгна manjaha.

Ua 1951 bilsio Miss Billancy Khongwir-ko bia ka'aha. Uamangna depante sakdokko Isol patiaha. ua bilsio 5-na Kristian Evangelist-ni kamkoba ka'aha. Ua 1959 bilsioni 1963 bilsiona Bajengdoba Govt. M.E School-o teacher-ni kamkoba ka'aha. Ua school-ko wate Hills State Movement-o jak onpaaha. Indake Garo Hills District Council-ni Election-o APHLC ticket-o chakate M.D.C. ongaha.

1967 bilsio Assam Legislative Assembly-na APHLC ticket-ko ra'e chakate Assam Legislative Assembly-ni MLA-ba ong'aha. 1970-1971 bilsiona Autonomous Legislative Assembly, Meghalaya-ni M.L.A. ong'e, Deputy Speaker songako manaha. Ua 1972 bilsio skanggipa Meghalaya Full Pledged State-ni skanggipa General Election ong'o chakate M.L.A. onghtaie, Minister-ba ongaha. Ua 1972-1983 bilsiona Miinister ongmitingo South East Asiani dambonga a'songrangko wenroroe niaha. jekae, Singapore, Thailand, South Korea, Hongkong aro Japan. Una agreba Bangladesh-ni capital Dacca songjinmao New Year-ni salko Capt. W.A. Sangma, Chief Minister baksa manina cholko man'na baksa Sheikh Mijibur Rehman-ni jikgipa Begum Rehman-koba grongna cholko manaha. Ua adita kitaprangko A'chik Kusik-chi aro English-chi seaha. ua 'Meghalaya State-ko Maikai Manaha' ingipa kitap-ko king 2000 (hajal gni) chapa ka'e uko Pa Purno A. Sangma, Formal Speaker of Lok Sabha-ni jakchi released 1995 bilsio ka'aha. Aroba Meghalaya Past and Present-English version aroba Garo Hills and her people-iarangko chapa kana chol grie dongenga. Ua daoba maiba maiba kitaprangko sekuenga. Uni bilsio dao 76 ong'aha.

A'SONGTANGKO DEMITELANI GIT

Pilak a'gilsakni a'songrangan a'songtangko demitelani gitrang donga. A'songtangni ongtelaigipa biaprangko mitelani, do'drangni mikoanirangko knatime mandeni ka'tongo ka'srokani, nitogipa a'bri chiringrangko nike nie ku'si ong'ani, ia pilak gunrangko mandeni ku'rangchi paraka. Su'ugipa kattarang aro knatogipa sulrang ongiaoba nangni ka'tong gisik gimikchi chanchiate aro nangni sserangko tiltile ringbo ku'rang sale.

Mitela.

"A'SONG MEGHALAYA"

Key D

/s_f/d/- .d:m 'nɔ. ɪ:d /-

A'song Meghala... ya.

/m .f/ s :-s /m :r/m :-

A'brirangni naan Rani;

/m .r/d :- r /d :l/s_f:- , l_f/d :-

Nito..ata na'a an'tangko;

/d :m /- , d:r /-. r/ d :-

Gan'e aram..rangko

2. A'song Meghalaya,
Garó Khasi-Jaintia;
Ganata an'tang demechikko,
Jain Sem... Dakmandako.
3. Chiring dare rong'grim;
Ronamo ka'sinjrim jrim,
Knatoriri do'matni ku'rang, Ka'srokata u'rang.
4. Na'an nitobata,
Darang a'songna bata,
Salgin mikkarangba wabata;
Nang'nan ka'sabata.

- G. A. Marak

JA'PANG KATTARANG

TABLE OF CONTENTS

1.	1-GIPA JA'PANG KATTA Chengo A'chik Matgrikrang. - - - -	JAK 1-3
2.	2-GIPA JA'PANG KATTA Zamindar-rang sawa aro uamangni bil - - -	4-5
3.	3-GIPA JA'PANG KATTA British aro A'chikrangni gispeo nangrimgrikani. -	5-7
4.	4-GIPA KATTA JA'PANG British sorkarini Dakgipa Niamrang - - -	8 - 10
5.	5-GIPA JA'PANG KATTA Chengo songadamni Melaa - - - -	10 - 14
6.	6-GIPA JA'PANG KATTA Chengo A'chikrangni Sason Ka'ani - - -	14-17
	7-GIPA JA'PANG KATTA	
7.	A'chikrangni gisepo Assam Legislative Council-o Member ong'chenggipa - - - - -	18-19
8.	8-GIPA JA'PANG KATTA Garo National Conference aro Gopinath Bordoloi SUB-COMMITTEE - - - - -	20-28
9.	9-GIPA JA'PANG KATTA Jakgitel Indiani skanggipa General Election 1952 bilsio ong'aha - - - - -	28-33
10.	10-GIPA JA'PANG KATTA Garo Hills Autonomous district Council 1952 Bilsio Atchiaha - - - - -	33-41
11.	11-GIPA JA'PANG KATTA Meghalaya State-ko maikai Man'aha ?- - -	42-46
12.	12-GIPA JA'PANG KATTA Assam-o Sorkario Dakani - - - -	46-48
13.	13-GIPA JA'PANG KATTA All Party Hill Leaders' Conference Haflong songjinmaso Tom'ani 1960 bilsio - -	48-67
14.	14-GIPA JA'PANG KATTA 1970 bilsio Meghalaya Autonomous State-ni Election - - - - - -	67-69

15.	15-GIPA JA'PANG KATTA			
	Meghalaya Chugimik State Ong'aha, 1972	-	-	69-73
16.	16-GIPA JA'PANG KATTA			
	Garo Hills-ko Nigope Riming Rimang Nikatani	-	-	73-76
17.	17-GIPA JA'PANG KATTA			
	Meghalaya State-ko Man'mano	-	-	76-91

1 - GIPA JA'PANG KATTA

CHENGO A'CHIK MATGRIKRANG

JAKGITELGIPA A'CHIK A'SONG GARO HILLS-KO BRITISH-NA CHAPATANI A'BACHENGA.

Ritcha bilsirang reangaha, chengo Mogul rajarang 1765 bilsio British baksa mingsa kumonggrikaniko dake uni songnokko British-na pakwatanio, East India Company Goalpara-ni a'song gimikko ra'ani baktapan, A'chikrang British baksa agangrikna cholko manaha.

Mogulrangni sason kamitingo, Choudhury Zamindarang Goalparao uamangni a'songko chelchake rakkina manna gita Mogul rajaoniko nokgipa ong'ani bilko segrike ra'aha. Ia Choudhury Zamindarang sima aro jolo cha'gipa antirangona re'bagipa A'chik manderangoniko bangbea kajinarangko skatang ra'rongachim. Iani aselan uamangni gispeo kajija golmalrang ong'kataha. Uamangni indake bobil dakgrikanirang ong'katahaon, British aro A'chikrangni gisepoba meligrikgijani abachengaha.

Indake A'chikrang pilni pil rori-rangko song-gaaha aro mala malrangko jekon man'a ra'seke ra'aha. Changsao uamangni indake song-gaano A'chikrang Bijni Raja baksa bilongen dakgrikani ongnasiahachim. Indiba maibakai somoi gita Jogikopao donggipa British-ni sipairang champenganiko dakna manaha. A'chikrang a'kaweo chagipa antirangona uamangni bilsio game man'a kilteng, laha indakgipa bosturangko antiona palna ra'bagija dakanichi uamangko a'jak soksikkaaha. Unomitingo uamangni songgabat nokabataniko 1775, oni 1805 bilsiona songgabat nokabataniko dontongjaha. Bilsio 1807 intalan A'chikrang Goalpara District-ni bang'a songrangoniko ra'seke ra'rongaha. Ia golmal gondokol ong'engani a'selrangko sandie nichina gita British Government ge'sa Commission-ko don'aha. "Sima arijolo chagipa antirango A'chikrangoniko kajina ra'aniko gimaatna nanga" ine Commission report-ko on'aha. Indiba Choudhury Zamindar-rang ua report-ko jegalaha. Mongsongbate Kharaibari-ni raja 1815 bilsiona king king iako warachakaha. Indakmitingo A'chikrang bilongbate kamko ka'aha. Uamang dakgrikanio ama mangipa rorirangko skorangko rasote robol kalsusaanio chee mangipa cup-rangko gita rengsi sike ra'bae uamangni nokmikkaango sitee dontekachim. 1815 bilsio British sorkari Rangpur District-ni Joint Magistrate Thomas Sesson Governmentna indake uatate je, "Dintang ua A'dok jolko sason ka'na gita saka Commission-ko

donna nanggen". Ia kupatianio pangchake kamko ka'na gita, British Government David Scott-ko Special Commissioner dake kamo donataha. David Scott jean Cooch Behar-ni Commissioner ong'achim Goalparaona re'bae ongenggipa obostarangko sandiaha. Uni sandiani report-o indake janapaha" iani a'selde Choudhury Zamindar-rangan dosio gaaka, maina uamang A'chikrangko pilak kamrangan sinjetaniko dakachim. Uni gimin Garo Hills-ko bakbakan British Government baksa chapatna nanga", ine report-ko on'aha. 1822 bilsio British Government Rongpur District-oniko Goalpara, Dhubri, aro Kharaibari-ko mangope gesa district-ko bikotaha. David Scott-ko ia gital district-o Civil Commissioner dake donatahachim. Una Governor-General-in-Council chugimik bilko A'chik Nokmarang baksa aro gipin dilgiparang baksa jekoba tom'tom grikaniko dakna pakwataha. A'chikrang sko sotarangko galgen aro British-na bamgen ong'ode ia gital niamara A'chikrangko chelchakani onngen ine ua parakaha. British-ni chelchakaniosan ong'aigija A'kaweo donggipa A'chikrangna anti a'kang chana indin kajina onna nanggija mangan ine ua agandapaha. Indioba Garo Hills-ni diltuao donggipa A'chikrangde kajina onna nanggen ine ua don'aha aro kajinako on'esa rerura dorurana mangan ine ua niamko dakaha.

A'chik A'songko sason ka'ani bidingo niam gital tarisogiminko David Scott ra'baaha. Ua a'songo gimikko bakgni dake sualaha, chongmotan Zamindari Mahal uan a'brini japa jolo donggipa manderang, iamangde kajina on'na nanggiparang, aro Nazarana Mahal uan a'bri a'kimbri burung diltuao donggiparangde British-ni sasonni ningo onkujachim, uamang jakgitelgipa a'song ongengpitichim.

David Scott Garo Hills gimikko dokkol mantokaha ine agangenoba Garo Hills-ni jatchi jolni A'chikrangde jakgitelgipa manderang onguengachim. Indakesa British Sorkari Khasi Hills-ko gita Garo Hills-koba tongtang tongtang dake sason ka'aniko ra'gataha. David Scott ia kamrangko banggija bilsirangni gisepon chusokataha.

Simsanggiri-ni Salaramchipak sak 100 ba 200 Nokmarang baksa David Scott songgigrikaniko dake chusokatna man'aha. Indiba aiao inmangipa A'chikrangni dakbewal mingsa dongkuengachim, uan Nokma siode unbaksa so'chapna gita rorirangni sko-ko nangachim, unbaksana A'kawechi ong'onange rorirangni skorangko sot'anide dongkuengachim.

Burma-o dakgrikmitingo Governor-General, David Scott-ko North Eastern Frontier-ko sason ka'china gita 1823 bilsini November jao don'ataha. Uni aganani giminsa Garo Hills-ko manchapgipa Goalpara

Disitrit-co Assam baksa 1826 bilsio chapataha.

Antangtango British-ni ningo ong'manaha iné rangsanan A'chikrang uiaha. Unon adita bobil dake chakatanirang ongkataiaha. A'chikrangni bilonggipa kachichaniara uamangni raja Sherpur-ni kosako ong'bataha. Ia kajiao British dolgninan dakchakaniko onjaha. Indiba Government mingsako dakaha, maina sima ari jolo A'chikrangko anti cha'na onjaha. Maina uko dakjagenode A'chikrang anti chajoljolba songrangchi napake raseke ra'barongachim. Indiba danang David Scott 1831 bilsio siaha.

Uni jamano, uni jachong dongrikgipa T.C. Robertson ua ia niamko ragataha. Ua dakgrikgipa sipairangko Damra gita Cheranona watataha, unon British sipairang baksa A'chikrang bobil dingrakgiparang bilongen dakgrikaha. A'chikrangko am'aha aro Nokmarangko bamdraataha aro melidraataha. A'chik a'song gimiko iako jangate gipataha aro unjaman tapan A'chikrangoniko kajinarangkoba ra'aha. Gisik ra'na krara maina Kisogirini Nokma jean British Sorkarina bamachim uko sootaha.

Gnigipa dakgrikaniko Capt. Reynold dilaha. Uko A'chikrang warachake dakgrikanio amako man'aha. Indake banga A'chikrangni nokrangko so'aha. Da'oba A'chikrang banga Rori-rangni nokrangko chagrope so'skaaha. Uni gimin British mingsa budhiko dakskaaha. Antiona mamung bosturangko palna on'gija dakgipa bosturanga merong, nakam, kari aro bara kancha indakgipa nangchongmotgiparangko on'jaha. Indioba a'brio donggipa A'chikrangde jajrengjaha, maina uamangde ta'ma ta'du, bolbite wabite indakgiparangko cha'e janggi tangna man'achim. Indiba British-ni ningo donggipa A'chikrangsa dukko manbataha.

Indake ong'engmitingo Shusong-Durgapur-ni raja banga a'brini songrangoniko kajinako ra'na a'bachengtaiaha, indiba British Sorkari bakbakan indakani a'sel dakgrikaniko bamatna manpilaha. Indakesa 1866 bilsio-ni July jao Lieutenant W.C. Williamson-ko Deputy Commissioner dake Garo Hills-ona watataha. Uasa Garo Hills-ko name sason ka'na gita TURA-o skotong songjinmako dakaha. Indake bonkamao A'chikrangni bobil dake chaktaniko 1879 bilsio bamatsrangna man'aha.

2 - GIPA JA' PANG KATTA

ZAMINDAR-RANG SAWA ARO UAMANGNI BIL

Bang'a a'a chini nokgipa ongkipakon Zamindar minga. Anga ia kitapko segipa antangan Zamindar-ni ningo donge dalbagipa ong'ani gimin aditako talatgen. Angni atchiram song Budalong, Assam-ni Goalpara district-ni Bijni Zamindar-ni ningo dongachim. Ua Bijni Zamindar-ni ningo donggipa manderang, uko Bijni raja inesa mingachim. Ua rajani man'e cha'ana manderang aiao inmanpilachim. Uo daldalgipa nokrang dongachim, Ua Bijni Zamindar-ni ningo donggipa manderang, uko Bijni raja inesa mingachim. Ua rajani man'e cha'ana manderang aiao inmanpilachim. Uo daldalgipa nokrang dongachim, rajani dalgipa nokrango kam ka'gipa officer-rang bangachim. Uo mongmarangba bangachim, maina ua baditaba ritcha kilometre apalgipa a'arang chirangni nokgipa ong'achim. Bijni Zamindar chengo British-ni sason ka'na skang Mogul rajarangoniko a'arango manrikahachim ina. British sason ba dokkol Assam-ko man'ahaon, ia Bijni Zamindar bangbea tangkarangko on'e, hajalni hajal gamchatgipa bolrangko jekai, bolsal, segun, titachapa, gambare indakgiparangko bilsiprako tender-ko okam'e, dakgie bol badinggipa mahajonrangna palachim. Anga antangba Bijni rajani bolrangko mahajon-na solpae denpae High School-o poraimitingo adita tangkarangko manpagipa ongachim. Ia Zamindar antangni a'kingo badita a'a game cha'anirang dongachim uarangni kajinarangko bilsio lakni lak manachim. Aro unbaksa badita ritcha hajal antirang donga uarangkoba bilsio dao dakronga gita Public-Auction-ko dake bangbea tangkarangko man'achim. A'songo donggipa pilakan nokni kajina ba House-Tax-ko bilsio onna nangachim. Saoba apal jomini, nokni ba anti a'kangni pilak kajinarangko bilsio onjaode, nokni mala malrangko jekai matchu mate, atte gitichi indakgiparangko korok nilam ka'achim. Bol wa'arango nirok sandigipa Forester, Chaprasi aro Ranger-rangba dongachim. Aroba a'a chini kajinarangko sandina gita gadang gadang Revenue Officer-rangba dongachim. Zamindar-rang Police aro Sipairangko rakkina uamangna bilko British sorkari uamangni nokgipa ongan segrikanion dongjachim. ia Zamindar-rang a'songni manderangni silroto namrorognini giminde ontimintiba simsak nirokani dongjachim. Ia Zamindar-rang poraigiparangna school-rangko kulija, sorok rama jalang-rangko dakja aro san'a banani hospitalrangkoba dakjachim.

Garó Hills-ni Mouza 6, 7, aro 8 ia Mouza-rang Lakhipur aro Kharaibari Zamindar-rangni ong'achim aro uarangko jamano Garó Hills

Autonomous District Council breskaaha. Zamindar-rangni nokgipa ong'ani gitan Garo Hills Disitric Councilba a'a, chi, bol wa'arangni aro a'ni chini nokgipa ongskaaha. Aroba anti a'kang, wari chibolrangniba nokgipa ong'aha.

Indiba India jensalo 1951 bilsio SOVEREIGN DEMOCRATIC REPUBLIC A'SONG ong'ahaon Zamindari rajarangko gimaataha.

3 - GIPA JA' PANG KATTA BRITISH ARO A'CHIKRANGNI GISEPO NANGRIMGRIKANI

Indiani Salaram jolo donggipa manderangni gisepo A'chikrangko skanggipa sasonni bidingo dingtanganiko man'chengaha. 1824 bilsio, David Scott Assam-ni skanggipa Commissioner, Nokmarangni A'king Gore manrikrikbaaniko dakan baksa bichal ba sason kaani bidingo dintang nambate dakaha. Ua Laskar-rangna bangbata bilrangko on'dapaha. British Sorkari namgipa dakbagimin niamrangko uan baibai ra'chakaha, David Scott ia ku'rachakani niamrangko Laskar-rang baksa ka'mao mesokgimin gita segrik jotgrike ra'aha.

1. Anga, kamao mesokgipa Mouza-ni Laskar kamna donatako man'e British Sorkarini ningo kamko ka'gen ine kusitangan be'en gisik ansenge kurachaka. Aro Mouza-ni kajina Rs. ko kamao mesokgipa tangka gita on'gen.

2. Anga Mouza-ni ningo game chagipa manderangni tik ka'gimin gita kajinako gilgen aro ua tangkarangko ra'ani rositko see on'gen; aroba ua tangkarangko Suddar Station ba Surkura Karini Kachario dakil ka'gen. Rosit gri anga tangkako on'java. Angni Elekaona sorkarini Officer re'baode anga una je kamko nanga dakchakgen aro gegipin Elekachi re'on angni Elekako badie redilatgen. jensalo manderang a'sel gri ong'e dengrik su'grikani ong'on anga uarangko Police Thana-ona ba Adalot-ona ra'anggen.

3. Chinga A'chikrang manderangko so'otrongachim aro uamangni skorangko chingni nokrangko ka'dingbee donachim. Anga da'al intal indakgipa kamrangko dakjawaha aro angni Elekani ningo donggipa manderangkoba dakna on'jawaha. Aro saoba skang gitan mande so'otode uko rim'e Deputy Commisioner-ona ra'bangen.

4. Gipin A'dokni saoba dosi gnanggipa mande kat'e jokbae angni Elekao dongeode uko rim'e bichalna Adalot-ona ra'bagen. Aro anga bilsiantian kajinako gile Deputy Commissioner-na tangkako dakil ka'gen. Anga tangkako gileba uko dakil ka'jaode, angko rim'e sastiko onna mangan.

5. Anga Mouzani sima arirangko pangna tik ka'e dongen.

Ia sason ka'ani bidingo minggipin niamko dakna gita Goalpara District-ni Deputy Commissioner, Capt. Morton janapahachim maina Garo Hills-ba 1865 bilsiode Goalpara District-ni nington manchapkuachim. Ua miksongade Laskarangna bangbata bil aro Elekarangko dalbatate onna miksongani dongachim. Ua Lasker aro Zimandar-rangni gisepo kamo dingtanganiko dakaha. Laskar-rangni kamara antangni Elekao donggipa Zamadar-rangna rokomsa sasonni bilko mesokna gita SANAD minggipako onna tik ka'aha. Uko chusokatna gita Captain Morton kam ka'aha.

1. Na'a nasimangni songo-noko dakbewal gita mikkang nigija bichal ka'na nanggen.

2. Na'a nangni Elekani ningo tom'tom ong'atna gita joton ka'na nanggen. Maibaka'e nangni Elekani ningo je A'chikba ongchong gipin Elekaoni dosi dake katbae dongako uide uko rim'e Depputy Commissioner-ni Adalot-ona ra'angna nanggen.

3. Na'a nangni Elekaona gipin Elakaoni ba a'kaweonni mande srik srik dongeako uide uko bakbakan sandie nangni Elekaoniko watatpilna nanggen.

4. A'chik Nokma siode unbaksa ganchio gipin mandeko so'chapronga. Ia namgijagipa dakbewalko na'a nangni Elekani ningodakna onna nangjawa. Aro uko saoba dra'e dakako nikode na'a uko Deputy Commissioner-ni Adalotona bakbakan rim'e ra'angna nanggen.

5. Na'a nangni Elekao saoba a'sel ong'e siode, jekai matcha chikode, mongma dokode ba boloni wa'oni ga'ake siode, indakgiparangko na'a bakbakan Deputy Commissioner-na uiatna nanggen.

6. Bilsil gimiko na'a ia niamrangko kakket aro bebo kam kaode Deputy Commissioner-oniko Sorkarini on'a tangka Gong ko man'gen. Aro ua tangkako basako aro bano on'gen ukoba nangna uiatgen. Iarangni gimin Zimandar-rang SANAD-ni lekao segipa niamrangko namedake manina nanggen.

Manderangoniko nokni kajinako gilani kamko pakwatgen, indiba Zimandar-rangkode Lasker-sa kamo rakkigen. Songo noko kajia golmalrang dongode tomtomatani uamangni jakon onngen. Aroba a'songni niamko peode ukoba uamang bichal ka'na bilko mangan. Lasker-rangni kamna bate Zimadar-rangni kam rakbatani gimin uamangna dormahako onna tik ka'ahachim. Zimadar-rang SANAD-o ge'etgimin pilak ku'rachakanirangko ku'rachakgenchimoba Zimadar sakprakan ku'rachakani gita kamtangtango chusokatna nanggan. Lasker-rangni dalgipa melaanio namnike tik ka'gimin gita, Police-Zimadar dake, kra'a gita bilko on'e kamo donatako man'e chongipa kamrangni gimin bichal ka'e Gong 50-na batgipa dai ba groko gam'atani bilko mangan.

Anga kamao segipa Niam ba dongimin Ain-ko manina seachi ku'rachaka.

1. Anga mikkang nigija songo noko dakbewal gita bichal ka'gen. Anga bilsio gumiko ia niamrangko manie kamko kaode Deputy Commissioner-oniko sorkarini on'a tangka Gong ko mangan. ua tangkako badia biapo aro basako angna on'gen uko angna Deputy Commissioner uiatgen.
2. Anga angni Elekatango tom'tome dongdilna joton ka'gen. Angni Elekaona gipin elekaoni sriksrik dosi gnanggipa mande katnape donggenode uko anga rime Adalaotona ra'anggan.
3. Anga A'chikrangni mingsa namgijagipa dakbewal chongmotan songni Nokma ba dalgipa mande siode unbaksa ganchio gipin tangenggipa mandeko so'chapaniko champenggen. Aro saoba uko manijaode uko rim'e Deputy Commissioner-ni Adalotona ra'anggan.
5. Anga angni Elekao mande sinanggija siode jekai matcha chikode ba chio buga ra'ode ba boloni wa'oni gaaknangjae siode uko bakbakan Deputy Commissioner-na uiatgen.

Garo Hills 1866 bilsio dingtang district ongaha. Sak 24 Zimadar-Police-rang ua bilsio ia kamo ku'rachake kamo donatako mantokaha.

4 - GIPA JA'PANG KATTA

BRITISH SORKARINI GARO HILLS-NA DAKGIPA NIAMRANG

Indiani Salgro Salarangchi an'pachakgipa A'dokrang 1872 bilsirango sasonni kamrango British sorkariko mandikataha. Maina British je niamrangko ia A'dokrangna bikotaha aro sasonni kamrangko a'kaweni manderang aro a'brini manderangni dakbewalni kri niamrangko dintanggrike dakna nangaha. Maina a'brini manderangba apsan kusik aro ma'chongni manderang ongjachim. Ia dintanggrike sason ka'na nanganiko kamao a'selrangko mesokenga.

1. A'kawena je Sasonko donachim ua a'brina ra'chakani ongjawa ine British sorkari chanchiaha.
2. British-ni kajina mananide a'kaweni mongsongbate apal jomiko game chagiparagonisa ongbatachim. Indiba a'bri jolode ua apsan kajina gilna re'ani koroskon manpiljawa, maina apal game chagiparang banoba banoba ritik ritak dakesa dongaikuachim. Uni gimin apalni kajinako ra'gija nokni kajina chongmotan (House Tax) - ko aro a'briko jamang dake gitchichi game rim'e chaani gimin (Houe-Tax) - ko ra'skaaha.
3. Uamangni chengoni dakbewal gita sasonni niamko ragatode altuae A'chikrangna ra'chakani onggen ine British sorkari nikaha.
4. British Sorkari iakoba indake chanchiaha, chongmotan sasonni bidingo a'brirangoba a'kaweo gitan niamrangko dakode mitam kamrango melijawa ine nike a'brini manderangni jakon uamangni namnika gita kamko kachina pakwataha.

BONKAMGIPA : A'brini manderang aro A'kaweni manderangni gisepo chengonin jat gita mamalekani gisik aro kamrang dongaia ine British Sorkari parakaha.

Dr. Hutton-ni agana gita, "Assam-ni a'brini mande Bengal-ni a'kaweni mande baksa jat, kusik, torom aro pilak dakbewalrang namen dintanggrik ongachim. Jekai, British mande Turk mandeoni nameu dintanggrika gita". Uandake Brahmaputra (Songdu) a'kaweo donggipa manderang aro Garo Hills-ni a'bri ningtuao donggipa manderangba kosako toe aganbagimin gita ongaia.

INNER LINE REGULATION

A'songona napbana magijani niam ba ain.

SALGRO Salaram A'dok jol gimikko British Sorkari 1872 bilsirango chugimik gitan ongnasipile sason ba dokkol ka'na manahachim. A'bri aro A'kaweni manderangko dingtang maekgrike donna British Sorkarini ska aro namnika ong'achim. 1872 aro 1873 bilsirangni gisepe British antangni a'kaweo donggipa manderang baksa a'brini manderangko bading chiwalgrikani bidingo nangrimatna joton ka'aha. Mitam kamrangko a'kaweni manderang sengbatani gimin jamano a'a chirangko aro a'ningo a'sako donggipa gamchatgipa bosturangko skatang dakna kenchake Bengal-ni Lieutenant-Governor-ni 'Inner Line Regulation' chongmotan a'songona ramram napana mangijani niam minggipa mingsa ain-ko ragataha. Je niamkon Lietenant Governor-ni kupatiani gita Governor-General-In Council-ba ra'chakaha. Ia niamko a'brini district-rangosan donaha. Ia Niam-ara a'brini district-rangchina skatang sorkarini hukum gri apaloni gipin manderangni napbolbolbaaniko champengani ong'achim.

Je British-ni mandeba napangna bilko ongipa lekka gri districtni sima ariko (boundary) gabatangna manjachim. Re'anggipa sakantian district-ni dogachol-o (gate) napangna hukum on'e segipa lekako mesokchengesa district-ni je biapchiba re'angna manachim. Una agreba bading chiwalgrikani gipin niamrangkoba donaha. Benggimin a'brini district-rangni a'ningo ba a'sako donggipa gamchatgipa bosturang, jekai Gondu-Kak aro Mongma wagam aro a'ningo donggipa koila-rongchun, sona aro ugita gamchatgipa bosturang.

Maina Montagu Chemls Ford-ni report gita ia niamo nangegijagipa district-rangara North Cachar Hills, Mikir Hills (Dao Karbi Anglong district) Khasi Jaintia Hills aro Garo Hills ong'achim.

Maina ia district-rangara Partially Excluded Area-rango chongmotan Provincial Government sason dongachim. Indiba Lushai Hills, Naga Hills aro North Eastern Frontier Tract-ko manchape 'Excluded Areas' ine chanako manaha chongmotan joljol ia district-rangko Governor General sason ka'achim.

"Excluded Areas aro partially Excluded Areas"

Iani bidngo aditako talatenga. Maina iano adita jajaani donga. India sorkarini 1935 bilsio ragatgipa ain-o gita Excluded Areas aro Partially Excluded Areas ingipa A'dokrangko rongtale aro ma'ate mesokenga.

je district-rango Inner Line Regulation Niamko donaha aro donjaha. Inner Line Regulation-ko mongsongbate "Excluded Areas"-rango donbataha. jekai iarang gita, 1, North East Frontier, Sadya, Balipaa, Lakhimpur, NagaHills aro Lushai Hills. 2, Ia district-rangko "Partially Excluded Area"-o napataha, jekai Cachar Hills District-ni North Cachar Hills, Nowgong-Sibsagar district-rangni Mikir Hills, Garo Hills Dsistrict aro Shillong Cantonment-Khasi Jaintia Hills district. Ia kosako janapgipa district-rango Inner Line Regulation Niam nangejaha.

Talatani : "Excluded Areas" ine dongimin A'dokrangko Provincial Government-ni jako sason ka'ani ba niamko dakani ragatgimin bilko onjachim. Iako Governor-in-Council antangan pilak sason ka'ani aro tangka paisani bil gimikko ra'achim. Aro Provincial Legislature-ona mandeko electionchi seokgija namnikatangko jekoba seoke donatna bilko manachim.

Talatani : "Partially Excluded Areas" ine dongipa A'dokrangko Provincial Government-ni Minister-rangchi sason ka'achim aro Provincial Legislature-ona Election-chi manderangko seokachim.

5 - GIPA JAPANG KATTA

CHENGO SONGADAMO MELAA

Chengonin A'chikrango song--melaa ingipa dakbewal dongachim aro Songko Nokko sason kaani bidingode ian mongsonggipa kamko chusokatani chol mingsa ongachim. Garo Hills-o songo noko sason ka'ani bidingo kamrangko sul sul seani dongjani gimin, jeko dakoba maharini biding gita sandichenganiko dak-batachim. Pilakjegrikanirang, duk ba matnanggrikani kamrang dongode Nokma songni nokni meapa budeparangko ok'ame mela'e namataniko dakrongachim. Indake uamangni melae mangdonge namatani kosako darangba mamungkoba dakna bil manjahachim. Minggipin songni melae dakna nanggni kamranga, gamgiparangna a'ako سوالani, alani ba kusi onge salnimani aro isolrang aro mite-rangna boli onanirang, aroba songni nokni rama jalangrangko tariani sal ba somoirangko manchie tik ka'ani ongachim. Songni nokni melaaniko Nokma ka'dilachim. British-rang re'bamanede songo noko melae namatani bilrangko Lasker-rangna Sardar-rangna pakwataha, indiba iako uamang gimaatsrangnade manjachim. Daororode manderang songo noko melae namataniko dakrongbatengaha.

BICHAL KA'GIPANI KAM

Chengo A'chikrangni bichal ka'akode nipana ba knatimna gitik dakmanpilachim. A'brirangko British-ni chapatmanoba dakbewalde dingtang kujachim. Dingtang Adalot dongja, pilak kajia golmalrangko songo noko melae namatachim. Kakket bichal ka'aniko dakmitingo kenataniko aro kumikchetaniko dakanian gisiko nangatani ong'achim.

BADI BIBADI KU'MIKCHETANI

Chengo A'chikrangni bichal ka'anio ku'mikchetaniko jakalachim. Iani bidingo an'ching minggniko gisik ra'na.

SKANGGIPA :

Skanggipa melaniko songni atilao saksa sakgni songko dilenggipa meapa budeparang dakachim. Indakgipa tom'aniko manderang saksa sakgipin baksa meligrikgipa uamangni kam cholonko uigrikgipako dakachim.

GNIGIPA :

Chengo A'chikrango salgio donggipa nikgijagipa bilrango bebe ra'ani mangrakachim. Ku'mikchetan salgiona biani mingsa ong'achim. Indiba tole ku'mikchetode kenbegnipa sastiko ua biapo ba jamano mangelchim ine bebe ra'a. Kajia ong'gipa dolgnian ku'mikchetaniko dakna nangachim. Uamang kakket aro bebe chongmotkosa ku'mikchetanio aganna nangachim. A'chikrangni melaanio banga rokom ken'ate ku'mikchetanirang dongachim. Rokomsa mikchetaniara dolprakan rongdotni mikkango chadenge olakkianiko dakchengna nangachim. Unikosa dolgnian jakko chopjole bamaniko mesoke sakki onna nangachim. Aroba dolprakan matchani grengni wagam-ko chike mikchetanikoba dakatachim. Mitam kamrangode dolgnikon milamko dangtape ku'mikchetate sakkiko on'achim. Mitam kamrangode a'a tilongsako ku'siko chikkapate mikchetataniko dakachim. Rokomgipin ku'mikchetaniara do'o mangsani skoko rastoe ra'enba uni mikron ronggniko goolchi suprote, angaba indake ka'na ongchina tole aganode ine mikchetatachim. Aroba minggipinara detangrangni skoba dangtape mikchetataniko dakachim.

Minggipin bichal kaani niamara dosi dakgipa mandeko burung jatchio matchana minge walsa walgni dake ka'e donachim. Unon matcha ua kae dongipa mandeko chikjaode ua mande dosi dongja. Unode ua dosi donga ine potako mangipa mande antangan Deputy Commissioner-

ona reange antangko man-sonlman pe'ani gimin banga tangkako dabina manachim. Indiba ia niamko jamanode adita ritchengate donaha. Indake mandeko burung jatchio kae donani pal do'bok ba do'orangko kae donskaaha.

Changsao indakgipa kamni gimin Tura-ni Deputy Commissioner, Capt. Maxwell-ona re'baon man-hani ine dabigipa tangkako onate, indakgipa chengoni niamchi bichal kataijachina A'chikrangko mikrakataha aro mikkangchi indake bichal ka'taianiko dakode jrima sastiko mangen ine niamko donaha. Aroba mingsa bichal kaani chengoni niamara "AKROM" ina. Akrom niamara indake ongachim, je biapo je somoioba mandeko matcha chikrongachim, indakgipa biapo dosi dakgipa ba gro gnganggipa mandeko saksan bolo kae walsa ba walgni dake donachim. Pring sengon songni manderang ua mandeko mamungba dakgijako nikode ua mandeo dosi dongja ine donachim. Uni jamano ontisa indakgipa bewalko ritchengate donskaaha, chongmotan mandeni pal ua mandeni bimungko minge do'o do'bok uarangko kae walsa ba walgni dake kae donskachim. Ua gita apsan pringo do'o ba do'bokko matcha mamungba dakjaode ua mandeo dosi grichim ine agana. Iadakgipa dakbewal niamrangkode mande so'otgipa, dokpretgipa kamrangnasa jakalachim. Indiba ramram songo noko jik seka torea, chaua mengkua. Indakgiparangkode songni Nokna Lasker-chi bichal ka'e namatachim.

CHOKKELA SO'A

Ruuta somoi onguja ia CHOKKELA SO'A dakbewalchi bichal ka'ani dongkuengachim. changsao indake ong'aha, saksa A'chik pante Kiban minggipa Ganggetta-ni demechik Jangsi-ko adita sal somoina kime gale kataha. Aroba Jangsi gital me'asa Digen Laskar-ko mikchae namnike adita sal somoina jik se dake kimgrike dongahachim. Jamano Digen Laskar-ba Jangsi-ko gale kataha. Indakako nike Jangsi-ni magipa Ganggetta demitchikko nie duk ongbe'e aganaha. "Na'ra maina jadu montol dakgiparangko kima donga?" A'chikrangni gisepo chengode je mandekon montol dakna changgipa ine bichalo rim'a manode uko so'ote gala. Daororomangba je mandeko montol dakgipa, memang muni pigipa ine rim'a manode songo nokoniko alok galachim, aro darangba antangtangni demechikko kimna dongna on'jachim.

JensaloKiban Garo, Ganggetta uko montol dakgipa ine aganenga inako knae Ganggetta-ko singon, angade aganja ine Ganggetta jeaha. Indiba Kiban uko "CHOKELA SO'ACHI"porika nina ra'biaha. Ganggetta-ba uni ra'bianiko ra'chakaha. Medik gesao chiko gapate done

uko tik dongimin ambolchi dingataha. Jensalo chiko dangtape nion dingani gimin Kiban dosi dongja ine Ganggetta-oniko man-hanini tangkako dabiaha.

Changsao Boldakgre-ni Kheya Nokma gro mingsako bichal ka'on dosiko rim'a manjani gimin dolgnian Tura-chi Deputy Commissioner-ona re'baaha. Unon Deputy Commissioner ua mamla-ko CHOKKELA SO'ACHI bichal ka'e nichina watatpilaha Indiba maibakae CHOKILA SO'A bichalba ke'jahachim.

A'CHIKNI NOKPANTE

Nokpante ine aganon daororoni mitam panterangde haida name taljanaba donga. jekon Sahep-rang "A house of bachelors' panterangni tuani gesa nok. Anga 1950 bilsini February jani skanggipa antio A'chik Christian mondolirangni Soba Dalgipachi re'angako gisik ra'enga. Songoni jaachisa re'na nangani gimin Damra, Rongjeng, Simsanggiri gita napakangna nangachim. Pringo Simsanggiri-oni Tapsi gitoko re'sote, Renang dareko jakra don'e Emangiri songo mesal song'e chana nengtakaha. Ua Emangiri songosa angade nokpante-ni dala, aro nitobe'e aro nambe'e rikaniko nikchengaha. Chengonin Emangiri songni manderangkode bolko solna repna, nokrik nokdakna jakma mine changa ine mingsinga minggamachim. Nokpante tegni gnang, uan Sangma panterangni tesa aro Marak panterangni tesa. Uarangko songko jokpakgipa Rongdik chibimako niwate rikachim. Aiao namen nitobejok. Nokpanteni pangchakani krongrang, bolgorang aro nokko mangrakatna kippipa bilbangrangko matchani, mongmani, korial aro matpurangni bimangko konge repa solachim. Haida daororo uandakgipa nokpanterang dongkuenggenma dongjaha anga niketaikuja. Maina da'o bil50-o batangaha. Chengode songsongantion nokpanterang dongachim. Daldalgipa songrangode mahari gita nokpantekoba panterang bangode kusi onгна gita rikachim. Nokpanteo tugipa panterangni giseponiko saksako dilgipa dake seoke donachim. Uasa kamrangko antangtangni gisepo gadang gadang dake sulachim, jekai sawa nokpanteko itrokgen, sawa waltim sikna ambol ra'bagen aro sawa pringo miksuna chiko kodogen, indake sualachim.

Mitam nokpanteangko gro mik 60 aro gipeng mik 20dake chengode rikachim ina. Basakobade nokpanteo kusi onгна gita ro'gipa damarangko dokachim (tomtom ba drums). Aroba bangsi sike chigring totéba panterang kusi ongachim. Mongsongbate me'a bisarang bilsu 10 onggipaoni jik kimkujadipetna nokpanteo tuachim. Tusina skangde golpo

ka'gipa ka'gen, git ringgipa ringgen ba mikchatangtangkoba golpo kagen, indake panterang nokpanteo kusi ongtokachim.

Chengode nokpanteko bichal achal ka'ani nok ba biap adam dake nangode Nokma aro Lasker-rang jakalachim. Songni nokni maiba maiba dalgipa kamrangkode nokpanteo dakachim. Basakobade nokpanteko School nok dakeba dikdixanade jakalachim. Jik kingimin songni meapa sarongrangba nokpantechi reange golpo ka'e atamode rorongachim. Chengode pante bisarangna wata chengani jekai kerang, kok, ampaltak, am-ruan indakgiparangko wading dua kalatachim. Meaparang doka damani sika moanirangoba skiachim. Kusi ong'ani salrangode bilko jakkoba panterangko tosusaatachim, jekai gando makkal pala, wapong sikgrika kangkare degrika, budu salgrika, jaktongpegrika indakgiparangko dakachim.

Nokpanteo chengode darangba denggu masu dakani dongjachim. Aroba niamna bamani, meapa me'chikmarangko mande ra'ani aroba sorkari baksa pilak kamon nangrime melie dongachim. Songgipinni manderang songona soka sokode, meatamko noko chamanede atamo tusinade nokpantechi me'asarangkode rimange tuatachim. Dalgimin me'chikrangko mamungsaloba nokpantechi gadoe rona onjachim. Indiba me'chik bisa sokme atching chikkujaoe sokme kimkarongkujaode pagipa ba adatangrang baksa nokpanteo gadoe ro'pana man'achim. Nomilrang chametangna mepal dinbaode naprongbewal dogachol gitasa mepalko ra'napna on'achim. Indiba nokdechol gita ra'napna ba ong'katna onjachim.

Daororo nokpnate dongjani gimin A'chik panterang aiao inmanna nangja. Nokpante dongna nangjaha ine Sorkariba champengja. Maina History ba Itihaas antangni ramatangko re'engani gimin A'gilsak uni jaman jaman re'pagen.

6 - GIPA JA' PANG KATTA

CHENGO A'CHIK-NI SASON KA'ANI

Garo Hills-ko British-na chapatna skang A'chikrangni daktbewal gita mandeko bichal ka'aon Nokmani aro songni nokni dilgiparango pangchaka. Chengode A'king Nokma ba songni namnike don'ako mangipa mande bichal ka'e je raiko on'gen uan ong'jok.

[15]
NOKMARANG

Chengonin A'chikrangni Itihaas (hisotry) gita Nokma rokombri donga.

1. Gamni Nokma, chongmotan songo noko man'e chakalode ukode mande ra'ani gita Nokma ine jakala ba aganronga.
2. A'king Nokma, uan maharini gita chengoni manrikrikbagipa a'king go'reni nokgipa.
3. Kamal Nokma, ian kritna a'muna nangode saoba songni nokni mande sa'singa manode ua Kamal Nokmako okamronga.
4. Gan'na Nokma, ian namen rakgipa niam ong'a. Ia Nokmako demingsingatna gita uo Rang-silgong ko 15 dongosa Kram-ko donna ba ra'gatna mangen. Unikoa ua Nokmaan rang-sil-gong ko 30 dongosa Nagra-ko dokna mangen. Ukon Gan'a Nokma minga.

A'KING NOKMAKO JA'CHONGRIKANI :

A'king Nokma ine aganon a'a aro mande dongna nanggan. Song damsda aroba banga gitimrang badiaba maharini ongode Nokma'an ua a'gimikni skotong ba pamong aro nitimgipa ong'a. Uni gimin Nokmako ja'chongrikani dalgipa daitoko ripee A'king Nokma ong'a. Nokmako ja'chongrikna Nokmani chawari Nokkromsa ong'na man'a. Demechik chonbatgipa ongoba nokko ba A'kingko pagipani gritang-sokchiko kimjaode nokkrom ong'na manjawa. Aroba demechnik chonbatgipa ongaiani gimin nokko manrikgen ine je ja panteko kimaiani ongja maina uade manjawa. Ba Nokmani demechnik sko namjaode ba pagli ongode uaba manjawa. Indakgipa namgipa rakgipa niamarang Tribal ba gipin a'brini manderang ba jatrangode dongja. Uni gimin Nokmani gritang ba chawarisa Nokma ongrikna mangen. Aroba Nokmao demechnik dongjaode sepangbatgipa jikni nogipa ba abitangni demechnikko mahari tik kae de'ragatna mangen. basakoba Nokma sagini jikgipa randi mechnik demechnikrangni gisepo sakobasa namnikbatode, aro demechnikrangni gisepoba A'kingna seksekani dongode, uko mahari tom'e chanchigrime seokna maharini bil gnang. Aro ukon sorkariba ra'chakna nanggan.

Chanchibewalode A'king Nokmako songo nokode saksa dalgipa mandegita songba nokba mande ra'a. Indiba mitan A'king Nokmarangde songko nokko rodil chadilna aro pithal a'nal ka'pana changja aro cholijachim. Aroba gipin jawa dalgipa rakgipa ba Sorkarini daldalgipa manderang sokbaoba noko jikrang nongnang dangaigipakode, ia Nokma

jadasa ine manderang ba Government-ba aganronga. Mingsa indake dakbewal donga je, A'king Nokma ong'ana, sike jekoba jakoba chonike onike doke sate ronade manja. Toromni kamrangko ka'na uo bil dongja maina ua Nokma antangan Kristian ongjaode uko dakna manja. Daodipet A'kingo donggiparang Nokmana mamung kajina ba tangka paisako onna nangjachim. Ua antangni A'king ningo donggipa manderangni name game sue chaaniko mamung dakeba champengna manja. Golmal kajia ong'oba Nokma saksan bichal ka'na man'ja indiba songnokni manderangsa bichal ka'e namatgen.

LASKAR ARO UNI KAM

British-ni sason rebaon A'chikrangni songsalo bichal ka'e namatani gital niamko abachengaha. Uan Laskar-ni kamko bikotchengani ongachim. 1824 bilsio Garo Hills-ko sipai kotokchi bamatani jamano David Scott Garo Hills-chi anpachakgipa songrangni skotong dilgiparang baksa kumonggrikaniko dake uamangna "Laskar" bimung ba upadi-ko on'aha. Laskarang British-ni rajachi sason ka'ani bilko uigipa ong'na nanggen, Sorkarina bamna nanggen aro British Sorkarina kajinako on'ani bidingo bebegipa ong'na nanggen. Laskar-ni kamara kajina gilani aro kajinani tangkako sorkarina ra'ange onani aroba mande sootgiparangko rim'e British-ni Adalot-ona ra'angna Police-rangko dakchakna nanggen. Laskar-rang uamangni kamrangko name ka'ode, uamangna bilsini bonahaode kajinaoniko baditaba bakko hisape tangkako boksis gita dake on'gen. Laskar-rangni kammi bilrangko bariataha. Uamangna kajina gilani kamrangna agreba, songo noko chongipa a'selrangko bichal ka'e namatna bilrangko on'aha. Aroba 1861 bilsio ragatgimin Ain ba Niam gita dosiko bichal ka'e rima manode dosi-ni kri Rs. 50.00 (sotbonga) daiko rai onna bilko man'a. Jamano 1937 bilsini, March-ni 29 tariko ua niamko taritaipile namdapataha. Laskar-ni bichal ka'e rai on'ako chuongnikajode Deputy Commissioner-ni Adaloto apil ka'na bilko mangan ine niamko daktaiaha. Indakesa A'king Nokmani pilak songo noko kajia golmalrangko bichal ka'ani aro dosi gnanggipako dai gamatani bilrangko Laskar-na pakwataha. British Government Laskar-rangko namen simsakbeesa seokaniko dakaha. Laskar-ni kamma seokaniko dakon chengode A'king Nokma aro uni Elekao donggipa manderangni namnikaniko mangipa mande onгна nanga. Unbaksana leka pora skia manjaoba A'chikni niam ritiko masigipa mande ong'na nanggen, indakgipa kakketgipa dilgipakosa Laskar-ni kamma seoka.

1952 bilsil intal Laskar-rangko kamo rakkiani bilrangko Garo Hills Autonomous District Council-ni jako pakwataha. Laskar-rangko Elekani manderangni kragipa mandeko seokaniko District Council-ni Chief Executive Member namnikjaode, election-ko dakate seokachim. Aroba Laskar kam ka'na sigkiparangko okamate porikako ra'chenge seokaniko dakna ine District Council niamko donoba, maibani gimin dakna nengnikaniko manon, elekani Juri member-rangchi seokaniko dakskagen. Laskar-ni bilsil 35-na komina nangjawa aroba cholon namgipa, tom'tomgipa, pilak baksa melina mangipa aroba tangka paisani bidingo kakket onggipa onгна nanggen. 1964 bilsio Lasker kamna porikako seate seokaniko dakgen ine niamko donahaoba daalona kingkingba chusokatna maibani asel mankuja ine nika.

SARDAR ARO UNI KAM

A'chikni sason baksa British-ni ondapgipa rakgipa kamara Sardar-ni kam ong'a. Laskar-rang antangtangni ningo kamko ka'na Sardar-rangko rakkina nanga. A'king Nokma-kode pangnaba Sardar dake rakkina manja. Sardar-rangna Laskar-rang tangkarangko bilsio District-oniko dormaha dake mananiko on'a. Uamang Laskar-rangni geetaniko manina nanga. Adita sengkalgipa aro gro a'sel jeronggipa Sardar-rangna songo noko chona kajia golmalrangko bichal ka'e namatna Laskar-rang bilko onna man'a. Daororode Garo Hills District Councilni Sardar-rangna tangka gong ritchasa (Rs. 100:00), chola kingsa aro half-pen kingsa dake on'achim. Daororode Laskar-rang District Council-ni kamko chugimik ka'na nanga, indiba Sardar-rangde Laskar-ni geetosa ka'na nangaia.

ZIMMADAR

British Government-ni dongimin Zimmadar-ni kamkode uko bonataha. Maina Zimmadar-ni kamrang Laskar-ni kam gita ongaiachim. Aroba uamangni kamko Mouzadar-rang, Gaononggu-rang aro Mondolrangsa ka'engachim. Uni gimin Garo Hills-ode Nokmarangko, Laskar-rangko aro Sardar-rangko songo noko, anti akango mande ra'na nanga, maina uamangan Government-ni sason-ni jadal japangrang aro cheksirang ong'achim.

7 - GIPA JA' PANG KATTA

A'CHIKRANGNI GISEPO ASSAM LEGISLATIVE COUNCIL-O MEMBER ONG'CHENG GIPA

India Sorkari-ni 1919 bilsio ragatgipa Ain-o gita jaman chakenggipa Assam-ni a'bhirango donggipa Tribal manderangko Assam Legislative Council-ona Constituency-rangko dake election-rangko ongate member-rangko seokani dongjachim. Indiba 'Shillong Urban Constituency' ine gesamangmang Khasi Hills-na on'achim. Una agrede Assam Government-ni namnika (namnika) mandeko jekoba Council-ona seoke member dakaiachim.

Assam Legislative Council-ona 1920 bilsina skangde A'brini manderangoniko saksakoba member seoka dongjachim. Indiba 1921 bilsio Garo Hills-oniko saksa Laskar, Janggin A. Sangma-ko British Government, Member of Legislative Council ine seokaha.

Indiba Janggin A. Sangma, leka pora dongpajani gimin Council-o chanchie agangrikanirang English-chisa ong'ani gimin uipana manjae Council Session-o pangnan dongrongjachim. Janggin Laskar lekka pora dongjaoba ningtue chanchibewalna mangipa mande saksa ong'achim. Indake ua M.L.C.-ni Member ong'ani kamko wataha (Resigned). Janggin Laskar A'chikrangni gispeo MLC-ni member-na seokako manchenggipa mande ong'anina da'alo A'chikrangni rasong cha'beani aro uko gisik ra'beani ong'a.

SKANGGIPA GARO HILLS-O ELECTION-KO ONG'ATANI

1935 bilsio India Sorkari-ni Ragatgimin Ain gita Assam Provincni Partially Excluded Area-rango manchapgipa District-rangna Election-chi Provincial Legislature-ona member-ko seokna ongipa niamo Garo Hills-ba Gegni biaprangko man'aha.

1. Garo Hills North Constituency,

Aro

2. Garo Hills South Constituency.

Skanggipa General Election Ragatgimin Ain-o pangchake Assam Legislative Assembly-na 1937 bilsini February jao election ong'aha.

1. Garo Hills North Constituency-o chakatgipa sakgni dongjachim. Uamangara Benjamin Momin aro Janggin Sangma, Laskar ong'achim.

Leka puonna mangipa bimung donggipa Nokmarang sak 539 oni sak 422 leka puonaha. Benjamin Momin king 242 vote-rangko man'aha aro Janggin Sangma king 180 vote-rangko man'aha. Iano Benjamin Momin king 62 vote-rangchi cheenba MLA ong'aha.

2. Garo Hills South Constituency-o chakatsusagipa sak 3 dongachim. Uamangara Jobang D. Marak, Muniram R. Marak aro Ramsing Sangma ong'achim. Vote onna mangiparang sak 767 oni sak 552 leka puonaha. Jobang D. Marak king 276, Muniram R. Marak king 164 aro Ramsing Sangma 112 vote-rangko man'aha. Jobang D. Marak bangbata vote-rangko man'e election-o chegipa ong'aha.

Jobang D. Marak aro Benjamin Momin 1937 bilsioni 1945 bilsiona gimik bilsa 8 ongpile joljole Assam Legislative Assembly-o M.L.A. ong'aha.

GNIGIPA ASSAM LEGISLATIVE ASSEMBLY-NA ELECTION ONG'ANI

Assam Legislative Assembly-na Gnigipa General Election ong'ani bilsio chongmotan 1942 bilsio Agilsak gimikni Gnigipa Dalgipa Dakgrikani (SECOND WORLD WAR) ongengani a'selo election-ko ong'atna man'ja'e 1945 bilsini December-ni bonkamgipa salrango aro 1946 bilsini January jani skanggipa antiko manchape electiko ong'ataha. ua bilsiode lekka puonna bimung donggipa Nokmarang sak 1383 ong'ahaoba Nokmarang leka puonna gisiko nangtokjae ritchaprako sak 46-ni gitasan leka puonaha. Ia chango Constituency geprako sak 5 kae chakatsusagiparang ong'kataha.

1. Garo Hills North Constituency-o chakatgipa manderang Mody K. Marak, Aron N. Sangma, Benjamin Ch. Momin, Janggin Laskar aro Brownson W. Momin ong'achim. Iako indake gisik ra'atna Benjamin Ch. Momin aro Janggin Laskar susagrikon Benjamin Momin che'aha. Ia election-o Mody K. Marak chegipa ong'skaaha.

2. Garo Hills South Constituency-o susagiparang : Phukan Sangma, uan skanggipa Congress-ni candidate aro sakbri independent candidate-rang susaaha. Ianpako skanggipa political Party Congress-ni candidate-ko watatchengaha.

Ia chango Momiram R. Marak 1937 bilsini election-o antangko amatgipa Jobang D. Marakko a'jak chotskaaha. Moniram R. Marak 794 vote-rangoniko king 330 vote-rangko man'achi umung susagipa sak 4 ko am'ataha. ian British-ni somoio bonkamgipa Assam Legislative As-

sembly-ni Garo Hills-na on'gimin seat-o A'chikrangni chakatani election ong'achim.

8 - GIPA JA' PANG KATTA

GARO NATIONAL CONFERENCE ARO GOPINATH BORDOLOI COMMITTEE

Constituent Assembly, Indiani Salgro Salaram A'dokni a'brirango donggipa manderangni gimin sandie kupatianiko dakchina Assam-ni Premier, Gopinath Bordoloi-ko Sub-Committee-ni Chairman dake donataha. Sub-Committee-ni Member-ranga, Rup Nath Brahma, aro Aliba Imti ong'achim. Uandake Rev. J.J.M. Nichols-Roy koba A'brini manderangni pal Sub Committee-o dalgipa kupatigipa ong'e kam ka'china donatako manaha. Bordoloi Committee, Lushai Hills, Naga Hills, Mikir Hills aro North Cachar Hill district-rangchina re'ange sandianiko dakaha. Indiba Khasi Hills-ni Jowai Sub-Division aro Garo Hills-ona mikkawachi a'bachengahani gimin ramarang namjae rebae sandina manjaha.

Iani gimin 1947 May jani 16-gipa salo sak 59 Garo National Conferene-ni watatgipa delegate-rang Bordoloi Committee-ko Gauhati-o gronge dala aro gamchatgipa agangrikaniko dake una segipa memorandum-ni lekakoba on'aha. Uamangni gisepo mongsongbate agangrikgiparang: Jobang D. Marak, Phukan Sangma, Mody K. Marak, Debonath M. Marak, Janggin Sangma, aro CaptainWilliamson A. Sangma aro Karnesh R. Marak ongachim. Uamangni gisepo agangrikna Jobang D. Marakko aganna donahaoba Capt. W.A. Sangma aro Karnesh R. Maraksa aganbatahachim.

Garo National Conference district-ni gesa Organisation ong'a ine uamang Committee-na talataha. Aro je Garoba (A'chik) iano member ong'na mangen ine agandapaha.

Garo National Conference mikkangchi Garo Hills-o ongnasienggipa Government-ni sason-ni kamni gimin mingsa daksogiminko ua on'aha. Assam-ni ningon ong'e Garo Hills district-o gesa Garo Hills Union-ko dakna ine uamang dabiaha. Pilak dakgni kamranganAssam baksa dakrimgen, jekai technical education-ni pilak rokomrang, sana banani, anseng baljokani, a'songo reruraa doruraani, raanga ra'baani aroba pilak kamrango jeon Assam Province Central Government baksa nangrime dakna nanggnirang.

Garo Hills Union baksa gesa National Council donggen jeon sak 25 member-rang donggen aro uamangoni sak 2-de me'chikrang onngen. Uno mingsa member-ko bariatna manani niamkoba dongen jedakode A'chik onggijagipa gipin jatrangkoba member dakna mangen. Council-ni somoi bakroani bilsa 5 na onngen. Sak 23 Council-ni member-rangko election-chi seokgen aro sak 2 me'chikrangko me'chikrangchi dingtang seokaniko dakgen.

COUNCIL-NI MONGSONGGIPA DAKNA NANGGNI KAMRANG INDAKE ONGGEN.

1. A'chikrangni dakbewal niamrangko tik ka'srange seani aro songsalni namgija kamangko dingtangtani.
2. Garo Hills Union-ni sason ka'ani niamko dakna aro National Council-ni bak 3-ni bak 2 namnike chanchigiminko gegipin niam dakgipa dolchi chusokatgen.
3. Garo Hills Union gimiko kajina ra'ani niamko dongen. Assam Province-ni ningo Garo Hills Union-ni see ra'bagipa CONSTITUTION-ko Bordoloi Committee-na on'aha. Indake Garo Hills Union molmolalaniko dakaha :

"Government-ni je rokom niamba ongchong, Tribal manderangni uamangni district-o nokgipa ong'aniko namnike ra'chakna nanggen. jedakode songadam nokadamo Government-ni namgipa sasonko kumong nangrimgrike sason ka'e chusokatna mangen." Chasongni chasongna dakbaenggipa A'chikni niam riti bewalrangko Government-ni tarisogipa gital niam baksa nangrime dakna mangen ine uamang talataha. "A'brini A'dokrangko ma'ate gesa Province-ko dakani a'brini manderangnan namjawa, maina a'brirang indinan duulginim chichang gita ongenga. Dingtang dingtang jat ba mamalni manderang, dingtang dingtang kusikrang, dingtang dingtang toromrang aro dingtang dingtang dakbewalrang donga. Una agreba a'brini manderango cha'ani chuongja aro uamangni janggi tangani a'kaweni mande-o pangchaka. Uni gimin a'brirangko a'kawe baksa Provincial Government apsan ganggope sason ka'na nanggen.

District-ni sima arirangko Garo Hills-chi anpagipa gipin districtrangko dongenggipa A'chikrangko manchapa gita Assam-ni Goalpara District, Kamrup District aro Mymensingh district-rangko manchape sima arirangko dakna nanga. Aroba Garo Hills-o donggipa Zamindar-rangko bonatna nanga, maina uamang pangnan A'chikrangko sinjetani kamrangko dakachim.

National Council-ni Chairman-ko seokgen aro uko saksa dakchakna gita Secretary (Jakrikra)-ko dongen. Aroba Garo Hills Union-ni kamrangko ka'na National council-ni sak 5 seokgimin Executive Member-rang donggen. Executive Council bilsa 5-na onngen indiba uamangko songtainaba mangan. Council-ko chalaina bilsio tangka paisani Budget-ko tarigen, uan Executive Council-ni daito onngen. Iarangna tangkarangko nanggen :

1. Service Commission-chi seokgimin kam ka'gipa Officer-rangko kamo rakina, dolsa Police-ko rakina aro uamangni dormaharangko on'na aroba Garo Hills Union-o kam kagipa pilakna dormaharangko on'na uamangni kam onngen.

Sason ka'ani bidingo pilak jegrikani ba golmalrangko tik ka'na uan bilko mangan. Maiba ranggitik dakna nanggipa kamkoba uan mangan. Garo Hills Union, Indian Dominion-ni ningo Assam-ni bak ba rengsi onngen ine donahaoba Union baksa a'song gipinni (foreign country) maiba kamkoba ka'pana bilko mangan ine A'chik dilgiparang janapaha.

Garo Hills Union-ni President aro Vice-President-ko election-chi seokaniko dakgen. Je candidate-an bangbata voterangko mangan uan President onngen aro jean uni gnigipa voterangko mangan uan Vice-President onngen. President aro Vice President sakgnian National council-ni member-rang ongjawa aro uamang kamko bilsa 5-na chalaigen. Garo National Conference Garo Hills District-ni je kamkoba ka'na manna gita tik ka'e dongimin kotok gesa ong'a.

Tangka paisani Bill-rangko Executive council ra'bagen. Je niamko National Council namnike ra'chakgen uko Executive namnikpana nanggen, unosa Ragatgimin Ain ba Niam onngen. Mongsongbate indakgipa bilkode Province-ni Governor-nasa on'achim indiba Rev. J.J.M. Nichols Roy, Garo National Conference ia bilrangkode Executive Council-on donna nanga ine ku'patiaha. National Council-ni namnike ra'chakgimin kamrangko Executive Council maiba kenahakaniko nikode uko ra'chakgija daknaba bilko mangan. Indakgipa dakbewal United Kingdom aro gipin Common wealth A'songrang gita Parliament-ni namnikgimin kamrangko President-ni namnikaniko manna nanga gita Presidentna watatna nanga ingipa Ain-ko A'chik dilgiparang ra'chakna manjaha. Arobatai Rev. Nichols Roy-ni agana gita maibani a'sel nengnikengode Executive council ua kamko national Council-nachancipiltaichina watatpilna bilko man'a. Garo Hills Union-ni memorandum ongipao iakoba janape seaha Je gesa Supreme court (Dalbatgipa

Adalot) dongna nanga. Jedakode Civil aro Criminal kamrangni gimin mokordoma ong'on namgipa bichalni rai'onaniko kenchakani dongode uko Executive Council Adalot-ni bichal ka'giparang baksa a'songe namedake bichal kataina mangen. Garo Hills Union-ni Supreme Court (Dalbatsranggipa Adalot), uno bichal ka'giparangko (Judges) General Councilchi election-ko ong'ate seokna nanga aro uamangni kam bilsu 5-na onngen ine uamang janapaha indiba uamang name kamko ka'ode seokpiltaiiani onngen ine aganaha.

Garo Hills Union-ni tangka paisani gimin Garo National Conference indake janapaha :

1. Garo Hills Union-oniko mangipa pilak tangka paisarangko Union-ni Executive Council-ni jako donena nanggen.
2. A'songni tangka donramona (Treasury) baditako dongen Executive Council uko tik ka'na bilko mangen.
3. Badita tangka paisarangko aro pilak rokom kajinani tangkarangko Provincial Government mangenchim uako Garo Hills Union, National Council-na onna nanggen.

TANGKA PAISAKO IARANGONIKO MANGEN.

A'ani kajina, bol wa'arangni, Koila rongchun-ni, churangko palani, dai dawa ra'ani tangka, Stamp aro Court Fees-rang, Cinema aro ugita gipin amusement tax-rang, natok rimani chibolrangko palani. Central Government-ni Assam Province-na onatgipani mitam tangkarang aroba chibimarangoniko bijohiko bikotani royalty-ko mangen.

Garo Hills Union aro Assam Government-ni gisepo nangrimaniara Assam Legislative Assembly-ona sak 4 M.L.A. rangko watatgen. Pilak Provincial kamrangko Union-ni kam donggengchim. Provincial kamrangko badiaba kamrangko A'chikrangnaba a'kangna (Reserved) nanggen. Garo Hills-na mamung niangkoba Executive Council-ni uirikgijade ra'gatna manjawa. Garo Hills Unionba saksade Provincial Cabinet-o dongpana manna nanggen. Minggipin a'song gipinni manderang Garo Hills union-ni ningoniko a'a chiko ra'kamna onna nangjawa ine memorandum-o janapaha. Iakoba A'chik dilgiparang indake janapaha, Garo Hills Union-ni Executive Council-na Deputy Commissioner-ni pilak bilrangko pakwatna nanga. Minggipin, Assam baksa Garo Hills union je kamrangko ka'gen Assam Government nirokani bilrangko manna nanggen ine A'chik dilgiparang aganaha. Garo Hills-o chengonin dongkamgipa pilak a'brini

jat ba mamalrang aroba A'chikrang gitan pilakon jaman chakenggipa manderang jekai Rabha, Kachari, Hajong, Koch, Naga, Khasi, Lushai, Mikir aro indakgiparangna A'chikrang gitan bak ba rengsiko manpana nanggen ine Garo National Conference-ni dilgiparang molmolaha.

Minggipin, Garo Hills Union-ni ningo dongnapgipa gipin manderangba apsan sasonni ningo onngen. Garo National Conference-ni daksogimin Niam-ni japangko Bordoloi Committee-na Gauhati-o 1947 bilsini May jani 16 tariko on'aha. Rev. J.J.M. Nicholsa Roy-ni dagkimin noksa gita tiktak ong'achim ine nikgen. Bordoloi Committee Capt. W.A. Sangmako iani bidingo Rev Nichols-Roy-ko grongjokma ine singon "grongaha" ine Capt. Sangma aganchakaha. Rev. Nichols Roy-ko grongmanesa taribagimin niam-ni japangko bonkame dakaha. Ia pilakko aganna gita Jobang D. Marak-ko donsoahaoba Gopinath Bordoloi-ko grongmanchahaode, Capt. Sangma aro Lt. Karnesh R. Maraksa aganbataha ine aganaha.

Indake nikna man'a je Rev. Nichols-Roy kamchi dakchakaniko Garo Hills-ni manderang gualna manjawa. Ua ong'a chongmotkode Bordoloi Committee-na A'chik Nokmarangni Memorandum seao nangrimaniko nikgen. "Je nangko mande ra'e dorkastoko on'gipa manderang, mande ra'ako manna kragipa Rev. J.J.M. Nichols Roy, Assam Province-ni Tribal A'dokrangni Minister ong'e segimin niamni japangko salantini songbad-o seaoni ko uina man'a jekon chingni uiani gita, Assam-ni banga A'brini jatrangni dilgiparang, Constituent Assembly Advisory Committee-ni Tribal Area Sub-Committee baksa name singsandigrike kamko matchotani jamano, Constituent Assembly-o iani gimin che'em che'em chanchianiko dakgen ine chingade ma'sia.

A'chik Nokmarang Garo Hills-o Nokmarangni bilko gital niamni japangko (Constitution) seanio chelchakchina molmola. Chengo British sorkarini "A'brini A'dokrangko bak ka'e Excluded Area aro Partially Excluded Area ine don'giparangko dengalna nanga, maina Jakgitel India o pilak manderangan apsan silroro dalrorona manpagen.

BORDOLOI COMMITTEE, CONSTITUENT ASSEMBLY-NI DRAFTING COMMITTEE-NA DINGTANGMANCHA INDIANI SALGRO SALARAM-O DONGGIPA A'BRINI MANERANGNI GIMIN SANDIE REPORTKO ON'ANI BA KUPATIANI.

Bordoloi Committee Assam-ni A'brini dingtang dingtang jat aro ku'sikni manderangni gimin uamangni sandie mangiminko Constituent Assembly-ni Drafting Commiitee-na watatgipa lekao indake kupatiaha.

Beben Committee-ni Secretary, R.K. Ramadhiani, Bordoloi Committee-ko sea jotani kamrango namen dakchakaha, consitutent Assembly-ni niam ba ain-ko uigipa B.N. Rau, maikai niamo pangchake sena nanga kupatianiko on'aha. dingtang dingtang ma'mal ba jatrangni gimin na'atani aro janapatani gimin chanchiengon, saksa mandeni bewalni gimin uigipa mingsingako man'gipa (Antropologist) Dr. Guha Bordoloi Committee-ko dakchakbeaha. Ia a'brini manderangni chasongni chasongna ripingbaenggipa namgipa dakbewalrangko gipinchina salanganiko ba pilataniko manjachina Dr. Guha rak'en seanio champengna joton ka'aha. Beben a'gilsakni uigipa manderang baksa nangrimgrikanikode cholko onna nanga aro didina nanga ine janapaha. Ia jaman chakenggipa tribal jatni manderangkode antangtangni dakbewalrangko salsao antangtangan gelangiaskal nikuna nangaigen. Bordoloi Committee uamangni indake kupatianiko rachakaha.

2. Gnigipa : A'brini jatrang antangtangni a'dokona gipinchini manderangni napolpolbaaniko champengna aro a'a chiko gipinchini re'bagipa manderangna onjachina rak'en da'bianiko dakaha. Indakgipa champenganiko tribal manderangni jakon on'china gita uamang mol'molaha. Uni gimin, a'ako chiko سوالني, songdong a'chana on'ani aro burung bolgrimko ripinganiko District Council-na bilko pakwatna nanga ine Bordoloi Committee kupatiaha. Bordoloi Committee iako janapaha: "Jinmani namgnina bangbang dongenggipa a'ako jakalode Provincial Government uni damko onna nangjawa ine ontisa cholko don'aha." State Forest Reserved-na agre, burung bolgrimko ripingna aro uarangko nirokna gita, forest department-ko don'ani, bol wa'arangko palani, gedapdapani, aro nirok sandianikode Bordoloi Committee namnikaha.

3. Gitamgipa : A'ako gam'e rim'e chaani rokom bewalkode a'brini manderangnan pakwatna nangaigen ine Bordoloi Committee nikachim. A'bri burung bolgrimko a'rankario o'e so'e wacheng rame balororo patchualo agal so'e gam'e chaaniko man'a dipet dontongatna joton ka'na nanga indiba uamangni namnikani gri niamchi pass ka'na nangjawa. Uni gimin a'briko game chaanikode district Council-na pakwatna nanga.

4. Brigipa : Bordoloi Committee-ni nikani gita, songsalni dakbewal niamrangko segimin niamba niamko se'e uarango pangchake sason ka'na district Council bilko man'gen. Dal'a ain ba niamko pe'e dos dakgipa

kamrangni giminde A'brini district-rango on'jawa indiba indakgipa niamrangni miksonganiko chusokatna Officer-rang antangangni kamko uichina. Uni gimin Committee indake kupatia, maina chonchongipa kamrangni bichalrangko District Council-ni dalot-o dakna bilko mangan. Indakgipa adalotrango apil ka'na ba sandianiko dakna bilkoba on'e donna nanggen. Indiba non-tribalrangni nanchapgipa kamkode Provincial Governmentna pakwatna manna gita niamko dakna nanga.

5. **BONGAGIPA** : Primary schoolrangko, dispensary-rangko aro indakgipa chonchongipa kamrangkoba District Councilchi nirok sandianiko dakna nanga ine Bordoloi committee kupatiaha. Secondary Schoolrangkode District Council nirokna mankujawa ine Committee nikaha, indiba je mansusu nika uno donode nama. Indiba High Schoolrangkode District Councilna pakwatna manjawa.

6. **DOKGIPA** : District Councilna indakgipa bilrangko onna nanggen, chongmotan a'a, chi, burung bolgrim, apal jomi, songko nokko nirok sandiani baksanaba jatangko sason ka'ani niamrangkoba Bordoloi Committee kupatiaha.

7. **SNIGIPA** : District Councilrangni Chairman-ni kamnade Mikir Hills aro North Cachar Hills-na agre pilak District Councilrangan Chair-man-kode Council-ni Memberrangchi (M.D.C.) seokna nanga. Mikir Hills aro North Cachar Hills-ni giminde, Deputy Commissioner ba Civil Sub-Divisional Officer, obostani kri Chairman dakna nanggen.

8. **CHETGIPA** : Pilak kajina ra'ani bilrangko district Council-ni jak'o pawatna nanga ine A'brini manderangni da'bianiko Bordoloi Committee ra'chakna jechakaha. District Councilna mitam kajina ra'ani aro tangka paiza man'ani bilrangko onna nanggen inesa kupatiaha. Provincial Government-ni mangipa kajinaoniko A'brini a'dokrangna koros ka'na dingtang dongimin tangkani mitam bakko Councilna on'china. Janapaniko Committee ra'chakna jechakaha. A'brini a'dokrangna development kamrangni gimin dingtang Provincial Government tangkako chamna nang'a., inesan ku'patiaha aro ua tarigimin scheme-rangna Central aro Provincial Government jaksrame tangka paizako koros ka'na nang'a.

9. **SKUGIPA** : A'brini manderang uamangni a'dokrangona gipinchini manderang napolpolbana kenchakengani gimin aro uamangni janapa gita Chin Hills Regulation gita dakgipa niamko uamangba manna nanggenchimm aroba Council-ni memberrangni bakbrini bakgitam namnikode tangka paiza badinggiparangna hukumko (license) onna bilko mangan ine Bordoloi Committee ku'patiaha.

10. **CHIKUNGGIPA** : A'ningoniko man'gipa bosturangko nirokna District Council-na bilko on'china A'brini manderangni dabiani giminde Bordoloi Committee indakesa ku'patiaha, "A'ningoniko mangipa bosturangko bikot biksale jakalani giminde Skotong sorkarina pakwatan namgipa miksongani onngen. Unikoa uarangko bikotna gita hukumko aro baditaba bilsina tikka on'aniko dakna District Councilni Sorkari baksa agangrikgiya dakani ongjawa ine chinga chanchiaha.

11. **CHISAGIPA** : Provincial ba Central Government A'brini a'dokrang District Council-ni namnikako man'gija niamko a'brini manderangna dakna manjawa ingipa dabianiko Bordoloi Committee jegalaha.

12. **CHIGNIGIPA** : Je District Council-ni ningo jatsana bate donggipa manderang dongode indakgiparangode Regional Council-ko dakna nanggen ine Bordoloi Committee ku'patiaha.

13. **CHIGITAM** : Je niam ba Ain-ko District Council ra'gatgen ua niam ba Ain a'songna kengni ba namgijani onngen ine nikode uko Governor jegalna bilko man'gen ine Bordoloi Committee kupatiaha. Aro Governor je District Council-koba niamo dongimin gita sason kajaode pegalna bilko man'gen.

14. **CHIBRIGIPA** : Je A'dokoba chugimikko ba mitamkoatchangani dongjawahani gimin Assam Legislature-ona lekka puonachi memberrangko seoke watatna nanga ine Bordoloi Committee kupatiaha.

15. **CHIBONGAGIPA** : Provincial aro Central Legislature-ona manderangko seoke watatna nang'a aro a'brini manderangsa ong'na nanggen ine Bordoloi Committee kupatiaha.

16. **CHIDOKGIPA** : A'brini manderangoni komibeoba Assam Cabinet-o A'brini A'dokrangni pal dongna nanga ine rak'en kupatiaha. A'brini M.L.A. rangoni ong'na man'ode saksa dingtangmancha A'brini jatrangko nirokgipa Minister dongna nang'a ineba janapkuaha. "A'brini Minister-na dingtangmancha bilko jakalna man'ani niamkoba donna nang'a. Governor-na agane on'ani bidingrangoba changgipa jakaltogipa ong'na man'ode nama ine chingade chanchia."

17. **CHISNIGIPA** : Development-ni kamrangko somoi gita nirokna manna gita Governor, Commission-ko rakkina nanga ine mesokaha.

18. **CHICHETGIPA** : Mikir Hills-na agre sima a'arirangko daktajani ba saltajani dabianiko Bordoloi Committee ra'chakjaha. Indiba Mikir

Hills-ni sima arirangko saltaianikode rachakaha.

19. **CHISKUGIPA** : Bonkame, Non-tribalrang Provincial aro Central Legislature-na election-o chakatna manjawa ine Bordoloi Committee kupatiaha. District Council election-o Non-Tribal-rang chakatna man'gen.

9 - GIPA JA' PANG KATTA

JAKGITEL INDIANI SKANGGIPA GENERAL ELECTION 1952 BILSIO ONG'AHA

Indiani Constitution-o don'gimin Ain gita jakgitelni skanggipa General Election-ko 1952 bilsio ong'ataha.

1. Tura Constituency.
2. Dainadubi Constituency,
3. Baghmara Constituency
4. Phulbari Constituency

Election ong'on ia Constituency ge 4-on Garo National Council candidate-rangko don'e susaaniko dakaha.

1. **Tura Constituency** : Ia Constituency-o Garo National Councilni candidate Emerson Ch. Momin aro Independent candidate sakgniara Noho B. Sangma aro Jenden Ch. Marak. Emerson Ch. Momin chegipa ong'aha.
2. **Dainadubi Constituency** : Ia Constituency-o chakatgiparang sakgitam-oni G.N.C.-ni candidate Aaron N. Sangma jean 1945 election-o Independent Candidate ong'e chakaton uni security deposit ka'gipa tangkako manpilgija amako manahachim, ia 1952 bilsio GNC-ni ticket-o chakate unbaksa susagipa sakgni candidate-rang Nallindro N. Sangma aro Prabath R. Sangmako bang'a vote-rangchi amate chegipa ong'aha.
3. **Baghmara Constituency** : Ia Constituency-o G.N.C.-ni candidate Herrison W. Momin unbaksa susagipa darangba dongjani gimin election-ko ong'atna nanggija M.L.A. ong'aha.
4. **Phulbari Constituency** : Ia Constituency-o susagipa sak 3 aro uamangoni Emonsing M. Sangma jean 1946 bilsini election-o amako man'ahachim, ia 1952 bilsio Independent candidate ong'e chakataion chegipa ong'aha. Iano Phukan Sangma jean 1945 bilsiode GNC-ni candidate ong'e chakaton amako man'aha. Brownson W. Momin-ba Independent candidate ong'e chakaton amako man'aha.

ASSAM LEGISLATIVE ASSEMBLY-NI GNIGIPA GENERAL ELECTION 1957 BILSIO ONG'AHA. UN BILSIO ELECTION-O SUSAE MANGIPA A'CHIK (GARO) M.L.A-RANG.

1957 bilsiode Separate Hills State-na tikelani namen tarakna a'bachengaha. ua salrango Garo National Council-ba Eastern India Tribal Union baksa bakrimpae Garo Hills-ni gebri Constituencyrango susagipa candidate-rangko seoke chakatataha. ia gebri Constituency-rango susagipa manderang saksku dongachim. A'brini manderangna dingtang gital State-ko nangama nangja ? Ia susaani japangko done susaaniko dakaha. Garo Hills-o G.N.C. kotokna agre dingtang State-ko nangja ingipa ja'pang kattako ra'e Congress aro gipin candidate-rang susaaniko dakaha.

PHULBARI CONSTITUENCY :

Ia Phulbari Constituency GNC Party-na bu'su ong'achim. Maina ia constituency-o donggipa manderang on-tribal manderang bangbatachim. Unı gimin A'chikrangni gisepo jagangipa aro ku'rakgipa Simsag chjolni mande, jean Separate Hills State-ko dabidilenggipa Capt. Williamson A. Sangma-ko Garo National Council-ni candidate Capt. Sangma aro uko susagipa Emonsing M. Sangma sakgnisan bilsı bildak dakpile krenggrıkaha. Assam-nı daldalgipa Congress dilgiparangba re'bae Emonsing M. Sangma-ko ku'ba rang'ba aro tangka paisachi dakchakgrımaha. Emonsing Sangma ua biapo 1945 bilsio Independent Candidate ong'e chakaton amako man'aha. Indiba 1952 bilsio independent candidate ong'e chakataion che'aha. Jeba ong'bo ia 1957 bilsini election-ode Emonsing Sangma, Congress candidate-ko Capt. Sangma GNC-nı candidate 170 vote-rangchi amataha.

TURA CONSTITENCY : Mody K. Marak, Garo National Council-ni candidate Congress-ni candidate Niho B. Sangma-ko banga vote-rangchi amataha.

DAINADUBI CONSTITUENCY :

Ia Constituency-o Herrison W. Momin G.N.C.-ni candidate, Aaron N. Sangma Congress-ni candidate-ko aro Nallindro N. Sangma independent candidate-ko banga vote-rangchi amataha. Indakesa gisik ra'atna man'a, Aaron N. Sangma 1945 election-o independent candidate dake chakataha indiba 1952 bilsiode G.N.C. ong'e chakatskaaha. Indiba Nallindro N. Sangma 1952 aro 1957 changgni election-rangon independent candidate ong'e chakataiachim.

BAGHAMRA CONSTITUENCY :

Ia Constituency-o Capt. W.A. Sangma-ni gumetang Emerson Ch. Momin GNC-ni candidate ong'e chakataha. Uan 1952 election-o Turao GNC-ni candidate ong'e chakate manahachim. 1945 bilsini electiono che'gipa Muniram R. Marak jekon Emerson Ch. Momin amataha, ua 1952 election-de chakatjaha aro 1957 bilsiode independent candidate dake chakatskaaha.

ASSAM LEGISLATIVE ASSEMBLY -NI GITAMGIPA GENERAL ELECTION 1962 BILSIO ONG'AHA.

Assam Legislative Assembly changgitamgipa General Election 1962 bilsio ong'ahaon APHLC (All Party Hill Leaders Conference) party-ko dakmanaha. Capt. W.A. Sangma Party-ni kotokko dilna changgipa ine mising minggamaniko manengachim. Hill State-na krenge remikkangani namen bilakgenchimoba Phulbari Constituency-de remikkangani namen bilakgenchimoba Phulbari Constituencyde APHLC-na rakgipa bu'su ong'achim.

1. PHULBARI CONSTITUENCY :

Ia Constituency-o saksa bilakgipa wa'sagipa, Assam-ni bang'a ku'sikrangko aganna mangipa, jean iana skang Indian National Congress-ni mandechim, ua GNC Party-ona re'bae APHLC-ni candidate ong'e Phulbari Constituency-o chakatna donatako man'gipa uan Brownson W. Momin ong'achim. Capt. W.A. Sangma ua apsan biapo chakatakuna skoba, uko uni atchiram songtang Baghmara Constituency-ona watatskaaha. GNC-ni Candidate Brownson W. Momin baksa susagipa sakgni dongachim. Saksa Congress-ni candidate Emonsing M. Sangma aro sakgipin independent candidate Hemson M. Marak ong'achim. Iano Assam-ni daldalgipa Congress Party-ni dilgiparang tangka paisachi aro kamchi antangtangni Congress candidate Emonsing M. Sangma-na dakchakgrimaha indake ian Garo Hills-o Congress Party chechenggipa ong'aha.

2. BAGHMARA CONSTITUENCY :

Ia Constituency-o Capt. Williamson A. Sangma, G.N.C.-ni candidate unbaksa susagipa independent candidate Nitarson Ch Marakko (mingkalaka 'Bodot') bangbea vote rangchi amchepataha.

3. TURA CONSTITUENCY :

Ia Constituency-o APHLC (GNC) Emerson Ch. Momin-ko candidate on'aha. Unbaksa susagipa Jenden Ch. Marak aro Noho B. Sangma

sakgnian independent candidate-rang ong'achim. Emerson Ch. Momun uamangko banga vote-rangchi amataha.

4. **DAINADUBI CONSTITUENCY :**

Dainadubi Constituency-na APHLC (GNC) Nallindro N. Sangma-ko candidate on'aha aro unbaksa chakatsusagipa Aaron N. Sangma aro Jonathan B. Sangma independent candidate-rangko banga vote-rangchi amataha

1962-ni election-o APHLC Separate Hills State aro Scottish Patern of Administration-ni gisepo susaaniko don'e chakataha. Dingtang A'brini State-ko nang'a ine dabianiko mangrakbatatna gita, State Assembly-oniko APHLC antangni MLA-rangko ong'katchina (Resign) rakgipa geetaniko dakaha. Ia APHLC Council of Action-ni dalgipa okamaniko Garo Hills-ni MLA-rang Emerson Ch. Momin MLA aro Nallindro N. Sangma MLA sakgnian Assam Legislative Assembly-oni ong'katna raken jechakaha. Capt. W.A. Sangma saksan party-ni geeta gita okamaniko knachake MLA ongaoniko kam wataha (resigned ka'aha). 1963 bilsio Baghmara Constituency-o By-election-ko ong'ataha. APHLC (GNC) Capt. Sangmako candidate dontaiaha. Unbaksa susagipa Congress-ni candidate Dingimin Nengminza-ko bangbea vote-rangchi amat'e MLA ong'taiaha. 1962 election-o ritchaprako sak 60 san puonachim indiba 1963 By-election-ode ritchaprako sak 64 dake leka puonaha.

ASSAM LEGISLATIVE ASSEMBLY-NI CHANG BRIGIPA ELECTION 1967 BLSIO ONG'AHA.

Garo Hills-oni A'chikrangoni Assam Assembly-na Bonkamgipa chakatani ong'aha

1. **BAGHMARA CONSTITUENCY :**

Capt. W.A. Sangma APHLC-ni Candidate ong'e chakate changgitamna kingking chegipa ong'achim ukon daobatai Baghmara Constituency-ni candidate dake watataha. Aro uko Congress-ni candidate Singjan Dopo Sangma aro Communist Party of India-ni candidate Rodonsing Marakko Capt. Sangma bang bea vote-rangko amataha.

2. **DAINADUBI CONSTITUENCY :**

Ia Constituency-o sakgitam candidate-rang susaaha. Aaron N. Sangma aro Nallindro N. Sangma sakgnian ia apsan biapo 1952, 1957 aro 1962 election-o chakataha arobatai 1967 election-oba chakataiaha. Nallingo N. Sangma 1962 election-o APHLC-ni candidate ong'e chakate MLA ong'aha indiba APHLC Party una ia chango ticket-ko on'jaha.

Maina uaba APHLC Party-ni geetgimin gita Assam Legislative Assembly-oni 1962 bilsio onkatjaha (resigned ka'jaha). Iano APHLC-ni candidate Mody K. Marak independent candidate sakgni Aaron N. Sangma aro Nallindro N. Sangma-ko banga vote-rangchi amataha. Uamang sakgnian security deposit ka'gipa tangkarangko manpiljaha.

3. TURA CONSTITUENCY :

1967 bilsio Tura Constituency-o sakgitam susagipa candidate-rang donga. APHLC (GNC) party-ni candidate Grohonsing A. Marak, Congress party-ni candidate Emerson Ch. Momin aro A'chik A'songna Chelchakgipa Kotok-ni candidate Jenden Ch. Marak ong'achim. Ia election-o Grohonsing A. Marak (APHLC)-ni candidate che'gipa ong'aha. Iakoba indakeba gisik ra'atkubone maina Emerson Ch. Momin jean APHLC-ni ticketo chakate changitamna kingking MLA ong'ahachim. 1952, 1957 aro 1962 indiba 1967 bilsio una ticket-ko APHLC (GNC) on'jahani a'selara 1962 bilsio APHLC Council of Action-ni Assam Legislative Assembly-oni ong'katchina (resign) geetaniko jechakani aselsa onghachim.

4. PHULBARI CONSTITUENCY :

Ia Phulbari Constituency-o sak 4 candidate-rang election-o susaaniko dakaha. APHLC (GNC)-ni candidate Brownson W. Momin Congress-ni candidate Emonsing M. Sangma aro Independent-rang sakgni dongachim. Ia election-o Brownson W. Momin 1962 election-o chegipa Emonsing M. Sangma-ko aro gipin susagiparangko amataha. 1967 bilsini election-o Garo National Council APHLC-ni bakrimpagipa ong'e election-o susaon 1957 bilsini election-o Eastern India Tribal Union baksa bakrime election-o chakata gita apsan Garo Hills-ni Constituency gebrikon APHLC (GNC) Party-an amtokaha. Ia bilsiosa Communist Party of India Garo Hills-ona sakgni candidate-rangko watatchengaha. Uamang GNC baksa election-o susana amgijasan ongaigija uamangni security deposit tangkarang-koba manpiljaha. Indiba Emonsing M. Sangma 1952 aro 1962 election-rango GNC-ko amat'e Garo Hills-o aro Assam-o Mingsinganiko man'aha.

10 - GIPA JA' PANG KATTA

GARO HILLS AUTONOMOUS DISTRICT COUNCIL
1952 BILSIO ATCHIAHA

Indian Constitution-ni 6-Gipa Schedule-o dongimin gita Garo Hills District Council-ni skanggipa election-ko 1952 bilsio ong'ataha. May-ni 3 - tariko Capt. Williamson A. Sangma-ko Chief Executive Member-na ku'cholsan seokaha. Ua antangni namnikgipa, kam ka'na cholinasusu dake nikkiga member-rangko Executive Member-na sakgniko seokaha, uamang Mody K. Marak aro Herrison W. Momin.

Skanggipa bilsio 5 matchotani jamanoba, 1957 bilsini May-ni 3 gipa tariko Capt. W.A. Sangma-kon Chief Executive Member-na seoktaiaha. Aro uaba antangko dakchak-na Executive member-na apsanon seoktaiaha.

1958 bilsio Eastern India Tribal Union aro Congress baksa meligrikaniko dakahaon, Chaliha Ministry-ni Cabinet-ona Capt. Sangma-ko Minister-na ra'angaha. Ua salrangon Herrison W. Momin Executive Member saksa siaha. Chief Executive Member-na Mody K. Marakko Capt. Sangmani pal seokaha. Mody K. Marak antangko dakchakna sigipani palo Emerson Ch. Momin-ko aro sakgipin Simison R. Sangma-ko seokaha. Ua salrango MDC--rangni gisepoba Executive member-na adita seksekgiparang dongani gimin Mohon Sangma aro Lohindro Sangma-ko Deputy Executive member-rang dakaha.

Capt. W. Sangma, Chaliha Ministry-oni Assamese ku'sikko As-sam-ni Official ku'sik dake Ain-chi ragatahani gimin Minister-ni kamko wataha. Ua Garo Hills-ona rebapilon una Mody K. Marak, Chief Executive Member-ni kamko wate on'soahachim indiba ua uko ra'na jechakaha. Mody K. Marak 1964 bilsiona kingking Chief Executive Member ong'kuaha. 1964 bilsio district Council-ni General Election ongtai on Capt. Sangma May 1-gipa tariko Chief Executive Member-na kucholsan seokako mantaiaha. Ua Executive Member sakgni Karnesh R. Marak aro Lohindro N. Sangma-ko seokaha, aroba Deputy Executive Member-na Grohonsing A. Marak aro Albinston M. Sangma-ko seokaha.

ASSAM-NI AUTONOMOU DISTRICT COUNCILNI EXECUTIVE MEMBER RANGKO SEOKANI NIAMRANG.

Assam Autonomous District Council-ni Rules ba Niamrango dongiminara Cabinet System of Government gita ong'a. Autonomous district geantio Executive Committee donggen. Uko dilna Chief Executive Member saksa donggen aro uko dakchakna gita Executive Member sakgni donggen. Chairman aro Deputy Chairman-rangko MDC-rang Council meetingo seokgen. Uamangde Council-ni kamrangko Executive Member-rang baksa apsan kajawa. Chief Executive Member siode ba kamko watode Executive Member-rangba dongjawa. Governor jekoba Chief Executive Member donatna man'a, jena king king Council-ni ruling Party gitalko seoktaikujana kingking ua kamko ka'sogen. Executive Member-rang District Council-ko chalaiani chugimik bilko man'a. Executive Committee-ko pegalani ongon ghonta 24-ni gispeo songpiltaina manna nanggen Uko dakna manjaode Governor jekoba Chief Executive Member dake MDC-rangoniko donatna bil donga.

District Councilni bilsirangko bakroatna gita Council-o pasikani mingsa resolution-ko ragate 1964 oni 1972 bilsiona radoataha.

Ua somoion Capt. W.A. Sangma gital Autonomous State Meghalaya-ni Chief Minister ong'aha. Daobatai changsa Mody K. Marak Garo Hills district Council-ni Chief Executive Member ongtaiaha. Ua somoio Karnesh R. Marak-ko Lok Sabha-ni M.P. candidate-na APHLC donsoahani gimin Lohindro N. Sangma aro Albinston Sangmako Executive Member-rang dake ra'aha. Grohonsing A. Marak aro Bhinsing R. Marakko Deputy Executive Memberrang dake donsaka. Meghalaya Provincial Autonomous State-ni Legislative Assembly-ni Deputy Speaker-na Grohonsing A. Marakko seokahani gimin, unipalo Levison K. Marakko Deputy Executive Member donsaka.

GARO HILLS DISTRICT COUNCIL-NI ITIHAAS

1952 bilsini Chairman-ko seokna May-ni 2-gipa salo Garo Hills District Council Hall-o tom'aha. Rangam G. Momin-ko kucholsan Council-ni Chairman-na seokaha. Salgipino Mohon Sangmako Deputy Chairman-na seokaha. Bilsibonga matchotmano 1957 bilsini May-ni 1-gipa salo Council-ni Chairman-ko seoktaiani ongaha. Unoba Rangam G. Mominkon Chairman-na seoktaiaha. Ajao inmanani mingsako iano nika, chongmotan Rangam G. Mominko changgni-na king king seokaniko

dakoba saksaba una kusi ong'chakani kattako chongmotan felicitatation ba congratulation kattarangko aganjaha. Batesa ua antangsa indake aganskaha, "Nasimang angko changgnina kingking seokahanina da'alo anga ia House-ni pilak MDC-rangko mitelbeaha." Skang chango gitan Mohon Sangmaba Deputy Chairmana seokako mantaiaha. Ukoba darangba mitelpajaha aro kusi ongchakani kattarangko aganpajaha.

Indiba Garo Hills District Council-ni chief Executive Member, Capt. W.A. Sangma, 1958 bilsio Chaliha Cabinet-o Minister ong'aha, unon Executive Committee-ko gital dake a'bachengtaina nangaha. Mody K. Marak Chief Executive Member ongskaaha aro Mohon Sangma-ko Deputy Chairman kamoniko ra'ange Executive Member dakskaaha. Uni palo Robert Momin-ko Deputy Chairman donskaaha.

Chinese-rangni Indiaona napdrabani aselo, Garo Hills District Council Election 1962 bilsio ong'na manjaha. Changgitamgipa Garo Hills District Council-ni Chairman-na ku'cholsan seokaha. 1964 bilsini, April 29-gipa salo Mody K. Marakko Council-ni Chairman-na ku'cholsan seokaha. 1964 bilsini, May-ni 1-gipa salo Brownson W. Momin-ko Deputy Chairman-na ku'cholsan seokaha. Autonomous Meghalaya State-ko manahanigimin, Capt. Sangma gital State-ko chalaina gita Chief Minister-na reangna nangaha. Uni gimin Mody K. Marak Chairman-ni kamko wate Chief Executive Member ongrikskaaha. Brown W. Momin-ko Chairman donskae aro uni palo Marson T. Sangma-ko Deputy Chairman dake donskaaha. Uamang indake 1972 bilsio Meghalaya State-ni election ong'kujana kingking dongangaha.

Changbrigipa Election ongtai on gital Council-ko chalaina gita Lohindro N. Sangma-ko Council-ni Chairman-na seokaha aro Bipin G. Momin-ko Deputy Chairman-na seokaha. 1952 bilsioni 1976 bilsiona Chairman-ni kamko sak 4 MDC-rangsan jako ra'aha.

1972 BILSIO GARO HILLS DISTRICT COUNCILNI ELECTION.

Changbrigipa Garo Hills District Council-ni Election-ko 1969 bilsio ong'atani ong'achim indiba Meghalaya State-ko mannasianio adita engtogijanirangni a'sel bilsio 3-na ra'doatna nangaha. 1972 bilsini General Election-o dam 27 biaprango election-ko ong'ate, sak 3 Member-rangkode Governor-chi seokanniko dakaha. Ia chango GNC, APHLC baksa bakrime mingsa niamko Dengnakpara Center-o bilsini GNC tombimonganio, MDC chakatgipa MLA ba MP-na chakatna manjawa

ine Party pass ka'aha. Ia dongimin niamko Party-ni dalgipa mande sakgn¹ Brownson W. Momin aro Mohon Sangma pe'e aro Party-oni ong'kate election chakatsusaon GNC Party-chi amako manaha. Ia chango Constituency ge 27 biaprango susaaniko dakaha, sak 5-de susagijan MDC ong'aha maina ua biaprango sakprakna agre gipin susagipa dongjachim. Dam 16 Constituency-rango GNC kotok che'aha. Aro Indian National Congress-ba sakgitam che'aha. Ia chango sak 64 candidaterang chakataha, biap damsaoode sak 5 candidate-rang chakatachim, biap dambongaode damprako sak 4 ong'pile chakataha aro biap dam 6-ode damprako sak 3 dake chakataha. Biap dam 10 ode damprako sak 2 dake chakataha. Susagiparangoni sak 8-de security deposit ka'gipa tangkako manpiljaha.

Mongsonggipa dilgiparangoni amako mangiparangara party-ni dongimin niamko pegipa Brownson W. Momin aro Mogon Sangma ong'achim. Chakatgiparangoni sak 9-de banggija vote-rangchisa che'aha. Mody K. Marak aro Lohindro N. Sangma sakgnian chang 4 na kingking joljolan MDC ong'aha. Aroba sakgnide chang 3 joljol MDC ong'aha. Sak 4-de joljol chang 2 MDC ong'aha.

Banga changon Garo Hills Council-na chakatna A'chik mechikrang gisiko nangjaha. 1964 election-o, mechik saksa Eunice R. Marak chakataha indiba chejaha. Un bilsio Bisadini A. Sangma-ko sason ka'gipa dolchi seoke (nominate) Council MDC-na Governorni namnikaniko man'e ra'baaha. 1972 election-o saksamangmang A'chik mechik chakataha uan Evangeline D. Shira ongachim indiba chegipa ong'na manjaha.

DISTRICT COUNCIL ELECTION

Pilak District Council-ni Election-rangko sandie niani gitade ia a'dokni manderang sasonko uiani aro leka puonani bidingode bringimin ong'tokaha gita nika. Pilak District Council-ni Election-rangon nam'e aro tom'tome ong'atna manahachim. Manderang leka puonani kamrangko niamni ningo pangchake dakachim. uasan ong'aigija Disitrikt Council-ko sason ka'na manderang seokaniko dakon, namedake sandichengesa vote-ko ona'chim.

GARO HILLS

Garo Hills District Council-ni skanggipa Election-ko 1952 bilsio ong'ataha. Ua bilsio Constituency dam 18 dongachim. Dam 6-ode susagipa sakpraksan ong'ani gimin election ong'gijan MDC ong'na manahachim. Indiba dam 12 Constituencyrangode chakatsusagipa can-

didate-rang dongachim, dam 4 Constituency-rango damprako sak 4 dake chakatachim, damsda biapode sak 3 chakatachim, dam 9 biaprango damprako sak 2 dake chakatachim. chakatgipa gimik sak 37 ong'achim. Garo National Council pilak biaprangon chakatgiparango dontokachim. Aro dam 18 oniko dam 15 biaprango GNC che'gipa ong'aha. Capt. W.A. Sangma-ko sak 3 manderang susagrikaha aro sak 3-an uamangni security deposit ka'gipa tangkarango man'pilgija amako man'aha. Skanggipa Garo Hills District Council-o A'chik me'chikrang sak 2 chakataha. Sakgnioni saksa Surjomoti W. Momin independent candidate ong'e chakate chegipa ong'aha. Maina un unbaksa susagipa Joges Marakko 614 vote-rangchi amataha. Un bilsio Ronesory Marakko District Council-ni Ruling Party-ni ku'patiani gita Governor nominationko ra'chakaha.

1957 BILSIO GARO HILLS DISTRICT COUNCILNI ELECTION

1957 bilsio Garo Hills District Council-ni 2-gipa election ong'aha. Ia election sak 22 memberrango seokani ong'achim aro sak 2 kode Governor-chi seokaniko dakaha. Susagpa candidate-rangba 1952 bilsini election-na bate bangbatachim aro biap damgniode sakpraksan chakatani gimin leka puona grian MDC ong'na cholko manaha. Gipin dam 20 biaprango sak 47 manderang chakatsusaaha. Biap dam 7 ode damprako sak 3 dake chakataha, indiba dam 13 ode damprako sak 2 prak dake chakataha. A'chik me'chik ianpako saksa mangmang chakataha. Sujomoti W. Momin, jean 1952 bilsio independent candidate ong'e chakate manahachim. Ua ianpako sakgni candidate-rang baksa susagrikna nangaha. Ua 2,263 vote-rangoniko 1349 vote-rangko man'e election-o chegipa ong'taiaha.

Ia chango Capt. Sangma uni salmadrangna uni political bobil onggipa Emonsing Sangma baksa chakatgrikon Capt. Sangma king 1,534 vote-rangko man'aha aro Emonsing M. Sangma king 534 vote-rangko man'aha. Iano Capt. Sangma, Emonsing Sangma-ko amaha. Indiba Emonsing Sangma biap damgnio chakatani gimin damsaoode GNC-ni mandeko am'ate chegipa ong'aha. GNC-ni pilak chegipa member-rangan saksana agre bangbata vote-rangchi chetokaha. Chakatgiparangoni sak 6-de uamangni security deposit ka'gipa tangkarango manpiljaha. Sak 13-de changgnina joljol MDC ong'aha. Gnigipa Council electionode A'chik me'chik saksasan MDC ong'aha. Surjomoti W. Momin 1952 aro 1957 bilsini election-rango chakataha.

1964 BILSIO GARO HILLS DISTRICT COUNCILNI ELECTION

1964 bilsioaba dam 22 constituency-rango election ong'aha aro damgnioode Governor sakgniko nominate ka'aha. Ia chango sak 58 candidate-rang chakataha, dam 7 biaprango damprako sak 3 dake chakataha. Damsa biapode saksana agre chakatgipa dongjani gimin susagija MDC ong'aha. Dam 10 biaprangode damprako sak 2 dake susaaha. Chakatgiparangoni sak 4 de security deposit ka'gipa tangkako manpilgija am'ako man'aha. Chakatgiparangoni sak 7 de joljol changgitamna king king MDC ong'giparangchim. Ia changna Assam-ni Governor ruling party-ni kupatiani gita Bisadhini A. Sangma-ko nomiated MDC dakaha. Ia chango A'chik dilgiparangni gisepo am'a chagiparangde Emerson Momin, aro Nollindro N. Sangma ong'achim. 1962 bilsiode uamang sakgnian Assam Legislative Assembly-na G.N.C. ni ticketo chakate M.L.A. ong'ahachim. Unomitingo GNC party APHLC baksa bakrimachim. Uamang sakgni APHLC Council of Action-ni geeta gita Assamese ku'sikni a'sel Assam Assembly-oni ong'katchina geetaniko (resigned) jechakaha. Uni gimin uamangna APHLC District Council Election-o chakatna APHLC-ni ticketko on'jaha. Uni gimin manderang uamangna chongmotan Nollindro Sangma-na king 439 vote-rangko aro Aaron N. Sangma-na king 163 vote-rangkosan on'aiaha. Indake uamag sak 2 an security deposit ka'gipa tangkarangko man'piljaha.

GARO HILLS DISTRICT COUNCIL-NI NOMINATED MEMBER

1952 bilsio Garo Hills Autonomous District Council atchiaha. Councilko chalaina sak 24 ko seokaha. Sak 24-oni sak 10 ko election-chi seokaha aro sak 6 ko sason ka'gipa dolni ku'patiani gita Governor-chi seokaha. 1964 bilsio Garo Hills District Council-o sakgni member-rangoniko nominate ka'aha. Aro 1972 bilsio sak 30 member-rangoniko sak 3 ko nominate ka'aha.

Garo Hills District Council-o nomination-ni bidingo changsao adita golmal ongangaha. District Council-ni seokako mangipa member Singdon K. Sangma 1953 bilsini August jani 24 gipa tariko siaha, iani gimin Chief Executive member, Capt. Williamson A. Sangma, Henry W. Momin-ko ongjaode Jefferson Arengko sakgnioni saksako seokchina gita Council-ni pal Chief Executive Member Assam-ni Governor-na kupatianiko dakaha. Maina uamang sakgnian Resubelpara Community Block-ni Head Quarter manchaon donggiparang ong'achim. Adita salni

jamano Herrison W. Momin, MLA, Capt. Sangmana sakgipin mande Nondoram K. Sangma, L.P. School master ka'e pension mangipako kupatiskaaha. Uaba ua apsan songni mande ong'achim. Jamano ua apsan mandean sakgipin mande Sudhindro K. Marakko kupatitaiaha. Assam Government Sudhindro K. Marakko ra'chakna manjaha, maina uan M.E. School-ni Head Masterni kamko ka'engachim.

Capt. W.A. Sangma, Chief Executive Member Assam-ni Chief Minister, Bishunu Ram Medhi-na telegram-chi indake uiataha, je ua kamko watgen aro uko rachakna manode leka pora mangipa ong'ani gimin, council-ni kamo jakaltogenchim. Indake habi jabi ongmitingon Congress dolni memberrangba uamangni President Emonsing Sangmako recommend ka'e Chief Minister-na watatskaha. Assam-ko Congress Party sason ka'engani gimin, Chief Minister, Medhi-anCongress ong'ani gimin Emonsing M Sangma-ko Governor baksa agangrike nominated MDC dakataha.

SORKARIKO RIKPANA SIKGIPA A'CHIK ME'CHIKRANG

Jensalo Meghalaya Autonomous State-ko manmanahaon Resubelparani Josephin S. Momin Autonomous State-ni M.L.A. saksa ong'aha. 1972 bilsio Meghalaya chugimik State-ko manahaon, election-o chakate Percilina R. Marak me'chik-rangni gisepo M.L.A. manchengaha. 1975 bilsio Songsak (ST) by-election ong'on Mariam D. Shira by-election-o chakate M.L.A. ong'aha aroba ua 1978 bilsini electionoba chakate M.L.A. ong'taiaha.

Meghalaya State-ko manna skangan A'chik Me'chikrang sorkariko rikpana sike district election-rangoba chakatgiparang dong'aha. 1952 bilsio skanggipa Garo Hills District ongon Surjomoti W. Momin independent candidate ong'e susae M.D.C. ong'aha. Aro ua bilsio Assam-ni Governor District Council-ni kupatiani gita G.N.C.-ni member Ranewari Marakko nominated MDC dakaha. 1962 bilsio changgnigipa election ong'ani ongachim, indiba Chineserang bodil dake Indiani Salgro Salaram A'dokrang gita napdrabani gimin somoi gita ong'na manjaha. Indake 1964 bilsio District Council-ni Election ong'taion Eunice R. Marak saksa mangmang me'chik chakataiaha indiba chejaha. District Council-ko chalaina gita Garo National Council bangbata member-rangko man'e party-tangni mande Bisadhini A. Sangma-ko Council-ni nominated member chongmotan MDC dakaha.

1972 bilsini election-oba saksa mangmang me'chik chakataiaha uan Evangeline D. Shira ongachim indiba ua amako mantaiaha. Ia changoba Garo Hills District Council-ko chalaina gita GNC dolan bangbata member-rangko man'ahani gimin doltang GNC-ni me'chik sakgniko Governor-ni namnikaniko man'e Jangje Marak aro Allesori Momin-ko nominated M.D.C. dakaha. Indake Garo National Council reanggimin salrango jattangko dilna remikanganio bang'a duk aro champenganirangko manoba da'alona kingking kambe dotekme'e tangkuenga.

NORTH EASTERN AREAS (REORGANISATION) BILL, 1971.

North Eastern Areas (Reorganisation) Bill-ko seani 1971-ni October jao matchotaha. Ia Bill-ko 1971-ni December jao Parliament-ni Nok Gegnion, Lok Sabha aro Rajya Sabha-o pass ka'aha. Ia Ragatgimin Ain (Act) Meghalaya, Manipur aro Tripura-ko chu'gimik State dakasan ong'ajaha, indiba Mizo Hills-koba gesa Union Territory dakna cholko man'aha, jekon dao Mizoram State ine mingaha.

Meghalaya gesa chu'gimik State ong'aniko nokdonggana gita Prime Minister, Mrs Indira Gandhi 20-1-72 salo Shillongona re'baaha aro ia nokdongganiko ia changoShillongni Polo Ground-o 21-1-72 salo nokdongganiko dakaha. Unsalo Garo, Khasi aro Jaintia jatgitamni dakbewal chrokmes aniko dakmesokaha. Ia nokdongganiko nina Meghalaya-ni manderang bakgitamni baksa a'kitikoni chimongbatokaha aro Shillongo mamungsaloba indake mande bangako nikkujachim ina. Prime Minister-ko nikna aro uni ia gital Meghalaya State-na gamchatgipa ku'patianiko knana manderangni sikan ji'jaako nike aiao inmanpilahachim. Unsalo Kristian manderang indake beberaaha, "je jeko Isol an'tangna ka'sagiparangna daksoaha..." 1 Kor. 2:9.

Jekai Kristianrangni olakiani gitoba ringenga, "Niram rangsitgipan 'sikan' ji'jaako, Knatoa janggina namgipa 'nako" Hym No. 235 (Baptish Hym)"

Ua apsan salni waljatchio, tik somoi baro bajio, (12 Oclock Mid-night) Meghalaya gipin Indiani ningo donggipa State-rang gitam apsan chu'gimik bilko man'gipa gesa State ong'aha. Unon Raja Bhavan-o His Excellency the Governor, B.K. Nehru Hon'ble Speaker aro Hon'ble Minister-rangni ku'mikchetaniko dak'aha. Indake Prime Minister ua sinbegipa Shillongni waljatchio tom'tom dongpae ua kamko mikkim rasong

chaatbeaha. 1972, January 21 salo pilak gital Meghalaya-ni M.L.A.-rang State AssemblyHall-o ku'mikchetaniko dakaha. Ia aramrangni A'songko man'na gita gito indake chengonin Kristian Pagitchamrang ringsoa dongaha, "Saoba ka'donge dakgrikjok, bebena warachakbejok, Ua saoba na'anma, Ua saoba na'anma ?" Ia North-Eastern Areas (Reorganisation) Act, 1971 Ain-ko ra'gatanichi Meghalaya State bang'a namgnirangko mandapaha.

1. Meghalaya-ko chu'gimik State-ni gadangona ra'doaha. Indakesa Meghalaya Indiani gipin State-rang baksa apsan gadango dongaha.

2. Ra'gatgimin Ain-ni Section 5-ni gita Shillong songjinma gimikan Meghalaya-ni a'dokrang ong'aha. Don gimin sal aro tarik gita gesa State-ko dakgen, jekon mesokgimin a'dokrang baksa Meghalaya A'song onggen.

(a) Assam Reorganisation (Meghalaya) Act, 1969-ni Section 3-ni ningo Autonomous Meghalaya State-ko don'sogimin a'dokrang baksa dakaha, aro

(b) Jensalo Meghalaya Autonomous State ong'mitingo Shillong-ni Cantonment aro Municipality biaprangde Assam-ni ningo dongkuachim, daode uarangba Meghalaya State-ni ong'srangaha.

3. Meghalaya State-na Rajya Sabha-o saksa M.P. aro Lok Sabha-o sakgni M.P.-rangko on'aha.

4. Meghalaya Legislative Assembly-o sak 60 M.L.A.-rang donggen aro unoni seat ge 50 Schedule Tribes-rangna a'kanggimin (Reserved seats) ong'gen.

5. Meghalaya aro Assam gesa High Court-ko jakaldimna nanggen ine Ra'gatgimin Ain-o don'aha. Indioba, Guwahati High court-ni cheksi (branch) Shillong-o donna manna gita niarnkoba ragataha.

North East Reorganisation Act-ni ningo dingtang mancha Meghalaya-na Governor donggen ine janapa dongjani gimin bilsigninade Assam baksa apsan Governor-chi sason ka'aniko dakaha.

**MEGHALAYA STATEKO MAIKAI MAN'AHA
ALL PARTY HILL LEADERS' CONFERENCE;
UNI ATCHIANI ARO UNI KAMRANGNI BITE**

Bilsio 1947-o India jakgitel ong'aha. Jakgitel-ni dalbegipa salko maniani salo, Assam-ni premier, Gopinath Bordoloi hajalni hajal Assam-ni manderangni mikkango ku'ange ku'elbongbong aganaha, "ASSAMESE-RANGNI ASSAM" ian angni Government-ni gital miksonganiko paraka.

Iako knasoe Mahatma Gandhi aganprakataha, Assam Assamese-rangni ongode, Bengal Bengali-rangni ong'ode, Bihar Bihairangni ong'ode aro Punjab Pubjabi-rangni ongode indide Indiara sani ? (Then India belongs to whom ?) Unon darangba aganchakajaha.

Indiba Gopinath Bordoloi, Mahatma Gandhini indake ku'patianikoba minggija, batesa ua apsan bilsio Golaghat-o mamungba kenmangija agantaiaha, "Assamese-rangni Assam".

Iano indake chanchina man'a, maina Assam ine inode sasomni ningo donggipa a'song gimikko mangopachim, indiba Assamese ine inode Assamese ku'sikko agangipararasa ong'gen. Assam gimiko Assamese ku'sikko agangipa ritchaprako sak sotbongasan ong'achim. Aro State Re-organisation Commission-ni kupatiani gita State-ni manderang ritchaprako sak 70 apsan ku'sikko aganosa State-ni Official kusik dakna mangen, ine India Government-na ku'patiaha.

Ua salrangoni intalsa Assam a'kaweo donggipa Districtrangni manderang Assamese ku'sikko State gimikni ku'sik dakna nanga ine ningo ningode so'sojengjeng ong'na abachengahachim. Aroba kasne kasne Assam Government pilak Non-Assamese Schoolrango, mongsongbate Middle English School-rango Assamese ku'sikko optional language dake skichina geetaha.

Iani gimin Assam Government je A'chik songrango Assamese ku'sikko M.E. School-rango skianiko a'bachengaha uamangna banga grant-rangko on'achim. Aro kasne kasne M.E. Schoolrangosan ongaigija Lower Primary Garo Schoolrango iako abachengataha. Iani bidingo a'brini manderang namen warachakaniko dakaha. 1960 bilsio Horeswar Goswami aro Gaurisankar Bhattacharjee Assam Assembly-ni Budged Session ong'mitingo Assam-o, Assamese ku'sikko State gimikni ku'sik

dakna Ain-ko pass ka'na nanga ine dabiaha.

Iani bidingo Chief Minister, Bhimla Prasad Chaliha 1960 bilsini April-ni 3-gipa tariko kasinrimjrim aganchakaha. "Government iani bidingo mamung chanchianiko ra'kuja. Iani bidingo Assam Sahitya Sabha aro gipin dolrangni ia dabianiko Assam Government chonede ra'jaenga. haida iako dakode nangchongmotenggipa daldalgipa minggni kamrangko chusokatani onnggenkon. Skanggipa, State-o donggipa ramram amnderangba Government-ni segrik jotgrikanirangko altuaen uipana mangen.

Gnigipa, namgniara State-o donggipa banga dingtang dingtang jatni ku'sikrangko agannmikbranganirangko kasne kasne gimaatgen. Indiba mingsa Assamese ku'sikko ragatani bidingo indake onngen, bangbatgipa dol aro komigipa dolko (majority and minority) hisap ka'chengna nanggen. Iako indake dakon Assam Governmentna kenchakani donga. Uni gimin Assamese ku'sikko jakalna gita Assamese onggijagipa gipin jatrang namnikgenma ba namnikjawa ontisa sengkuna nanggen.' ine Chief Minster aganchakaha.

Chalihani indake aganchakaniko bildik bildak dake nikaha. Indaken sengnapgijagipa mitam Assamese dilgiparang Chaliha Bengali manderangko namnikbata ba mik kang nigipa ine matnangna a'bachengaha. Chalihani agananiara Assam A'kawe gimikko namnikjae jijaataha. Uni gimun, Assam Pradesh Committee, 1960 bilsini, April-ni 22-gipa tariko dalgipa mela'aniko dakaha. Aro Assamese ku'sikko, Assam State gimiko Official kusik dakna nang'a ine Chief Minister-ko geetaha.

Uni giminsa All Assam Hill Leaders's Conference-ko Turao 1960 bilsini, April 28-gipa salo tome dalgipa melaaniko dak'ate Chaliha-ni parakataniko kusi ong'e ra'chake APPCC-ni chanchie tik ka'giminko rak'en jegalaha. Conference Separate State-ko dabiskana nang'a ine kusaba tom'anio aganjaha. Indiba Indiani Constitution-ni 6-gipa Schedule-na bangbata bilrangko onna nanggen ine dabijolaha.

Dal'a sinjetaniko man'e, je ong'oba, Chief Minister, APCC-ni janapgipani bidingo, 1960-ni June-ni 3-gipa salo Assembly tomram noko Official language Bill-ko Kusikni Ainko dakna sesogiminko ra'baani onngen ine parakataha. Ia parakatanina Songdu A'kaweni manderang namen ka'a dokpile kusi ong'tokaha. Indiba Cachar-ni manderang una ka'o nangaha. Autonomous Hill District-ni manderangde jaja jiji

dakska. Ia Bill-ni (ain-ko dakna sesoani) gimin talataniko Cacharni aro A'brini dilgiparang Chief Minsiter-o singon, ongenggipa obostarangchi Bill-ko ra'bana nangtelahani gimin uko dontongna manjawaha, ine aganchakaha. Ian Assam-o meligrikijani kamrang a'bachengaha. Bakbakan iani a'selan "The All Party Hill Leaders' Conference' atchiaha.

ASSAMESE KU'SIKKO WARACHAKANI

Assam Government-ni indake ku'sikni bidingo tik ka'aniko uie Capt. W.A. Sangma namen gisiko dukko man'aha. Ua uni gimin Chaliha baksa agangrikon, Chaliha pilak A'brini dilgiparangko okme melaniko dakchina Sangma-ko geetaha. A'brini manderangni Assamese ku'sikko namnika ba namnikgijani report-ko Chaliha-na ong'gija dake saoba agane onna nangachim. Chongmotan bangbata a'brini dilgiparangan namnika ingipako Chalihana uiatna nanga ine chanchichipna man'aha, ongjaode Capt. Sangma-ko pilak party-rangko okam'e meetingko dakchina gita aganjawachim. Uni gimin Capt. Sangma uni Official nok Shillongo "GOOG WOOD" minggipa A'timbori nok 1960-ni July jani 6 aro 7-gipa salrango dalgipa A'brini kotokrangni tom'aniko ong'ataha, jeon Assam Government-ni Official Language-ni gimin Ain-ko pass ka'na bangki dongkuengachim. Ia skanggipa A'brini manderangni dilgiparangni tom'aniona sak 106 delegate-rang soktokaha, aro ua tom'aniko dilna gita Rev. B.M. Pughko kucholsan seokaha. Aro meetingni kam aro chanchianirang-ko serikna gita Prof M.N. Majaw aro Prof. R.S. LYNGDOH-ko seokaha. Salgipino delegate-rang North Cachar Hills-oni aro gipin A'brini A'dokrangoniba sokbadapaha. Ia Conference-ona Swatantra Party aro Congress party-ni delegaterangba bangen sok'aha. Tom'aniko a'bachengate aro uni miksonganiko rongtale talatmano mitam delegate-rangde namen ka'tong rongchu su'pile jegrikani ongpilaha. Bonkamao Assam Assembly-ona ra'bagipa Official Language Bill-ko (Ku'sikni Ain-ko) ku'cholsan warachake jegalna gita namnike jak songe ra'chakaha. Indiba Mikir Hills-ni M.L.A. Chatra Singh Teron indake janapaha. "Assamese ku'sikko Assamese manderangna ongchina indiba A'brini manderangna ua ain ba niam dongjachina". Unikode skango jekai uandake sasonde dongangkuchina (Status quo should be maintained) ine janapkuaha. Niam gri dakgipa A'kaweni manderangko mingsa chonikani pal gita kimkim miksoganiko pass ka'na nang'a ineba janapkuaha. Mezoram-oni saksa delegate ka'o nange indake aganaha, Garo-rang aro Khasi-rang ia dabienggipako watgaloba chinga Mezo-rang watgaljawa. Indiba danang ua mande salgipinode tom'aniona re'bajaha. Antisani

jamano uko Chaliha Cabinet Minister dakaha.

Ia dalgipa tom'anio pilak Political dolrangan dongani gimin "All Party Hill Leaders' Conference" ine bimungko donaha. Assamese ku'sikko State gimiko pilak Sorkarini Office-rango jakalnasigipa ain-ko ia kotokan rak'e warachakna miksongaha.

1. Assamese ku'sikko je somoioba State-ni ku'sik ine ain-chi pass ka'ahaon, uamang nokgipa ong'ani cholko man'e, pilak A'brini manderangko Assamese jatona pilangatani dogacholko ogen.
2. Assamese ku'sikko on'draani ong'ahaon A'brini manderang bang'a ku'sikni bojarangko ripena aro skie ra'na nanggan, jekai Hindi, Ma'ani ku'sik, English aro Assamese.
3. Jegita chelchakaniko donoba Assamese ku'sikni bidingon Sorkario je chona rema, peon chawkidar kamrang mangmangko ka'panaba ku'sikon ja'donggagnok.
4. Assamese ku'sikko ritchaprako sak 50 manderangsan agangipa dongaiani gimin, State gimiko jakalna ain-ko ra'baanio kakketgipa ong'ani gri.
5. Iako ain-chi ragatna skangan dingtang dingtang Assam-ni A'dokrango, mongsongbate Tribal Area-rango ku'sikni a'selan dakgrik su'grikanirang a'bachengaha.
6. Ain-chi ku'sikni gimin draanina A'song gipinni anpachakgipa a'jarang ong'ani gimin kenchakani gnang, jekai Chaina-rangni napdrabaani gita ong'na kenani donga.

Ia miksonganiko uie pilak nanga kamrangko ka'china ge'sa Council of Action-ko dakna gita Conference tik ka'aha. Mikir Hills-na agrede pilak Autonomous District-rangan uno member ong'tokaha. Skanggipa Council of Action-ko Shillong-ni "Mountain View" minggipa biapo 1960-ni July 8-gipa tariko tom'aha. Ua tom'anio Pu. A. Thanglura-ko Chairman dak'e seokaha aro S.D. Nichols-Roy-ko General Secretary dake seokaha. Ua tom'ani-o namgipa aro rongtalgipa dorkastoko (memorandum) Indiani President-na watataha.

Conference-ni 1960-ni, July 7-gipa salo pass ka'gimin kamni bidingo gita memorandum-ko seaha. Assamese ku'sikko on'drana aro Assamese pilangatna kenaniko ua memorandum segipao janapaha. Uan namen dal'a aro political party basegija apsan nangrimgimin ong'e, Salgro Salaram A'dokrango skanggipa politicalni Itihaas ong'aha. A'kawoo

donggipa Tribalrang jekai Boro, Katchari, Rava, Miri, Lalung, Dewri, Hajong, Koch aro gipinrangni giminde memorandum-o janapjaha.

Indiani Constitution-ni 8-gipa Schedule-o segipa ming 14 ku'sikrangoni Assamese mingsa ong'oba Assamese manderang Assam State-o ritchaprako sak 70 (70 per cent) ongjachim. Iani bidingo 'State Reorganisation Commission' indake ku'rachakaha je" Assam State-o donggipa Assamese-rang ritchaprako sak sotsni ong'jachim". Uni gimin bonchote memorandum-o janapaha, "A'brini manderang mamungsaloba Assamese ku'sikko skjawa aro ra'chakjawa."

1960 bilsini, August jani 21 tariko APHLC-ni dilgiparang Assamese ku'sikni bidngo 'Parliamentary delegation' ko grongaha. APHLC-ni dilgiaprang namen rongtale 'Parliamentary delegation'-na aganaha, je uamang Assamese ku'sikko State-ni ku'sik dakako ra'chakjawa.

12 - GIPA JA' PNG KATTA

ASSAM-O SORKARIKO DAKANI

1874 bilsioni 1957 bilsiona kingking Indiani Salgro Salaram A'brini jatrangni gispeo Garo Hills Districtni A'chik Minister ongkipa Assam Sorkario dongjachim. Indiba Khasi Jaintia Hills District-ni Khasi mande saksa Rev. J.J.M. Nichols-Roy-ko Sio John Kerr Assam-ni Governor, 1927 bilsio Minister songaha.

1935 bilsio India sorkarini ragatgimin Ain gita Assam Legislative Assembly-na member-rangko seokna 1937 bisio election-ko ongataha.

Skanggipa Sa'adulla Ministry 1937-ni April-ni 1-gipa salo Sorkariko rikna kumikchet aniko dakaha. Rev. J.J.M. Nichols-Roy-koba Co-operative-ni Minister dakaha. Indiba Sa'adulla Ministry 1938 bilsini February 5-gipa salo be'aha.

Gnigipa Sa'adulla Ministry-ko 1938 ni February 6 tarikon songtaiaha. Indiba ja 8 ni jamano be'aha. Uni jamano Bordoloi Ministry 1938 ni September 20 tariko sorkariko rikna skanggipa ku'mikchetaniko dakaha. A'gilsak gimikni Gnigipa Dalgipa Dakgrikani a'bachengahani gimin, Congress High Command Bordoloi Sorkariko dontongataha.

Gitamgipa Sa'adulla Ministry ua apsan salo ku'mikchettaiaha. 1941 bilsini, December 25, salo Sa'adulla Minsitry be'taiaha. Unon, In-

dia Sorkarini 1935 bilsio ragatgimin Ain-ni Section 93-ni gita province-ko sason ka'an gita Governor antang jako ra'na nangaha. Governor-ni sason 1942-ni August jaona kingking ong'aha. Changbrigipa, Sa. adulla Ministry-ko apsan bilsion songtaiaha. Indiba 1945-ni March-ni 23 salo Sa adulla Ministry kamko wataiani ong'aha (resigned). Indiba Sa'adulla Ministry Opposition Party baksa meligrikaniko dake salgipino changbongagipa Sa'adulla Ministry ku'mikchetaniko daktaiaha. Ia chango Sa'adulla Ministry a'brini district-rangni M.L.A. saksakoba Minister-na rajahachim. Ia bongagipa Sa'adulla Ministry 1946 bilsini September 11 salona sason ka'aha, maina Sylehet East Pakistan baksa chanchapako mangnok ine rongtale uisoahachim.

Gnigipa Bordoloi Ministry-ko 1946 bilsini December 11 salo songtaiaha. Maina agangimin gita Sylhet-ko East Pakistanchi ra'angnok ine namen uisrangaha. Ia chango Gopinath Bordoloi Rev. Nichols-Royko uni Ministry-o ra'na paha. Ia gnigipa Bordoloi Sorkari Gital Indiani constitution-ko ragatani abachenggipa ongahani gimin, Bordoloi Minsitry kamko wataha (resigned).

Indiani Constitution-o dongimin ain gita skanggipa Bordoloi Ministry 1950 ni January 26 tariko kumikchetaniko dakaha, indiba apsan bilsini August-ni 6-gipa salo Bordoloi Ministry-ko dontongataha. Uni jamano Congress Parliamentary Party Bishunu Ram Medhiko dikdiksana Sorkarko chalaichina gita August-ni 9, 1950 salo seokaha.

Indiani Constitution gita jakgitel Indiani skanggipa General Election ong'on, Medhi gnigipa chang Chief Minsiter ong'e Government-ko 1952 bilsini February 25 salo song'aha. Ia bilsirango a'brini MLA rangoni sawarangko Assam-ni Minister dakaha kamaomesokenga. Rev. J.J.M. Nichols-Roy, Miss Mavis Dunn Lyngdoh, sakgnian Khasi Hills district-oni ong'achim. P.U. Saprawnga ian Lushai Hills district-oni, Jay Badra Hagjer ian North Cachar Hills-oni aro Khelhouse Sema ian Naga Hills-ni M.L.A. ongachim.

Indiba Garo Hills-ni M.L.A. rangoniko darangkoba Minister ua salrangona kingking dakjaha. jamano B.R. Medhi-ko Congress High Command maikoba pasike Medhi-ko Governor dake Madras-ona watataha.

1957 bilsini December 28 salo Bimla Prasad Chaliha Assam Assembly-ni M.L.A. ongkujaoba, Assam-ni Chief Minister-na seokako man'e ku'mikchetaniko dakaha. Chief Minister, Chaliha, Chetra Singh

Teron-ko Minister-oniko ragalaha, maina ua Garo, Khasi aro Mizo indakgipa dalgipa jatrangoni ongjani gimin matnanganiko manna kenchakaha.

Eastern India Tribal Union-ni dilgiparang Home Minister, Pandit Pant aro Prime Minister Jawaharlal Nehru-ko gronge EITU-ni M.L.A. rangoniko Chaliha Ministry-o ra'pachina molmolaniko dak'aha. Indake Capt. Sangma-ko Chaliha Ministry-o Cabinet Minister dakaha. Ian 1958 bilsio ongachim. Indiba bilsio gnini jamano Assamese kusikko Assam gimikni Official Language chognmmotan office-ni pilak kamrangan Assamese kusikkosa jakalna niamchi ragatahani gimin, aro ragatgimin ain a'brini manderangna manjawa ine nike minister kamoni ong'kataha.

Chaliha-ni gnigipa Ministry 1962 bilsini March-ni 16 tariko songtaiahaon, Garo Hills-oniko Congress-ni M.L.A. saksa mangmang ongahani gimin Emonsing M. Sangmako, Minister of State dakaha.

Indiba 1967 bilsio Garo, Khasi district gegnion APHLC election-o amtokahani gimin Chaliha Ministryo Minister dongjaha.

Bonkamao Emonsing Sangma-ko Rajya Sabha-ni member dake Assam Government watataha.

13 - GIPA JA' PANG KATTA

3-GIPA CHANG ALL PARTY HILL LEADERS' CONFERENCE, 1960 BILSIO HAFLONG SONGJINMAO TOM'AHA.

Ia changgittamgipa APHLC Haflong Zillao, November-ni 16,17,18-gipa salrango tom'aha. Tom'aniko dilna Jai Bhadra Hagjer-ko Chairman song'aha. Ia meetingo A'brini manderangna dingtang Eastern Frontier State ine minge ge'sa gital State-ko dakchina gita APHLC India Sorkario dal'a dabaniko dakna tik ka'aha. Ia state-o Assam-ni Tribal A'dokrang, NEFA, Shillong-ni Municipality aro Cantonment biaprangko man'gopgen. Nangchapgipa Tribal A'dokrang baksa Tripura aro Manipur-ni Tribalrangni donggipa biaprangkoba manchapgen.

Janapgimin State-na daksogimin constitution (Niam)-o don'gimin gita ia meetingo indake sesoe niaha je, State-o Legislative Assembly donggen, Governor donggen aro sak 60 M.L.A.-rangko Constituency-rangko dake electionchi seokgen. Autonomous District geprako Parliament-ni Member sakprak donggen, NEFA-oniko sak 2 M.P.-rangko

seokgen, aro Rajya Sabha sak 3 M.P.-rangko State gimikoniko seokgen ine namnike jak song'e ra'chakaha.

Ra'gatgimin Constitution-oba Sixth Schedule dongangkugen, indiba District Council-na bangbata bilko on'na man'na gita adita mitamrangko jujae namdapate sekuna nanggen (amendment).

Janapgimin State-o Governor, Council of Ministers, gesa High Court, gesa University aro Public Service Commission donggen; aro Sorkari a'songko sason kaanio Hindi-ko ra'gatkujana kingking English-ko pilak Office-rango jakalangkugen. Indiba Assam-ni Accountant General ia State-niba Accountant General ong'kugen. Ain-o ku'rachakgimin gita, ia State-o dongpagipa gipin jatrangnaba uamangna tikgimin bak rengsi-ko manpagen. Ia Conference Prime Minister aro Central-ni dilgiparangko gronge janapgimin gita dingtang State-ko dabina sak 12 delegate-rangko watatna tik ka'aha. APHLC-ni delegate-rang Prime Minister-ko 1960-ni Novemberni 24-gipa salo grongaha. Iana skang Prime Minister, Assam-ni Chief Minister B.P. Chaliha-ko grongcheng APHLC-ni delegate-rangni janapsusu nikgipa kattarangni gimin talgrikchengaha.

Assam-ni ra'gatgimin ku'sikni Ain-ni gimin Capt. W.A. Sangma uni namnikgijaniko Prime Minister-na aganaha. Ua ku'sikni Ain-ko kupatianiko minggija pass ka'aha ine aganaha. Assamese ku'sikko A'brini A'dokni manderangna on'draani ongjava ine Nehru aganaha. Secretariate-ni kamo Assamese ku'siko uina nangani dongjava, ine ua aganaha. Assam Legislative Assembly-o Hindi, English aro Bengali-koba aganna mangan ineba agankuaha. Aro pilak segrikanirangko, dorkastorangko English-chi sena mangan. Assam Civil Service kamna Assamese grian porikako ra'na mangan indiba. Officer-rangde State Government-ni Departmental kamrangode Assamese, Bengali aro Tribal ku'sikrangoni mingsasiksikkode pass katelna nanggen. Assam-o mejamangmango onganggipa kamrangan mesoka je Abrini manderangni kusik, dakbewal, aro siloroaniko rakkina gita dingtang State-ko manjaskal ong'java ine S.D.D. Nichols Roy, Prime Minister-na aganaha.

Chaliha-ni agane talata gita, State-ni je Non-Assamese District-o Assamese ku'sikko on'drajawa ine Prime Minister APHLC-ni delegate-rangna aganaha. Unikoba Article 220, Indiani constitution-o gita Assembly-ko State-ni ku'sikchi ba State-ni ku'sikrangchi ba Hindi ba English-chi ka'dilgen. Speaker-ni hukumko ra'e je memberba je ku'sikchiba aganna mangan. Uni gimin State Assembly-o gipin

ku'sikrangkoba jakalna man'gen. Ku'sikni giminde neng'nikani dongjawa.

Prime Minister-na Chalihani talata gita Secretariate-o pilak kamrangkon English-chi ka'gen. Unikoba constitution-ni Article 350-o janapa gita pilak dorkastorang, pilak memorandum-rang aro apil ka'anirangko State-o jakalgipa je ku'sikchiba ong'aigen.

Ordinance, Acts, Bills aro amendment-rangko Assembly-o English-chi kam ka'na man'gen. APHLC-NI dilgiparang Home Minister-ko 1960-ni, November 25 salo grongaha. Hill State-ko dabianiko Prime Minister-na batkale uasa rak'bate jechakaniko dakaha. Ua aganaha, ua Indiani State-rangni gispeo dalbatgipa State-ni Chief Minister ong'e uia; maina State dalosa development-ni kamko ka'na tangka paisako chuonge manani chol gnang. Uni Assam-ni A'brini manderang aro A'kaweni manderang jik aro se gita ku'monge dongode namgen. Iako agananina APHLC-ni dilgiparang aganchaksaaha, mikchagija pante metrako bia ka'e on'dragipa gita ong'aigen. Ku'sikni a'selan galgrikani watgrikani ongengahani gimin, ek'grikaniko dak'e on'srangchina (divorce) dabia.

Iano Home Minister gesa State-ko dakna gita nengnikaniko indake talataha, maina A'brini a'dokrang Geography-ni gita apsan nangdime donggipa a'songrang ong'ja. Nangdime dongjani gimin gesa State-ko dakna neng'ani donggenode, indide Mizo Hill-ko dingtang State daksakabo ine Mizo Hills-ni saksa Pu. Saprawnga Home Minister-na janapaha. Mikkangchi ongniko katchinike agansoa gita Mizo Hills dingtang State-ko man'aha. Untalsa Mizo-rangde ningo ningode dingtang State-ko man'na nang'a ine jangroroatenga.

APHLC-ni delegate-rang Prime Minister-ko November-ni 26, 1960 salo grongtaiaha. Unsalo dolgnian agangiminko agantaitaie bikpil bawil dake, dingol gramchi ong'katpile dala melaaniko dakaha. Ia meetingo Prime Minister delegate-rangna Hill State-ni pal minggipin dal'a uni miksonge daksogimin noksako on'aha. Uan Scottish Pattern minggipa sason ong'achim. Ia Scottish Pattern Plan-ni gimin Prime Minister indake talataniko on'aha. Maina A'brini manderangna indaka sasonko on'ode A'brini a'dokrangko uamangni namnika gita sason ka'na man'gen, State-koba chalaina gita uamangni namnika ku'sikko jakalna mangan. Prime Minister haida A'brini manderangni am'enggipa sasonni gun ian ong'naba gnang ine chanchiaha. Ia sasonko on'e A'brini a'dokrangko apsan Assam baksa dakdimkuode namnikgen ine ua chanchiachim. Ua delegate-rangna indake ku'rachakaniko on'aha je tangka paisako A'brini Minister-rangni jakon on'e A'brini a'dokrangko develop ka'na cholko mangan.

Indakeba ua ku'rachakaha je A'brini M.L.A.-rang Indiani Plannig commission baksa joljol chanchigrike kamko ka'naba cholko kangbanga gri man'gen. Delhi-o National Council meetingonaba A'brini MLA-rangko okamatgen ineba ua ku'rachakaha.

A'brini a'dokni memberrangni namnikaniko man'chenggijade mamung ain-koba Assam Legislative Assembly-o A'brini a'dokrangni giminde pass ka'na manjawa ine Prime Minister bonkamao kurachakaha. Ua indakeba janapaha Autnomous Hill District-rangoniko memberrangko ra'e Council of Representative-ko State Level-o dakgen aro Assam Assembly-o pass ka'giminko chanchitaichina uamangna watatgen.

Delegate-rang Delhi-o uamangni agangrikaniko Council of Action Shillongo 1-12-1960 salo tomani report-ko on'aha. uamang S.N. Sinha, Parliamentary Affairs, Minister baksa agangrikanikoba Council-na aganaha. C.O.A.-ni delegate-rang Mr. and Mrs Kripalani jiksesako grongao Chalihani uamang jiksesana Assam-o tomtom ongenga ine agangipa kattarangkoba C.O.A. tom'ao delegaterang aganaha.

Delhi-o delegaterangni dingtang dingtang grongani kattarangko namedake reportko tarichina gita Council of Action General Secretary-na kupatiaha. Indiba 12-12-60 salo C.O.A.-ni meeting indake tik ka'aha, , maina bangbata Delhi-chi re'anggipa delegaterangan Shillongon dongtokani gimin Delhi-o agangrika anirangko uamang report on'na man'na nanga. Ia report-ko C.O.A. Shillongo 7-1-1961 salo tom'ani delegaterang on'aha. Knagimin reportni gimin C.O.A. ruutbeen chanchie indake dakna tik ka'aha.

APHLC-ni Council of Action 1-1-1961 salo Shillongo tom'e APHLC-ni watatgipa delegaterang 1960-ni November jani 24, 25 aro 26-gipa salrango Delhi-o Prime Minister aro Home Minister-ko grongao, gesa dingtang State-ko A'brini manderangna dakchina dabiani bidingo agangrikgipa report-ni gimin chanchiaha. Aroba Prime Minister-ni on'gipa sasonni bilni giminba chanchitaion uko ra'chakna man'gijanina Council of Action duk ong'a. Uni gimin A'brini a'dokrangni dabigipa dingtang chugimik State-na agre gipinko ra'chakani ongiawa ine rak'en chanchianiko dakaha.

Council of Action 1961, January 19 gipa salo tom'taiaha aro mikkangchi maikai remikkanggen uko ka'mao mesokenga. Council of Action dingtang State gesako ong'atna minggipin janapaniko jogale changgittam gipa APHLC-ni tom'ao Prime Minister-ko molmolaniko

dake, dingtang State-ko dake onchina raji ong'china segrikangkugen, aro ia miksongani umung name agangrikna manna gita Shillong-ona uko okamna, Council of Action memberrang selkrie kamko ka'china tik ka'aha. Indake segrik jotgrikanichi dingtang State-ko manjaode Council minggipin ja'ku de'aniko dakskana gita A'brini pilak manderangko ok'ame Eastern Frontier State-ko manjaskal maikoba dakna nang'gen ine tik ka'aha.

Ia kamko ka'na tik ka'e dongipani gimin Prime Minister-na uiatchina Council General Secretary-ko ge'etaha. Ia melaanio chanchie dakna tik ka'gimin-ko General Secretary Prime Minister-na seachi uiataha. Ua chittina Prime Ministerni aganchakanio mikkangchi uni Shillongona re'angna mangijani gimin janapaha aro mejamangmango uni agangipa kamrangan A'brini manderangna namgni onngen ine uni chanchiani gimin re'anganiko nangnikjaha. Unon Council of Action 1961-ni March-ni 15 gipa salo tome ia Hill State-na remikkanganiko maikai bilakbate dakangna man'gen chanchiaha. Nengbe'e chanchiani jamano tik ka'gimin kamrangko sul sul ka'angna gita APHLC-na C.O.A. ku'patiaha.

SKANGGIPA : A'brini MLA-rang Assam Assembly-oni apan ong'katchina sal tarikko tik ka'na nanggen.

GNIGIPA : Mikkangchi pilak election-rango chakatgija galgopna nanggen.

GITTAMGIPA : Pilak A'brini MLA-rang Assam Government-ni ningo pilak Board-rangoni aro Committee-rangoni onngkatani tarikko tik donna nanggen.

BRIGIPA : Dingtang State-ko man'ani gimin minggipin dakna nanggnigipa kamrangni giminba chanchina nanggen.

BONGAGIPA : Indakmitingo Separate Hill State-ni pal on'gipa Scottish Pattern Plan-ko A'brini manderang maina ra'chakna man'jaha uko Prime Minister-na talatna gita APHLC-ni delegate-rangko Delhi-chi watatna nanggen, jedakode Assam-oni ek'e A'brini a'dokrangko ma'ate dingtang state-ko dakna jrimbate chanchina man'na gita.

INDAKMITINGO : A'brini a'dokrangonggipa District Congress Committee Scottish Pattern Plan-ko ra'chakna tik ka'aha. Governor Srinagesh-ba Prime Minister-ni a'brini manderangna ku'pakgipa kamko namnikaha. B.P. Chaliha-ba ia on'aniko namnikpaaha gita nikachim. Prime Minister-ni Governor-na sea chittio indake janapaniko uina man'a:

“Jensalo anga katta japangko una aganmanahaon.... Anga changgni changgittam maiba a'selrango nikaha..... Ia dal'a miksongnaiko ua namnika ine anga rim'na man'aha. Na'a namnikode iako una uiatbo.”

Jensalo Governor una segimin ia chittini copy kingsako watatahaon, Chaliha ia kattani gimin mamungkoba aganjaha. Haida ia nangchongmotgipa kattani gimin agane roani ong'ja ine ua nikahakon.

Indake gisik ra'na man'a Prime Minister uni Plan-ko on'aha aro uko chusokatani giminba janapaha. Assam-ni A'brirango ong'enggipa obostarangi gimin sandina gita, Punjab-ni giticham Governor C.P.N. Singh-ko watatna sikanikoba ua janapaha aro Scottish Pattern Plan baditana kingking A'brini manderangna namgen report-ko on'china gita am'achim. Indiba ua chittini gimin Chaliha baksa agangrikon C.P.N. Sing-ni is somoimitingo Shillong ona re'baani ong'kujawa. Maina Assam Congress-ni dolrangba Scottish Pattern Plan-ko name ra'chakna mankujaengachim.

ALL PARTY HILL LEADERS' CONFERENCE-NI INDIANI PRIME MINISTER-NA ON'GIPA MEMORANDUM.

To,

Shri Jawaharlal Nehru,
Prime Minister of India.
New Delhi.

Sir,

Mande ra'ako man'gipa Prime Minister, chinga Assamni A'brini A'dokrango donggipa manderangni nengnikanirang, sikanirang aro ka'dongsoenganirangko nang'ni mikkangona ra'angna cholko All Party Hill Leaders' Conferene-ni delegaterangna on'ani gimin nangko mitela. Chinga iako dakna nanga ine chanchia maina nangko mikkangchakchak gronge nang'na talatna agreba nang'na seachi kan'dike ka'mao nang'ni uina nanggnigipa a'selrangko mesoke on'na cholko ra'a.

DA'O DINGTANG STATE GE'SAKO DABIA.

Assam-o ong'enganirangan Autonomous Disrictrangi Tribal nanderangko sosojengjeng ong'atachi uamangko ripingani aro nikkangchi namroro silroroatani cholde uamangna dingtangmancha State-ko dake on'aniosan mangmang ong'aigen.

Sir, haida na'a uiengnaba donga, Assam-oni ma'ekna dakengade ku'sikni Ain-ko ra'gatanichi namjabatataha jekon meja mangmang As-

sam Legislative Assembly-o pass ka'aha. Indiba ku'sikni bidingo pass ka'animgangmang de ong'aija ine rongtale ma'sigen. Chongmotan uamangni kam gisik gimikan an'tangtango dalnikbate sason ka'na am'aniko a'brio donggipa pilak manderangan name dake uiahani gimin ma'ekaniko dabitelna nangnikaha. Iani bidingo mejao North Cachar Hills-ni Haflong songjinmao ku'cholsan pass ka'gipa resolution-koba kachapatenga.

A'BACHENGE HILL STATE-KO DABIA

Indiani State-rangko namedake jujagrikanirangko dakmitingon 1954 bilsini intalan Assam-ni Autonomous Districtrangna dingtangmancha Separate State-ko dake on'china dabichengaha. Ua somoi aro dabianiko mangrakatna jakkalgipa kattarangara Assamese jatrang uamangni ku'sikko a'brini manderangna on'drana da'al ba knal uamang cholko ra'na joton ka'gen ine kenchaksoa. Chinga ka'mao State Re-organization Commission-na on'gipa memorandum-ni mitamrangko janape mesokatenga. "Assam Government ba Assam A'kaweni manderang ong'ja maina Tribal manderangni namnikanirang aro sikenganirangko ma'sina sikanikon on'tisaba mesokjaha. Batesa bikpile Tribal manderangni namnikgipa kamrangko ga'pnekna joton ka'e Assamese ku'sikko on'drana joton ka'aha. A'brini manderang indake nikaha, chongmotan gitel saksa British-ni jakoni jakgitel ong'ahaoba sakgipin chingni kosako gitel ongskaha." Aroba Separate State-na dabiani memorandum-o janaptaigipa kattarangkoba bikote mesoktaiengachim. Ia ku'sikni bidingan mingsa nangchongmotgipa ong'a. Jemangan Assamese ku'sikko ma'ani ku'sik gita uia, uamangan pilak sasonni kamrangko jakskange ka'gen. Uni gimin A'brini manderang da'o ongenggipa Government-ni maiko agana uo pangchakaijawa, maina knalo maidakgipa Sorkari ongskagen uko sawa uia. Daomitingde bang'batgipa jatan je ong'oba ku'siktangko dalbate rakkina cholko man'gen. Ian A'brini manderangko namen dongtogijani ong'atgen. 1945 bilsio A'brini manderangni dingtang State-ko dakchina dabiaoni intal bang'a kragipa kamrangba gnanngchim, indiba jensalo Indiako dilgiparang State-rangko dal'dalbatkale dakna chanchiani bidingosa Hill State-ko on'na jechakaha.

Uni giminsa mitam a'brini dilgiparang uamangni dabiaoni on'tisa srete banga minggipinrangko janapchapaha, Jekai Hills Ministry Plan aro ugita. Unikode jensalo Shri Chaliha, Chief Minister ong'na a'bachengaha, State-o minggipin cholko ra'e kam ka'e nina Eastern Tribal Union raji ong'aha aro Congress Parliamentary Party baksa bakrimpae

Chaliha-ni Cabinet-o dongpae kam ka'e nianiko dakna namnikaha. Chaliha-ni namgipa dilanio ia kam bilsu gnimangba nangrimani nambatreroengachim, indiba Assam A'kaweni mitam dilgiparang A'brini dilgiparang baksa nangrime apsan dakaniana "rongtalgi jagipa nangrimani" (unholy alliance) ine aganaha. Nangrimgrikani batroraahaoba Songduni a'kaweo Assamese ku'sikni bidingon iako ipakgale galsrangaha, indake Assamese manderangni kamrang, cha'ua, so'ota, ra'seke ra'arangona sokangpilaha.

**ASSAMESE KU'SIKKO STATE-NI KU'SIK INE
JAKALANIKO SKANGGIPA ALL PARTY HILL LEADERS'
CONFERENCE JEGALAH.**

Ku'sikni bidingo a'brini dilgiparang dongsiksakaha. A'brini dilgiparang skanggipa All Party Hill Leaders' Conference-ko tom'e mingsa dakna nangniko tik ka'e donaha, chongmotan, "ku'sikni bidingo namnikbo ba namnikjabo tom'tomanide a'songo dongna nanggen....." aro State-ni pilak manderangko sason ka'giparang baksa ku'mong-nangrimchina okamna. Ia Conference mongsongbate re'angginin somoirango jekai golmal gondokol gri tom'tome dongbaaha ugitan dongangkuna A'brini manderangko molmolaha. Chinga janapna kusi ong'a je A'brini manderangko banga ka'onangatanirangko dakoba uamangni noksul Assamese manderang baksa antangtangni mikkim rasongko rakkie tom'tome dongna joton kaenga. Autonomous District dambongani skanggipa tom'anioba ku'cholsan Assamese ku'sikko State gimiko pilak office-ni kamrangko jakalna dakaniko namedaken jegalsrangha aro iani gimin mingsa resolution-ko pass ka'aha.

A'bini dilgiparang Assam Government-ni dilgiparang baksa State gimiko tom'tom kumong nangrimanini gimin Assamese ku'sikni Bill-ko ra'gatgija donchina molmolaniko dakaha. Chingni kattarangko indiomangba knachakjaha. Aro iani gimin August-ni bijatchimango rongtalen uina man'aha. Assamese manderang mamungsaloba uamangni ku'sikko State sorkarini kamrang jakalna am'enganiko uamangni dabia gita dontongjawa ine parakaha. Indakesa A.P.H.L.C.-ni dongimin Council of Action uni miksongani gita Indiani President-na Memorandum-ko onna aro unbaksanaba A'brini manderangni kimkim warachakani gimin segipa lekkarangkoba chipchapataha. Ua Memorandum-o indake janapaha, je Assamese manderang uamangni dabiaoniko dontongjaode nambatgipa A'brini manderangna cholara Assam-oni ma'eke dingtang State-ko dake on'an altuabatgipa aro nengrabatgipa kam ong'gen ine janapaha.

2. GNIGIPA APHLC-NI CONFERENCE-KO SHILLONGO ONGATAHA.

Maiba minggipin cholko am'na gita Council of Action 2-gipa chang APHLConference-ko Sillongo, August-ni 22 nd, tariko ong'ataha. Ia conference, Council jekon State-ni ku'sik ine Assamese ku'sikko ra'gatode Assamoni ekana agre minggipin chol dongja ine janapahachim. Janapgimin gital State-ko dakani bidingo ge'sa Draft Plan-ko tarichinaba iaConference Council of Action-na bilko on'aha, jekon 1960 bilsini November jani 16 gipa tariko ong'gipa 3-gipa Conferenc-o bon'kame chanchianiko ra'bana man'na gita Autonomous District-rango donggipa pilak Party-rangan asongrime bang'a agangrikaniko dakaha. Ia pilak agangrikanirangoniko ma'sirika gitade Assamese jatrang State gimiko Assamese ku'sikko dakna miksonaniko watgaljawa ine nikaha. Minggipinara, Home Minister, Pandit Pant-ni Assam-ona re'bae janapgipa pil'sade nama, jekai Assamese aro Hindi minggnian State-ni ku'sik ong'china, indiba Secretariate Office-ode jena kingking Hindiko ra'gatna chanchikuja English-ko jakalode nama. Ia minggitam cholko Cachar-ni mitam Sorkarini Office-oba Officerangde pilsatai namnikachim, indiba iako Assam A'kaweni manderang "pant formula" minggitam dake on'aniko bon'kame Assembly-ona ra'angani ong'on jetoningjaha. A'brini manderang ia Bill-ni miksonganikon jegalaha, indiomangba ia Bill-ko on'tisa namdapate ra'gatanikomangba bangbata Assamese manderangan ra'chaksrangjaha. Daktaigipa Bill-ko A'brini manderang aro Cachar-ni mitam manderang raken warachakbeoba ASSAMESE KU'SIKKO State gimiko Official Language ine 1960 bilsini, October ni 24 gipa salo pass ka'aha.

SEPARATE STATE-KO DAKCHINA 3-GIPA APHLC CONFERENCE DABIA

Bon'kame A'brini manderang Eastern Frontier Stateko dakchina dabiaha. Ia 3-gipa chang APHLC-ni Conference-o janapgimin State-ko maikai ong'gen una daksogiminkoba ra'gataha. Jekon na'a uina gita uni Copy kingsako chipchapata.

SASONKO MA'EKGRIKATAHAON NANGRIMRIKANI BATGEN.

Eastern Frontier State-ko dakna dabianiko songdu A'kaweo donggipa bangbata manderangba namnikpaaha. Sasonni bidingo changsaode dingtangtelgen ineba ma'sia aro dingtang ong'ahaode Assamese manderang chingni kosako dal'a dakani cholko man'jawaha

ine A'brini manderangba ma'siskagen. Apsangrik ong'e ku'mong nangrimgrikani gisikrangba nabagen, jensalo A'bri aro a'kawe dingtang dingtang State gegni ong'ahaode aro iasan mangmang Indiani Salgro Salaram jolni tom'tomani ong'aigen.

Bonkamao Assam-ni A'bri-rango donggipa Autonomous District-rangni manderang ia dabianiko nang'na on'na, maina nango ia Indiani gipin dilgiparango chinga A'brini manderang namen ka'dongchakani gimin ia Eastern Frontier State-ko man'adipet bakbakkale dake on'na raji ong'gen ine chinga bebera'a. State-ko on'oba banga che'em che'em dake on'an kamrang dongkugen ong'ani gimin adita somoiko nanggen uni gimin chinga chingni dabianirangni mongsongbatgipa ja'pang chongmotkode namnikpagen ine nango namen ka'donga aro sulsul kamrangkode ja'manoba ka'na mangel. Changsatai chingni dukrangko nangona ra'angna cholko on'anina chinga nangko mitela.

Nangni bebegiparang,

All Party Hill Leaders' Conference-ni palo kamao soi ka'enga.

1. Sd/- A. Thanglura, M.L.A.
2. Sd/- Ch. Saprawnga, C.E.M. District Council.
3. Sd/- H.M. Haflongbar, M.L.A.
4. Sd/- P.C. Longthasa, C.E.M. District Council
5. Sd/- J.B. Hagier, M.P.
6. Sd/- Raidang Engty, M.D.C.
7. Sd/- Capt. Williamson A. Sangma, M.L.A.
8. Sd/- Emerson Ch. Momin, M.L.A., E.M. (GDC)
9. Sd/- Maham Singh, M.L.A.
10. Sd/- T. Cajee, C.E.M.
11. Sd/- Hoover Hynniewta, M.P.
12. Sd/- S.D.D. Nichols Roy, General Secretary, Council of Action.

Dated the 24th. Nov. 1960

DINGTANG SALARAM A'DOKRANGNI GESA STATE-KO DABIA

Mikir Hills-na agre pilak Autonomous District-rango Assam Official Language Bill-ko warachakahachim. Ia warachake namnikgijaniko inmana kamchi mesokna gita, manderangni re'jinmanirangko, public neetingrango aro hartal-rangko (ka'onanga kamchi mesokna pilak kamrangko dontongani aro dok'anrangko chipani) Shillongo, Turao, Aizawl-o aro man'ode Haflong-o dakna gita APHLC-ni Council of Ac-

tion tik ka'aha. Ia Bill-ko warachakna gita Delhi-ona delegaterangko watatnaba tik ka'aha. Jensalo 1960-ni October-ni 18-gipa salo Assam Legislative-o ia Bill-ko ra'baahaon Autonomous Hill District-rangni MLA-rang, Mikir Hills-ni MLA-rangna agre Assembly-oni ong'kate kattokaha. Unatamo Council of Action-ni memberrang mikkangchi maikai ja'ku ga'anggen uni gimin chanchina gita tom'aha. Ua tomanio Assembly-o ong'gimin obostarangko Capt. Sangma-ni talatamo dingtang dingtang District-rango donggipa APHLC dolrang 1960-ni, October jani 24-gipa salko warachakani sal ine donna tik ka'aha. New Delhi-chi delegation-ko watatani giminba manderangko seoke ra'bachina gesa committee-ko donataha. Ia delegation-o MLA-rangna agre gipinko seokna nangjawa ine tik ka'aha. Man'a dipet selkrie Delhi-chi re'angchina ge'etaha, re'ange Central Government-ni dilgiparangko gronge Autonomous Hills District-rangko dingtang State dakchina akangrikaniko dakna nanga ine tik ka'aha. Bilsi 1960, October-ni 24-gipa salo hajalni hajal manderangni rejinmae a'dil mopile "We want Hill State, No Hill no Rest", (Chingna Hill State-ko nanga, manjaskal dontongjawa" ine mikka kim'preta gita chrik-a'boktokaha. Maina unsalo Assamese kusik-ni ain-ko Assembly-o pas kaahachim. Indake korekdimdim mande bangako Shillong mamungsaloba ia chasongde nikkujachim ina. Tura aro Aizawl town-rangoba re'jinmaniko tom'tome ong'atna man'aha. Indiba Haflong Town-o tarina mansrapjae re'jinmaniko dakna manjaha. Council of Action, 1960-ni, October jani 25, 29 aro November jani 2-gipa salona kingking tom'taie A'brini manderangna dingtangmancha gesa State-ko onchongmot-na nanga ine dabina tik ka'taiaha. Aroba ia Councilo, APHLC Youth Wing dongna nanggen ine tik ka'aha. Aro Prime Minister-na segipa memorandum-ko pilak Council of Action-ni memberrangna sualtokna nanga ine tik ka'aha. Apsan bilsini November 9-gipa salo segimin memorandum-ni gimin che'em che'em nipiltaijaniko dake namate rachakaha.

No. 619-PMH/ 62

Prime Minister's House
New Delhi,
May 3, 1962.

Dear Mr. Nichol Roy.

1962 April 3 tariko seatgipa nang'ni chitiko man'aha, jekon Assam-ni Governor angna watatskaaha Ia chitina bakbak sechakna man'ninggijanina anga duk ong'a. Anga an'tangan be'en an'sengjae

palango tue dongenganio pilak segrik jotgrikanirangko dakna chol ong'jaha.

Nang'ni chitio janapgimin aro unbaksa chichapatgipa lekkarangni gimin anga che'em che'em chanchiaha.

Na'simang uia, iani gimin chinga, skanggipa na'a aro nang'ni ripengrang baksa bang'a changon chanchirimaha. Anga nasimangni bang'a dabie janapanirangko ra'chakna bang'a neng'nikanirangko na'simangna talataha aro jamano na'simangan dukni ong'gen ineba aganaha. Na'simangni duk man'enggipa uan bebe ong'a ineba anga ma'sia, iani jamanoba na'simangna bang'bata sasonni bilko on'naba tik ka'aha aro Separate Hill State-na agre pilak minganti na'simangni dabia rikitkoba chu'sokatna jotton ka'aha. Separate State-ko on'ode na'simangnan namjawa ineba anga na'simangna talatbeaha. Agangimin gita mingsana agre anga pilak dabianirangko on'na ku'rachakman'aha. Anga ka'donga na'simangni conference uko ra'chakgenkon. Angni miksongara na'simangni ra'chakode Commission-ko donate pilakni gimin che'em che'em kamrangko ka'e chinga kragipa Ain-ko ra'gate na'simangni dabianiko chu'sokatna man'gen ine ong'achim. Nasimang baksa agangrikmitingo angni ma'sirika gitade ku'sikni gimin-na agrede pilakkon na'simang ra'chakaha gitade nikachim. Unikoa General Election ong'manaha aro bangbata seat-rangkon APHLC-ni candidate-rang man'aha ineba na'simang mesokaha. Iano pangchakesa na'simangni dabigipa Separate Hill Stateko on'na nang'a ine janapaha. Anga duk ong'a maina anga uko dakna amjawa. Ia kam ba kattani gimin angni skango na'simangna ku'atgiminko dingtangatna anga mamung a'selko nikja. Na'simangni janapgimin dukrangkoara angni on'skagipa bilrangchin chu'sokataha ine angade chanchikuenga, maina Separate Hill State-ko on'ode a'brini district-rango donggipa manderangni silroro namroroaniko champenggen ine kenchaka. Ia on'giminrangko na'simang name simsake chanchiode ong'gramaigipa chrik a'bokanirangko dakaniara indin ong'gramaigen ine ma'sigen.

Autonomous Hill District-rangni manderangni silroronamroroaniko chinga nikna ska aro bang'bea sason-ni bilrangko on'dapanichi uamangni namnika aro ska gita kamko ka'e songko nokko nambatatna cholko mangel ine nikachim. Na'simangni election manifesto Tribal manderangni dakbewal aro janggi tangani bewalrangko ripingna see paraka. Ia gimikan angni na'simangna janape on'giminoba donga. Na'simangni kam cholon, songsal songbonti, jikkin de'baani,

nokdang man'rikani aro cha'a ringani bewalrang gimikkoba dakna chu'gimik na'simangni bilon ong'gen. Ku'sikni giminde anga indake agangen, chongmotan na'simang je ku'sikkoba aganna ba sena mangel Jena kingking na'simang Hindi-ko ra'gatna seokkujana kingking pilak office-rango na'simang English-ko jakalna man'gen. Indake dakode na'simangko je ku'sikkoba ra'china draani kattan dongjawa.

Minggipin, mamung Ain-koba Assam Assembly-o A'brini manderangni mamung namnikako mangija dakdrana manjawa. Iakon 'Scottish Pattern' ine mingaha. A'gilsako dal'roro silroroani gimin na'simang gisik nangama nangja anga uja. Europe-o indake ongenga, chongmotan European common market, bading-chiwalgrikani bidingo Saliram Europe-ni bang'a a'songrang baksa bakrimna man'gen, indakgipa kamko jako ra'e kamko ka'on iachiba a'songsa a'songgipin baksa sasonni mingsa tomtomgrikani chol ong'a ine nikaha. Indakgipa altue re'grik dogrike bading-chiwalgrikani cholrangkon a'gilsak gimikan am'enga. Uni gimin jemangan an'tangtangko chone ra'rone dongna sikani gisik ba chanchianirangan mikkangchi an'tangtangnasan kengniko ra'bara ong'jawa indiba a'song gimiknan dukko ra'bagen.

Uni gimun anga duk onga maina anga na'simangni bi'a ba dabia gimikko on'na amjawa. Anga ka'donga na'a aro nangni ripengrang ia gimikko chanchie a'brini a'dokrangna tomtomao silroro churoroaniko man'na gita angni on'gimin janapanirangko ra'chakpagen ine ka'donga.

Na'simangni bebegipa
Sd/- **Jawaharlal Nehru.**

Ref. GI/ I/ 62

Dated 12 June, 1962

To,

Mr. Jawaharlal Nehru,
The Prime Minister of India, New Delhi.

Dear Mr. Nehru,

1962 April 4-ni chingni chittina aganchakgipa 1962, May 3-ni nang'ni chittina nang'ko mitela. 1962, May 9 aro 10-o Jowai-o tom'gipa APHLC-ni Council of Action-ni meetingona nang'ni chittiko ra'angaha, aro chittio nang'ni segiminrangni gimin, aro 1962, May-ni 4 tariko Parliament-o nangni aganchakaniko on'ana ia meeting namnikaha.

Separate State-ko dakaniko nang'ni jechakani mongsonggipa

minggniara, nangni janapgimin gita, tangka paisao nengnikani aro re'a do'ani kamo ong'a. Eastern Frontier State-ko dakanio tangka paisani bidingo India Government-na a'bachengo adita bal boja ong'gen bebe, indiba an'tangon dongtelaigipa bang'begipa a'ningni gamrangko bikotna man'mano siloroani bidingo an'tangni man'giminoniko ra'ronpaaniko dakna man'gen ine chinga ka'donga. Ia ka'dongani ia a'brini manderangni gong'ao rake kam ka'anio aro siloroenggipa ong'anio pangchaka. Indiba uamangni namrorona sikani bilrangko Separate State-ko dakanichisa mesokna manaigen. Assam Government-ni Budget-o a'bhirango tangka man'aniko onggiya dake mesokaha. Bebeko aganode, A'brini district-rango mitam mongsonggipa tangka man'ani cholrangko Assam Government mesokjaha. Indake a'brini district-rango tangka man'aniko kakketgija aro bikpilesa mesokskaaha. Jedakoba tangkani giminde State-ko dakna miksongani ong'ja. Manderangni katchaani aro ku'si onгани tangka paisaosa pangchakija. Indiba skatang gita aganna man'ana, a'songtangko namroroataniko dakna cholko man'atgipa jakgitelosa pangchaka. Parliament-o nangni agangipa re'grik dogrikanio nengnikanini gimin ching'a indake mesokna sika. Dao dakna am'enggipa Eastern Frontier State, Indianin bak gesa ong'genni gimin Indiani gipin bakrang gita State-ni dingtang bakrangona aro Indiani gipin bakrangonaba re'grikanio nengnikchongmotani dongna nangjawa.

Nang'ni on'anirang chingni dabigipa mingantikon man'gopaha ineba nang'ni chittio janapaha. Indaken, chingni am'ani ritchaprako sotskuskukode chingna on'manjok ine na'a Parliament-o aganaha. Chingni am'ani ritchaprako sotskuskukura 1960-ni November jao nang'na on'gimin Eastern Frontier State-ni draf plan aro patten ko mangsonga ine chinga chanchia. Chinga mande ra'bee indine aganna draatako man'a, nangni on'anirang chingni dabianirangni sepangonan sokkuja. Chingni dukrang kakket ong'a ine uianiko mangrakattaiani gimin chinga ku'si onga, aro chingni dabianini ritchaprako sotskuskuko chusokatna na'a sikengani gimin ua dongspa bak ritchasani baksara maia tale aganpachina chinga mol'mola.

Nangni chittio segimin ku'sikni gimin District gita chanchiöde kakket ong'naba dong'a. "Assamese"-ko State-ni Official ku'sik dake ra'gate ua Official Assamese ku'sik State-ni pilak bakrang aro manderango nangegijan ongnan manjawa. Aro Assamese ku'sikko maiba maiba cholchide on'draananin ong'aigen.

Kosako janapbagiminrangni gimin chanchie Assam-ni A'bri ni manderangni neng'nikanirangko chelatani nambatsrangipa cholde Separate Eastern Frontier State-ko dakachisan ong'a ine chingni ma'sianiko chinga iachi ma'sie parakattaia.

Re'anggipa General Election-o leka puongiparangna nang'ni on'anirangko chu'soke mesokjahani gimin General Election-chi manderangni tik ka'ataniko na'a ra'chakna man'jaha ine chinga nika. Chinga nang'na indake uiatna sika, nang'ni on'anirangko election-ni mongsonggipa bak dake leka pu'ongiparangna mesokaha, aro re'anggipa election-ko dakanio Congress-ko chake aro jee chingni Conference-ni dilgiparangchi rongtalen manderangna aganmanaha. Scottish Pattern-ni nama aro namgijani gimin seanirangchi aro sogbatrangchi parakataha. Iakoba nang'ko gisik ra'atna sika, 1962-ni January 1-gipa salo Shillongo nang'ni jinmana aganprakaniko Assam Government-ni Publicity Department chapa ka'e manderangna soalataha, aro nang'ni on'anirangni gimin lekka pu'ongiparangna aganprake Scottish Patern-ko ra'chakgipa candidate-rangnasa Assam Sorkari lekka pu'onchina manderangko didiaha. Indake election-o Separate State aro Scottish Pattern-ni gisepo susaaniko dakchongmotaha. Uni giminan ia A'bri a'dokrango General Election-an bichal ka'e rai on'ani gita ong'a ine 1962-ni April 4-ni chingni chittio chinga janapaha.

Bon'kamao nang'mung chingni agangrikanio ku'sini bidingna agre, nang'ni on'anirangkon chinga ra'chakna namnika ine na'a uiahani gimin chinga dukko man'a. Na'a indakgipa chanchianiko maikai dakaha chinga ma'sina man'ja, indiba indakgipa chanchiani tik ong'ja inesan chinga aganna ama. Beben, chinga nang'ni aganarangko knatimaha aro on'anirangni gimin chinga chanchigrikaha, indiba chinga uko namnika ine mamung dakeba agankuja. Nangni on'anirangko chinga Conference-o chanchigen inesa chinga aganaha. 1961-ni April jao Shillongo tom'gipa chingni 4-gipa Conference-o nangni on'anirangko ra'chakna man'gijaniko rongtale parakataha. Aro 1961-ni May jao Delhi-ona re'anggipa gnigipa delegattion Conference-ni Resolution-ko nang'na me'sokaha aro nang'ni on'aniko chinga maina ra'chakna man'jaha tale agane on'na chinga grongtaina nanga ine chinga nang'na aganaha. Aroba 1961-ni July-ni a'bachengao Tura-o tom'gipa chingni bongagipa Conference-o 1961-ni June jani 6-gipa tariko Union Home Minister-ni on'gimin policy statment-rangko aro kusikni bidingo Chief Minister-ni agangimin-rangko name sandie nitaiaha.

Uni gimin Assam-ni Hill District-rango ong'enggipa dintangmanchagipa obostarangni gimin ma'sie ia gimikni gimin chanchipiltaijaniko dakapachina nang'ko mol'mola.

Nang'ni bebegipa,
The Council of Action, A.P.H.L.C.

Sd/-

S.D.D. Nichols Roy
(General Secretary)

Assam-ni Chief Minister, B.P. Chaliha, Assam Government aro Assam Pradesh Congress Committee Nehru-ni daksogimin sasonni noksako jeaha. Manderangni namnikani gita sason ka'gipa sorkari-ni kamrango ia Nehru-Plan ja'donggani onngen ine Assam-Government-ni pasikaniba ong'achim, State-ni ku'mong nangrimgrikaniba komigen aro kam ka'na nanggnirangko chu'sokatna manjani gimin kamko dontonganirangba ong'katgen, indakmitingon State-ni bilding bildang ong'ani, bitchilrangba chagenchim. Uni gimin Chief Minister Prime Minister-na chitiko seaha.

Chinga indake nika, Chief Minister antangni Cabinet Minister-rangko uni namnika gita seokna manjaode, Cabinet-ko dak'e a'songko sason ka'ani ortoan dongjawa. Maina Chief Minister antangni Cabinet Minister-rangko seokaniko dakon pilak district-rangoniko niroke aro MLA-rangko name dake base'e sorkariko rikanio ku'cholsan daitoko ra'na aroba bamna sikkipa gisik donggipako sa seokrongachim. Jamano Prime Minister Chief Minister Chaliha-ni miksonganikon ra'chakaha.

Nengnikanirangko Chaliha indakeba janapataha, chongmotan A'brini A'dokrangna silrooani kamrangko ka'ani bidingo Regional Committee-sa bonchote agananiko dakgenchimode Legislature-ni bil man'batgipa ong'aniko bikpilatskagen. Uni gimin Regional Committee-ko bil manbatgipa dak'e donjachina gita Chief Minister, Chaliha janapaha.

Basakoba State Legislature aro Regional Committee-ni gisepo meligrikigijani ong'katon, President-ni miksonganiko uimanani jamano, Governor una on'gipa bilrango pangchake kamko ka'na jakpangpil kaa gita ong'gnok ine Chaliha mesoktailkuaha. Indakgipa kam, Governor aro Chief Minister-ni gisepo nangrimgrikaniko be'atgenchim aro Chief Minister aro Minister-rangni gisepoba indaken gugragenchim. Chanchiatang

gita dakna manani cholko on'ode Legislative Assembly aro Cabinet-n nokgipa ong'ani bilko pe'ani gita ong'genchim.

Bonkamao Brahmaputra a'kaweni manderang ia Nehru-Plann ningo jak pangpilkani gita ong'genchim ine mesoktaikuaha. Uamang Sepa rate State-o nange gipa kamkon ra'chakna nanggen aro A'brin a'dokrangko sason ka'ani giminde mamungkoba aganpana manjawachim Indiba A'brini M.L.A.-rangde a'doktangko sason ka'na chugimik bilke manaisan ong'ajjawa, indiba uamangde A'kaweni giminba ku'rake aganpana man'genchim.

Indakesa Chaliha aro a'kaweni pilak niksenggipa dilgiparang Nehru-Plan-ko je'galaha. Assam Pradesh Congress Committee-ba namer. Nehru-Plan-ko namnikjaha. Daobatai, Garo Hills, Khasi Jaintia Hills-ni District Congress Committee aro Assam Hill People Convention-ni manderangde Nehru-Plan-ko rimchaksoaha.

APHLC-ni mesokani gita indakgipa apsan nengnikanikon Assam Government mesokaha, ongenggipa a'sel aro kamrangko nikuna gita mamungkoba agangija APHLC-de jripjrip dongaiaha.

ASSAM-NI A'BRINI A'DOKRANGO ONGENGGIPA OBOSTARANGNI GIMIN NAMEDAKE SANDIE REPORT-KO ONCHINA GITA GOVERNMENT OF INDIA GESA BIL GNANGGIPA COMMISSION-KO DON'AHA.

Pandit Jawaharlal Nehru A'brini a'dokrangna chugimik sasonni bilko on'ani gimin sandie report-ko on'china gita bil gnanggipa gesa Commission-ko don'na chanchiahachim. Indiba Assam-ni Governor, Vishnu Sahay aro Chief Minister B.P. Chaliha sakgittam commission-ko donna namnikskaaha. Saksa Commission-ni Padot aro uko dakchakgipa sakgnide Government Officer-rang ong'na nangjawa. Bon'kame Pandit Nehru-ba uamang gitan namnikpaaha.

Punjab-ni Governor gitcheam C.P.N. Singh-ko Commissionni Chairman ong'china Prime Minister janapaha. Indiba Chaliha, Shri H.V. Pataskar-ko Chairman-na mingskaaha. Iani giminde APHLC jrip jrip dong'aha. Pataskar saksa Congress-ni mande ong'ani gimin Hill State-ko on'ani bidingo maibakae salchingwetna man'arok ine Chaliha-ni gisiko miksongachim. Ianoba Chaliha uni miksonganiko chusokatna man'aha aro Prime Minister Commission-ni Chairman (Dilgipa pamong) dake H.V. Paskar-ko kam'o rakkiaha. Saksa Commission-ko rakkianiko chusoke dakangna skang 1964-ni May jani 27-gipa salo Pandit Jawaharlal

Nehru siaha. Iani bidingo 1964-ni December jaona king king Hill State-ni bidingo mamung kamko ka'ani dongiachim.

Jensalo APHLC-ni delegate-rang gital Prime Minister Lal Bahadur Sastri-ko New Delhi-o gronge ia Commission-ko rakkiani bidingo bakbakkale rakkichina agangrikon, Commissionko haida 1965-ni January ja mango rakkina jotton ka'gen inesa aganchakaha.

Pataskar-ko Chairman dake rakkiani giminde, uni da'o kam ka'enggipa kamoni pension man'ani jamanosa chanchiengachim ine ua agankuaha. APHLC Pataskar-ko Chairman dakani giminde mamung ku'sakoba aganpajaha. APHLC iakosan aganaha, Commission-ni member-rang-de A'brini manderangna ka'sachakgipa ong'na nanggen. Je memberrangko rakkigen uamang kamni manderang ong'genchim. Uamang kamni manderang ongbebeginode namgen ine delegate-rang namnikaha aro uamang dukni ja'pang ja'dilko singsandie nam'a report-ko Government-na on'gen ineba ka'dongchakaha.

Commission-ko 1965-ni March 16 tariko kam'o rakkiaha, Chairman H.V. Pataskar, member-rang C.S. Venkatachar aro C.S. Rau Venkatachar be'en an'senggipa mande ong'jani gimin ka'na jechakaha aro uni palo Shankar Prasad-ko 1965-ni April 12 tariko rakkiaha. Commission-ni dakna nanggni kamrangko donsoani gita, A'brini a'dokrangon sason ka'na daktaianiko che'em che'em mesoke Central Government-na report on'na nangachim; Assam baksa nangrimaniko rakkikue chugimik sasonni bilko A'brini a'dokrangni jako pakwatani gimin ku'patichina ong'achim. Commission iako gisik ra'na nanggen je mitam dakdimna nanggipa kamrangde dongkugen : jekai State Assembly-ni Legislature, apsan Cabinet, apsan Governor, apsan High Court aro apsan State Public Service Commission.

Una agrede, sasonni kamko jujataiani bidingode Commission tangka paisa aro gipin kamrangkode uamangni namnika gita recommend chongmotan kupatina jakgitel ong'a. Dokgipa Schedule-o (in Sixth Schedule) don'gimin niamni ningo district aro Regional council-rangko dakaha. uarangni bil aro kamrangkoba daktaina nangama nangjawa ukoba chanchie ku'patina nanggen. Aro A'brini a'dokrangni memberrangko State Assembly aro Parliament-na bariatna nanggenma nangjawa ba nangode maidake bariatgen uko hisape kamko ka'na nanggen.

1965-ni April-ni 8-gipa aro 28 gipa salrangni gisepo Commission-ni memberrang uamangna on'gimin kamrangko jako ra'aha. April-

16. Nimai Rabha - - - - -

1970 April-ni 2nd gipa salo Prime Minister, Mrs Indira Gandhi, Shillongni Garrison Ground-o Meghalaya-ni Autonomous State-ko nokdong'gae on'ani joljolan Prime Minister aro hajalni hajal korekdimdik banggipa mande jinmani mikkango Governor B.K. Nehru, Capt. W.A. Sangma-ko Chief Minister-na aro uni Cabinet Minister-rangko B.B. Lyngdoh, S.D.D. Nichols Roy, Edwinston Bareh aro Sandford K. Marak-na ku'mikchetaniko dakaha.

Ia salo bilsa 18-na kingking dingtang State-ko manna krengmitingo pilak be'enni aro gisik-ni dukko man'anirang unsalo bonaha. Aiao ! ia salo hajalni hajal a'brini manderangni mikkang bimangrang bario balgipa nitobegipa samrasin-ni bibalrang gita, kasrokani aro kusini mikkangrang pringni ripanchirang gita rikrak rikrak, chingchet chingchet dakpile nitobejok.

Minister-rang kamko ka'na jako ramanani jamano, Assembly-ni Hon'ble Speaker-na seokani bidingo party-ni dilgipaprang ningode ningode saksa sakgipinni gisepo baltigrikengachim. P.R. Kyndiah-ko namnikgipa B.B. Lyngdoh-ni dol Rokendro Dkhar, E.B. Lyngdoh aro A.B. Diengdoh ong'achim. Ia dilgiparang S.D.D. Nichols-Roy-koba namnikaniko mesokpachina gita ku'mongaha.

Indiba gipin dilgiparang D.D. Pugh, S.J. Duncan, Jasmen Swer, M.N. Swer, Humprey Nongrum aro Galinston Laloo iamangde Radhon Singh Lyngdok-kosa namniktokachim. Uamang gita apsan Garo Hills-ni aro Jaintia Hills-ni gipin APHLC dilgiparangbachim. Uni gimin Capt. Sangma ia seokani una rakgipa kam ong'jawa ine nike jrip dongaiaha.

Gnigipa Parliamentary meetingko Turao 1970, April-ni 12-gipa salo ong'ataha. Ia pilak ongenga obostarang ko uieba uija dakmikaha. Pilakni ra'chakna manna gita namgipa dilgipako seokna gita seokbanasigipa manderangko (Nomination Committee) donna janapaha. APHLC pangnan indake dakrongachim chongmotan seokna donatgipa manderang jeko seoke ra'bagen aro uko meetingo mingaton uko jegalgija rachakrongachim. Indake uni janapaniko meetingo donggipa manderangba ra'chakaha. 1970, April-ni 13 salo seokna donatako mangipa manderang ningo ningo namen gisiko nengbee MLA-rangkoba singrikkiaha. Capt. Williamson A. Sangma darangnaba amikka-aski namgen ine ku'rachakaniko dakjaha. Iani gimin Nichols-Roy-de jajaahachim. Bonkame Capt. Sangma, D.D. Pugh-ko singaha, "Na'a

Speaker-na sako mingna namnika ?” “R.S. Lyngdoh-ko” ine aganchakon bakan Nichols Roy aganaha, “Ukode University-na an’ching donode namgen” ine angade chanchia.” Unon rangsan Pugh aganchakskaaha. “somo i sokon an’ching dolongko gabatna mangen” Iako knarion Nichols Roy uni chanchianiko dingtangatna nangaha. Chigitam-ni atamo mingbana donatgipa Committee-ni manderang R.S. Lyngdoh-ko ku’cholsan namniktokaha ine Conference-o report ko on’ahaon conference-ni manderang namnike jak songe rachakaha. Indakesa R.S. Lyngdoh, Meghalaya Autonomous State-ni Legislative Assembly-o Speaker-na ku’cholsan seokako manaha. Uni jamano ku’cholsan Grohonsing A. Marakko Deputy Speaker-na seokaha. Unon Khasi Hills-ni APHLC dolni apsan apsan sason ka’ani bakko manpana nanga ingipao D.D. Pugh-koba Minister of State dak’e ra’napaha.

15 - GIPA JA’ PANG KATTA

MEGHALAYA CHUGIMIK STATE ONG’AHA

Jensalo Meghalaya 1972 bilsini January 20 aro-21-ni waljatchio chugimik State ong’ahaon, Capt. Sangma Chief Ministerni kamko, January 20-ni walni 11:50 bajio wataha (resigned). Kamko watani minute 10-ni jamano Capt. Sangma 12 baji waljatchio apsan uni seokgimin Minister-rang baksa Chief Minister ongtaina gita ku’mikchetaniko daktaiaha. Uni joljol apsan somoio R.S. Lyngdoh-ko Speaker kamma kumikchetani kamkoba chusokataha.

1972 bilsio Meghalaya Legislative Assembly-na election ong’ani jamano, His Excellency, the Governor of Meghalaya Captain Sangmako ia gital Sorkariko dilaichina okamaha. Ua antang baksa dongenggipa Minister-rangko saksa gitalko ra’dapana are uanbaibai donpilitaikuaha. Je Grohonsing A. Marak jean Deputy Speaker ong’achim uko Minister of State dakaha. R.S. Lyngdoh-koba Speaker-ni kamon donpilitaiaha aro Deputy Speaker-na Singjan D. Sangma-ko donsokaha.

1972 BILSIO MEGHALAYA LEGISLATIVE ASSEMBLY- ! NA SKANGGIPA ELECTION.

1972 bilsini January 21-gipa salo Meghalaya chu’gimikgipa Indiani gesa State (Full-fledged State) ong’aha. Meghalaya State gimikko ge 60 Constituency-rang dake soalaha. Meghalaya Legislative Assembly-na election jagnini jamano February jao ong’aha. Garo Hills-na ge 24 on’aha. Ge 24 oniko ge 20-ko Schedule Tribes-na reserved seat a’kangaha. Election ong’na skang biaprangko APHLC aro Congress-ni gispeo meligrike

sualgrikaha. APHLC-na ge 18 aro Congress-na ge 6 constituency-rangko sualgrikaha.

Lekka puonna mangipa Garo Hills-o sak 1,480,28 dongachim, unoni me'chikrang bangbatachim. Ritchaprako sak 36.2 manderang vote-ko on'aha. Ge 18 APHLC-na tikgipa constituency-rango chakatgiparangoni ge 3 ode susagipa gri MLA ong'na manaha. Ge 15 oni gesakode independent candidate manangskaha. Congress-ba ge 6 oni gesakode independent candidate man'angaha.

Sak 34 independent candidate-rangoni sak 16-de uamangni security deposit ka'gipa tangkako man'piljaha. APHLC ritchaprako sak 39.4 per cent vote-rangko aro Congress ritchaprako 18.8 percent vote-rangko man'aha. Indiba iako indake hisapgipao APHLC-ni sakgitam leka puona gri MLA mangiparangkode hisapjaha ongjaode APHLC-ni percentage batkugenchim. Congress-ni candidate Monindro Rava 2,801 vote-rangko manachi bangbate mangipa ine donako manahaoba indiba banggija vote-rangchisa sakgipinko am'aha. Congress-ni candidate William Cecil R. Marak 2,550 vote-rangko man'e 1,769 vote-rangchi cheaha. Saksa independent candidate Henry R. Marak king 63 vote-rangkosa manaiaha.

Iarang pilak ni gisepo aiao inmanbatgipa Brownson W. Momin jean gegni MLA constituency-rango chakatan baksa apsan somoin Parliament-ni member-naba chakataha, indiba damgnion amchepchepako manaha. Skanggipa Garo Hills District-ni 2nd Tura Parliamentary Constituency-o APHLC-ni candidate Karnesh R. Marak chegipa ongaha. uan A'chikrangni gisepo Indian Parliament-ni M.P. ong'chenggipa ongaha.

MEGHALAYA STATE-NI SKANGGIPA GENERAL ELECTION 1972 BILSIO ONG'AHA ARO UNO CHEGIPARANGKO MESOKATENGA.

1. Md. Akraman Zaman, Congress R. (2) Brojendro Sangma APHLC, (3) Choronsing Sangma APHLC, (4) Elwin R. Sangma APHLC, 5. Grohonsing A. Marak, APHLC (6) Ira R. Marak APHLC 7. Jagabandu Barman, Congress R. (8) Jenkman Marak APHLC (9) Manindro Rava, Congress R. (10) Madison A. Sangma, APHLC, 11. Nimos J. Sangma, APHLC, (12) Miss Percilya R. Marak, APHLC, 13. Plansing K. Marak, APHLC 14. Plender G. Momin, Independent, 15. Pritington Sangma, APHLC 16. Reidson Ch. Momin, APHLC, 17. Samaredro Sangma, APHLC, (18) Salseng Ch. Marak, APHLC, 19. Sandford K. Marak, APHLC, (20) Singjan D. Sangma, Congress-R, 21. Sibendro Nath Koch,

Congress-R, (22) Samsul Hague-Independent, 23. Capt. Williamson A. Sangma, APHLC, (24) William Cecil Marak Congress-R.

1972 bilsioni intal G.G. Swell, Lok Sabha-ni Deputy Speaker, APHLC-ni kosako banga matnanganirangko dakengachim. Bilsni gnina kingking Congress-ni aro HSPDP-ni dilgiparang baksa melie kamko ningioljol ka'engachim. 1974 bilsini sinkareni Assembly tom'ani ong'on adita MLA-rangko salbakna mannasiahachim. Hoover Hynnietu, M.N. Majaw aro sakgipinrang namen Capt. Sangma Ministry-ko be'atna kamko ka'beaha. Iarangko uie Capt. Sangma adita gital Minister-rangko ra'dapna dra'atoko man'aha. Ua R.S. Lyngdoh, Hon'ble Speaker-na Cabinet Minister-ni kamko changgitamna kingking on'ahachim, indiba ua tongkandi bilsio ra'chakodenitoani ong'jawa ine jechakaha. 1975 bilsini February jao Capt. Sangma, D.D. Pugh aro Grohonsing A. Marakko Cabinet Minister-ona ra'doc, P.R. Kyndiah-koba Cabinet minister dakaha. Aro unbaksa sakgitam gitalrangko P.G. Marbaniang, B.B. Salam aro Salseng C. Marak uamangko Minister of State dakaha.

Indake aganani gnang, maina pilak bangbata minister-rangan skia mangiparang ong'achim. Uamang sasonni kamrangni biding-o namen uibegiparang ong'achim. Uamang pilakan majangchi gadangni nokdangni manderang ongtokachim. Uamang pilakan namchachagipa bilsini manderang ong'engachim. Uamang sasonni niamni ja'pangrangko uigiparang ong'achim. Ia skanggipa Capt. Sangmani Ministry-an namen tom'tomgipa, antangmangni mandapani gimin chanchigigipa, gital State Meghalaya-ko rikna krenggipa Ministry ongchongmotaha. 1972-ni General Election-ni jamano Songsak (ST) constituency-o APHLC Party-o chakate mangipa Elwin R. Sangma-ni kosako Gauhati High Court-o HSPDP-ni candidate Projington Momin election petition-ko on'aha. Ua dame balot paper-ko tole sakgipin-ni noksakosa mesokaha ine Chugipa Gauhati Adalat-o mamla ka'aha. Iano sandie bichal ka'gipa Hon'ble High Court, Elwin Sangma dosiko dakha aro uan bilsni 6na election-o mikkangchi chakataina manjawa ine raiko on'aha. Ia Gauhati High Court-ni kosako Suprem Court-o apil kataion apilko ra'chakjaha.

Jadokni jamano niam gita Songsak (ST) Constituency-na by-election-ko ong'ataha. Ia by-election-o APHLC-ni Mrs. Mariam D. Shira che'aha. Indake 1972-ni General Election-o mangiparangko Party gita mesokenga.

APHLC-sak 32 MLA ong'aha. congress ak 9, HSPDP sak 8, aro independent-rang sak 11. Jamano sak 1 congress aro sak 6 independent-

rang APHLC Party-o napaha. uandake ua chango bonkame Party-ni gita donode APHLC sak 39, Congress 11, HSPDP sak 8 aro sakgni independent MLA-rang ong'achim.

16 - GIPA JA*PANG KATTA

GARO HILLS-KO NIGOPE RIMING RIMANG NIKATANI

Indiani a'song dal'ani bakdokni baksade a'brirangan ong'achim. Garo Hills-ba uni bakni tillongsa ong'a. Million sotbonga manderang abrini state-rango donggiparangchim aro Indiani sak ritchaprako sak 11 de uamangan ong'achim.

Tangsekgilgil nikgipa Garo Hills-ni a'brirango gamchatgipabol wa'arang, bolam bolterang, mesu samjakrang aro ta'ma ta'durangan gapachim. mandeni jatrangni ka'srokani chugipa a'brirangosa ong'a. Haida gisikni skaniko nikna sikanichi, uamang an'tangtangko chugipa a'kimbri-rangni kosako okkaata. Chengoni intalan a'brirang namen mandena dakchakani ong'a. Uo donggipa balwaba mojimjegipa bolni bijakrag, ka'srisri jokonenggipa a'brini chiring-chibimarang, chio donggipa na'tok na'batrang, a'ao malgipa daldalgipa matburunrang aro sako bilgipa do'drang, A'chik a'songko jasengata urang.

Daoba mitamkode nikkuenga, British-ni salrangode Garo Hills-ni chu'gipa a'brirango alda nokrangko namnambee rike don'a. Jedakode dingkareni somoio Saheb-rang aro dal'dalgipa sorkario kam ka'giparang salsa ba salgni uamangni jik dedrangko rime nengtakerongachim. Uandakgipa Speram Bandalong dongani gimin ua salrang Sorkarini dalgipa manderangba songremitingo uarango walturongachim. Jekai Tura Peak, Arbella Peak, Cheran Alda, Abrong Alda, Songsak Alda, Simsangiri Alda aro indake gipinrang.

Chengo Mogul-rangni somoio mingsinggipa rani Nur Jehan Kashmir-ni Srinagar songjinmao Salimar aro Nishat Gardenrangko nitoriri dake nitobegipa nokrangko rike ku'sian gapgipa rangsperam aldarang dak'achim. Garo Hills-o chugipa daldalgipa chidare-rang dong'a, uaranga Mokma Dare, Renang Dare, Rongbang Dare aro gipinrang. An'ching kna'a aro saksu A'chik dilgiparangde nikeaba. Uan Italy-ni Sicyli aro Carribean-ni nitogipa sagal chichangrang. Ua a'songrango mamungba a'ningo ba a'sako gamchata mingnama bosturang dongja indiba songregiparangna rona, cha'na ringna aro kusi ong'na namen namachim ina. Indiba ua sagal chichangrangni ong'telaigipa biaprangman'e

chagipa aro daldalgipa songregipa agilsakni manderangko mikbokatachim. Uandake nitogipa mingsinggipa A'chik song Garo Hills-oba dong'achim. Songregipa salaram-oni rebaode Badakka songni kosako lidek chibimani Na'ka Chikong aro Abed Nagil kaako nikgen-Aiao namen ansengbea, boneko rongtale kasroke sena biap dongjawachim. A'chik a'songni Salgipengo A'chik-rangni mingsing minggamgipa, memangni a'song Balpakram dongachim. Jensalo Meghalaya gital sorkari ong'ahaon uko 'Balpakram, the National Wild Life Sanctuary' dakaha aro uko Indiani Prime Minister, Rajiv Gandhi 1987 bilsini, December-ni 7-gipa salo nokdonggani roongko songdoaha. "Ia biapko Isolni ong'ataniara aiao inmanpilani ong'a. "ine ua rangspee aganaha. Ia Balpakram National Park-ni gimin saksa git ringna changbegipa indake ningtugipa aro sulchi ring'aha.

Git.

1. Dong'a a'brini a'songosa,
Mingsinga biaprang,
Nikwatate a'sak pilsao
Chaktoja ka'suang suang;
Haida pante songreode
Salaram mikkange,
Batsotanggen-ne Bugi-Dareng
Aro Simsang chiko.

RINGTAITAIANI :-

- Aiao an'senga !
Tapsriri chibiman' jokangengo,
Aiao inmanpila sokahaode
Balpakram abrio,
Simildingding, gitchak rimit
Dik'eni balao.
2. Chanchimana Balpakramo
Memangni a'songkon,
Dimrim dimrim, Borot borot
Boldimmi mojimaos,
Man'a nikna chasongnaba
Chianggal Mebit-ko,
Dongengkua mingsinggipa
Dikki-ni jallangko.

3. Manjane uno mikchi rakna
 Kusichin pipripe,
 Gualmana dikdikade a'songe
 Chanchie,
 Mitil mitil agalgrimo
 Matini ranato,
 Andildile gitchak prangprang
 Matchok-ni gak'ato.
4. Gisik ra'en ka'oksia
 Atam sal ka'sinao,
 Walmadrangna tusinapja
 Grongtaina jumango,
 Sogin sa'ram mesal cha'ram
 Miteni Ronggopo,
 Ansengbata pile danang
 Ganchiko rikramo.
5. Dongja dongja tosusna
 Balpakram gitade,
 Manjane na'a gualnade
 Changsa nikahaode,
 Chanchiate gisikchide
 Sian a'sak pilsao,
 Songdongtoken dipjro dipjro
 Memangni bimango.

Ua gitni ningtubegipa aro suubegipa katta aro sulni kubisringrang chanchibewalgipa A'chik manderangna kusian gape kasindikdik been gisiko chipgen.

Songregiparang Balpakram Heliport-oni salgipengchiko anpile niaton Bangladesh a'songgipinko an'sengriri boksosodimdim nikatgen song nokko.

Songregiparang unoni re'bae songsak Agalni sepango donggipa dams dalgipa chibolko nikgen. Uan indake aganani chengo 1897 bilsini bijatchio banggriok June jani 12-gipa salo-ua dalgipa banggriao kilo-metre-gnina batpile abri gipue dalgipa aro tugipa lake ba chibolko ong'ataha. Ia biap namen namgipa aro nitogipa ongani gimin, jensalo

Grohonsing A. Marak, Meghalaya A'dok-ni Forest Minister ongmitingo, chibolko niwate tesa dalgipa aro namgipa nengtakram nokko rike donaha. Aroba hajalni hajal rokomanti natokrangko ua chibolo bilsianti watachim. Aroba chibolo ring choe rona gita ring bolgniko rabae done a'bachengdilaha.

Songregiparang Balpakram-oni re'bae Indiao mingsinggipa SIJU CAVE ba Siju Rongkol, ian dalgipa aro ro'gipa rongkol onga. Kolkumango hajalni hajal daldalgipa dobakrang walsal bilwengwate nitoata aro ka'srokatachim. Songregiparang wa'alni bilcham-ko ra'e ba tenggipa lamp-rangko ra'e nape niode kusi onga aro ansengbeachim. Ia rongkolni nitoaniko namedake sena biap ba adam leka kitap kingsanode chakjawchim.

Songregiparang uanoni Turaona joljol re'baode ramao nitobegipa Rongbang dare-ko Simsang chibimaona a'bri chuaoni boksogimgim dake chidare-ko nike chanchibewalgipa mandena kusi ongbeani ong'a.

Turaona sokeon songregipa jajrengani dongjaha, maina waltu saldongna banga Tourist Nokrang, PWD aro gipin Govt. Departmentrangni namgipa I.B. nokrang donga. Una agreba Govt. ni Circuit nokba donga. Tura-oni je biapchiba re'na tourist garirang bangchim. Ruutgijan Jengjal Air Port re'bana re'angna chol ongnok. Bilsini gisepo A'chikrangni chengoni manibaenggipa 'WANGALA'-ko bilsio changprak A'chik a'songni bijatchio Tura-ni sepango dakrognachim. Asananggri songo October aro November-ni gipseo ong'atranga. Hajalni Hajal manderang mamungba jat aro torom basegija salgni ba salgitamna chrok mesae, ringe cha'e kusi ongronga. Ianona banga changon gipin a'songni songregiparang-Foreign Tourist-re'bae kusi ongrongachim. Iarangko A'chikrang parakatani sal sokaha jedakode A'chikrangni janggi tangani gadang tangdogen.

17 - GIPA JA' PANG KATTA

MEGHALAYA STATE-KO MAN'MANO

1972 bilsina skang Garo Hills Assam-ni ningochim aro sason ka'ram biap Tura ong'achim. Garo Hills-ni apala 8000 sq. kms. ong'a aro 1991-ni (Sen) census gita mande jela 6,66,818 ong'a. Tarake manderangna devleopment-ko ra'bana gita sasonni bilrangko manderangni sepangona ra'angaha. Indakesa Garo Hills-ko district gegitam dake sualaha.

1. **East Garo Hills District aro**
2. West Garo Hills district ia gegniko 1976 bilsio district dakaha. uarangni skotong songjinmara, East-ni Williamnagar aro West-ni Tura. Ia Williamnagar-ni gimin indake talatna ska. Chongmotan chengoba daoba daldalgipa rajarang, President, Prime Minister aro uandake Cheif Ministerrangni bimungchi uamangni tangengmitingomangba, uamangni bimungchi, sorok, rama jallang, songjinma, Air port, jahas ka'ram, club nok, school, college aro University indakgiparangko mingachim. Ua gita apsan Meghalaya-ko APHLC Government sason ka'engmitingo Capt. Williamson Sangma-ko mikkangchi gisik ra'ani ong'china gita, 'Williamnagar' ba William Zilla ba songjinma ine donaha.
3. South Garo Hills District-ko 1992 bilsini June jani 18 tariko songaha aro uni skotong songjinma BAGHMARA ong'a.

GARO HILLS-KO RIKANI

Daode a'gilsak gimikon a'songko rikna ba sason ka'na gita kragipa, senggipa, skia mangipa aro namgipa manderangko election-ko ong'ate seokaniko daka. Indake Garo Hills-ko rikna seokako mangipa MLA-rangko British-ni chasongoni intal sulsul A'chik MLA-rangko 2001 (New Millennium) kingking mesokatenga.

GARO HILLS-ONI

A'CHIK MLA-RANG BILSI 1922-2001 A.D. ONA

1922 bilsio Tura-ni Janggin A. Sangma-Laskar-ko Assam Provincial Legislative Council-ona MLC-na British Government seokaha. Uan A'chikrangni gisepo skanggipa MLC ong'gipa mandechim.

British-ni chasongo Garo Hills-ko Constituency gegni dake Assam Province-ni MLA-na Nokmarangchi loka puone seokako mangipa MLA-rang.

1. Benjamin Ch. Momin,
2. Jobang D. Marak,
3. Mody K. Marak,
4. Moniram R. Marak.

India Jakgitel-ko manmano chugimik Assam State (Undived Assam) (1952-1967)-ona MLA ong'giparang.

1952 bilsio Assam Assembly-na Election.

1. Emerson Ch. Momin, MLA.
2. Aaron N. Sangma, MLA.
3. Herrison W. Momin, MLA.
4. Emonsing M. Sangma, MLA.

1957 bilsio Assam Assembly-na Election.

1. Capt. Williamson A. Sangma, MLA.
2. Mody K Marak, MLA.
3. Herrison W. Momin, MLA.
4. Emerson Ch. Momin, MLA.

1962 bilsio Assam Assembly-na Election.

1. Emerson Ch. Momin, MLA.
2. Capt. Williamson A. Sangma, MLA.
3. Emonsing M. Sangma, MLA.
4. Nallindro N. Sangma, MLA.

1967 bilsio Assam Assembly-na Election

1. Capt. Williamson A. Sangma, MLA.
2. Mody K. Marak, MLA.
3. Brownson W. Momin, MLA.
4. Grohonsing A. Marak, MLA.

SKANGGIPA MEGHALAYA LEGISLATIVE ASSEMBLY-NI GENERAL ELECTION

1972 bilsio ong'aha. Uni MLA-rangko jak 100-gipao mesokaha. MEGHALAYA-NI Nigigipa General Election 1978 bilsio ong'aha.

1. Akraman Zaman, MLA.
2. Albinston M. Sangma, MLA.
3. Alfren R. Marak, MLA.
4. Beninstend G. Momin, MLA.
5. Armison Ch. Marak, MLA.
6. Badreswar Koch, MLA.

7. Brownson W. Momin, MLA.
8. Crunden S. Sangma, MLA.
9. Girash Marak, MLA.
10. Grohonsing A. Marak, MLA.
11. Jackman Ch. Marak, MLA.
12. Jenden Ch. Marak, MLA.
13. Jogendra Nath Pantha, MLA.
14. Manick Ch. Das, MLA.
15. Mekenson K. Sangma, MLA.
16. Mariam D. Shira, MLA.
18. Mozibur Rahman, MLA.
19. Plender G. Momin, MLA.
20. Prittington Sangma, MLA.
21. Salseng Marak, MLA.
22. Singjan Sangma, MLA.
23. Mukul Das, MLA.
24. Capt. Williamson A. Sangma, MLA.

MEGHALAYA-NI GITAMGIPA GENERAL ELECTION 1983 BILSIO ONG'AHA

Ua Election-o chakate MLA onggiparangko mesokatenga.

1. Albinston M. Sangma, MLA.
2. Atul Ch. Marak, MLA.
3. Beninstend G. Momin, MLA.
4. Bdreswar Koch, MLA.
5. Chamberlyn B. Marak, MLA.
6. Crunden S. Sangma, MLA.
7. Clifford R. Marak, MLA.
8. Elwin R. Sangma, MLA.
9. Ira R. Marak, MLA.
10. K.R. Bhowmick, MLA.
11. K.R. Khan, MLA.
12. Mekenson K. Sangma, MLA.
13. Manindra Rabha, MLA.
14. Nihimson R. Sangma, MLA.
15. Lokindor Hajong, MLA.
16. Norwin B. Sangma, MLA.
17. Prittington J. Sangma, MLA.
18. Pipinson G. Momin, MLA.

19. Parimal Rabha, MLA.
20. Roster M. Sangma, MLA.
21. Salseng C. Marak, MLA.
22. Sandford K. Marak, MLA.
23. William Cecil R. Marak, MLA.
24. Capt. W.A. Sangma, MLA.

MEGHALAYA-NI BRIGIPA GENERAL ELECTION 1988 BILSIO ONG'AHA

Ua Election-o Chakate MLA ONG'GIPARANGKO KAMAO
MESOKATENGA.

1. Atul Ch. Marak, MLA.
2. Armison Ch. Marak, MLA.
3. Beninstend G. Momin, MLA.
4. Clifford R. Marak, MLA.
5. Chamberlin B. Marak, MLA.
6. Chamberlin R. Marak, MLA.
7. Chesterfield W. Marak, MLA.
8. Crudnen S. Sangma, MLA.
9. Dabal Barman, MLA.
10. Luderberg Ch. Momin, MLA.
11. Monindro A'gitok, MLA.
12. Mount Batten K. Sangma, MLA.
13. Mariam D. Shira, MLA.
14. Norwin B. Sangma, MLA.
15. Parimal Rabha, MLA.
16. Projendro D. Sangma, MLA.
17. Nimarson Ch. Momin, MLA.
18. Salseng C. Marak, MLA.
19. Purno A. Sangma, MLA.
20. Gopin Boro, MLA.
21. Plender G. Momin, MLA.
22. Serjee M. Sangma, MLA.
23. Capt. W.A. Sangma, MLA.
24. Lehinson M. Sangma, MLA.

**MEGHALAYA LEGISLATIVE ASSEMBLY-NI
BONGAGIPA GENERAM ELECTION 1993 BILSIO
ONG'AHA. UNO CHAKATE MLA ONGGIPARANGKO
MESOKATENGA.**

1. Salseng C. Marak, Chief Minister.
2. Lotsing A. Sangma, Minister.
3. Chamberlin B. Marak, Minister,
4. Joylance G. Momin, Minister,
5. Masonsing M. Sangma, Minister.
6. Atul Ch. Marak, Minister,
7. Sujit Sangma, Minister,
8. Gopinath K. Sangma, Minister of State.
9. Archibol A. Sangma, Minister of State
10. Admirald K. Sangma, MLA.
11. Adolf Lu Hitler R. Marak, MLA.
12. Augustine D. Marak, MLA.
13. Bakstar K. Sangma. MLA.
14. Brening A. Sangma, MLA.
15. Elstone D. Marak, MLA.
16. Frankenstein W. Momin, MLA.
17. Lokindor Hajong, MLA.
18. Manirul Islam Sarkar, MLA.
19. Metrona R. Marak, MLA.
20. Dr. Mukul Sangma, MLA.
21. Projen D. Sangma, MLA.
22. Sayeeddula Nongrum, MLA.
23. Tonsing Marak, MLA.
24. Manindra Rabha, MLA.

**MEGHALAYA ASSEMBLY-NA CHANGDOKGIPA
GENERAL ELECTION
1998 BILSIO ONG'AHA. UNO CHAKATE, MANGIPA
MLA-RANGKO KAMAO MESOKATENGA.**

1. Nimarson Momin, MLA.
2. Cyprian R. Sangma, MLA.
3. Abutaher Mondol, MLA.
4. Augustine D. Marak, MLA.
5. Clifford R. Marak, MLA.
6. Lotsing A. Sangma, MLA.

7. A.L. Hitler R. Marak, MLA.
8. Monindra Rava, MLA.
9. A.K. Sangma, MLA.
10. Abdul Saleh, MLA.
11. E.D. Marak, MLA.
12. Kulert C. Momin, MLA.
13. Brening A. Sangma, MLA.
14. Beckstar K. Sangma, MLA.
15. Methrona R. Marak, MLA
16. C.B. Marak, MLA.
17. Sujit K. Sangma, MLA.
18. F.W. Momin, MLA.
19. Tonsing N. Marak, MLA.
20. K.C. Boro, MLA.
21. Dr. Mukul Sangma, MLA.
22. S.C. Marak, MLA.
23. Ms. Debora C. Marak, MLA.
24. N. Simchang, MLA.

A'CHIKRANGNI GISEPO AMERICACHI REANGE PORAI CHENGGIPARANG.

1. 1882 bilsio Garo Hills-ona re'bagipa American Baptist Christian Missionary-rang Mr. Philips aro Mr. Mason, saksa A'chik pante Thangkan Sangma-ko America-chi poraichina gita uamangni koroschi rimangaha. Thangkan America-o 1882 bilsio 1884 bilsiona namedake poraie antangko rimanggipa Mason baksa TURA-ona re'bapilaha. Tura-o ua bilsioni Mission school-ni Head Master-ni kamko ka'aha. School-ko wate ua torom-ko aganprakgipa Procharok-ni kamko kaskaha.

Thangkan Sangma-ko a'songtangosan mingsingaijaha indiba Indiani apalchiba mingsingaha. Maina ua North East Indiani Christian dilgiparangni pal A'gilsak gimikni Christian-rangni tom'ani 'World's Mission Christian Conference' 1910 bilsio Edinburgh songjinmao dalgipa tom'anio dongpaha. Indake ua Indian Christian dilgiparangni gisepoba mingsingako man'aha.

2. 1891 bilsioaba Mr.Philips sakgipin pante Modhunath G. Momin-ko America-chi poraiatna rimangtaiaha aro ua America-o 1894 bilsiona poraie Turaona re'bapilaha.

3. Uni jamano 1910 bilsio Walter C. Mason Bosin G. Momin-ko America-chi poraiatna rimangtaiaha. Bosin America-ni Ohio songjinmani

Granville-o 1914 bilsiona poraie re'bapilaha. Sak 4 ua salrango America-chi poraina re'angggiparangoni saksa Jobang D. Marak 1905 bilsio antangni koroschi America-ona re'ange 1911 bilsiona kingking bilsio 7-na Denison University-o poraie rebapilaha. A'songtang Tura-ona re'bapilon uko Assam Government Garo Hills-ni School-rangni sub-Inspector-ni kamko on'soaha aro ua adita bilsina ua kamko ka'aha. (ref. Garo Jungle Book by William Carey-page 246)

A'CHIKRANGNI GISEPO SKANGGIPARANG

1. Rev. Omed aro Rev. Ramke uamang sakgni A'chikrangni gisepeo Dr. Miles Brownson, saksa Kristian Missionary-ni jakchi Gauhati-ni Sarai Ghat-o Songdu chiamao, February 8, 1863 bilsio napole Kristian ong'chengaha.
2. Rev. Thangkan Sangma A'chikrangni gisepo America-chi poraina 1882 bilsio re'angchengaha.
3. Rev. Gilbert K. Marak, A'chikrangni gisepo toromni bidingo kam ka'ani aro sea jotanina Serampur Theological college una D.D. Doctor of Divinity-ko toromni dalgipa kamna onaniko man'chengaha.
4. Jemison S. Sangma, song Nishangram, A'chikrangni gisepo Calcutta University-ni Matriculation Examination-ko pass ka'chenggipa. Uan Rev. Gongman Momin-ni depantechim. *1912 Bilsio ong'a.*
5. Lieutenant Karnesh R. Marak aro Wilson K. Marak sakgni A'chikrangni gisepo B.A.(Bachelor of Art)-ko 1930 bilsio pass ka'chengaha.
6. Howard Denison W. Momin, America-chi re'ange poraichenggiparangoni saksa Jobang D. Marakni depante, A'chikrangni gisepo Calcutta University-ni M.A. (Master of Arts)-ko pass ka'chenggipa.
7. Janggin A. Sangma Laskar, uan Turani, A'chikrangni gisepo British-ni sason ka'mitingo M.B.E. chongmotan Member of British Empire ingipa title ba upadhi onako manchenggipa.
8. Lieutenant Karnesh R. Marak, A'chikrangni gisepo M.P. (member of Parliament) ongchenggipa.
9. Emonsing M. Sangma, A'chikrangni gisepo Rajya Sabha-ni M.P. Assam-ni chasongo manchenggipa.
10. Capt. Williamson A. Sangma, A'chikrangni gisepo Meghalaya

State-ni Chief Minister aro State-ni Governor ong'chenggipa. Aroba United Nation-ni General Conference-ona Indiani Prime Minister, Mrs.Indira Gandhini watatako mangipa mande.

11. Goering Daring Sangma, Bajengdoba Moamari songnimande Gauhati University-ni MSC-ko pass ka'chenggipa.

12. Chamberlin B. Marak, Bajengdoba-ni Bakenang songo atchigipa Gauhati University-ni M.A. English Honours-ko pass ka'chenggipa.

13. Henadini D. Shira, A'chik me'chikrangni gispeo M.A.-ko Gauhati University-o pass ka'chenggipa. Uan Nishangram Boksial songni ong'achim.

14. Godwin W. Momin, uan Jobang D. Marak-ni depante, A'chikrangni gisepo Engineering Graduate ong'chenggipa. Aro ua jamano Meghalaya-ni Chief Engineer ong'chengaha.

15. Nirmola D. Areng, uan A'chik me'chikrangni gisepo Lady Doctor ong'chengaha. uan America-chi poraina reangchenggipa A'chikrangni saksa Modhunath G. Momin-ni demechik ong'a.

16. Milton S. Sangma, uan saksa leka pora manbegipa A'chik mande onga. Ua Akalu Momin, Master-ni depante, Santipur songo atchipa onga Ua A'chikrangni gisepo M.A.-ko pass ka'mane uni gamchatgipa leka seanina- Thesis-PH.D. (Doctor of Philosphy)-ko 1967 bilsio man'chengaha. Aroba ua North Eastern Hills University-ni Pro-Vice-Chancellor, Tura Campus ong'chengaha.

17. Purno A. Sangma, Garo Hills-ni Chapahati songo atchiaha. Ua Meghalaya-ni gnigipa M.P. (Lok Sabha), Govt. of Indiani Indira Gandhi Prime Minister-ni somoio skanggipa Indiani Tribal-rangni gisepo Central-ni Cabinet Minister aroba Lok Sabha-ni Hon'ble Speaker ongchenggipa onga.

18. I.K. Sangma, uan Goalpara District-ni Bakrapur songo atchiaha. Ua chue leka poraie M.A.-ko pass ka'aha. Uan A'chikrangni gisepo Central-o University Grand Commission-ni Secretary member ong'chengaha. Dao ua durama College-ni Principal ong'enga.

19. Ira R. Marak, Uan Garo Hills-ni salgipong Zarangpara songo atchia. A'chikrangni gispeo United Kingdom-ni Common Wealth Parliamentary Conference London songjinmani chelao, nitobegipa, aro ansengbegipa sagal chichang damsa I LOVE MAN minggipa songjinmao tomaniona, Govt. of Meghalaya-ni watatako manchenggipa onga.

20. Chamberlin R. Marak, Uan 1988 bilsio election ong'on vote-ko uni ripeng susagipa baksa apsan apsan ong'aiana, changgni changgitam chantaitaioaba apsan ongaiani gimin, Retuning Officer sakgnini bimungko lotery ba chiti kaloara Chemberlin R. Marak-ni bimung ong'kataha. Indake seokani ian agilsako gnigipa ong'e, uni bimungko' Guinness Book of World Record No. 2 ong'a ine A'chikrangni gisepo seaniko manchengaha.
21. Mariam D. Shira, uan A'chik me'chik-rangni gisepo skanggipa Meghalaya State-ni Cabinet Minister ong'chengaha.
22. Jangsan A. Sangma uan A'chikrangni gisepo skanggipa Gauhati High Court-o Judge ong'chengaha.
23. Asutosh M. Sangma, skanggipa A'chikrangni gisepo Indian Revenue Service (Allied Service), Government of India-ni Income Tax-ni Deputy Commissioner ong'chengaha. Uan Capt. Williamson A. Sangma-ni skanggipa chawari onga.
24. Justin R. Marak, uan skanggipa A'chikrangni gisepo India Government-ni saksa 'Accountant General' ong'chengaha.
25. Dewansing Rongmuty, uan Baghmara jolni mande nengbee kamka'e dontonggija poraie Gauhati Cotton college-o B.A. (Bachelor of Art) English Honours-ko pass ka'chenggipa.
26. Urmilla Ch. Momin, Turani mingsinggipa L.P. School teacher, Dhoronsing K. Sangma-ni demechik, skanggipa A'chik me'chikrangni gisepo Air India-ni Air Hostess ong'chengaha. Uandao Hongkong-ni Kaowlon City-o dongenga.
27. Utham K. Sangma, uan A'chikrangni gisepo Indian Administrative Service (IAS)ko manchengaha.
28. Devilla B. Marak, uan Tura-ni me'chik Meghalaya Governmentni A'chikrangni gisepo IAS-Indian Administrative Service nomination-ko manchenggipa aro me'chikrangni gisepo Deputy Commissioner ong'chengipa me'chik onga.
29. Dinang Sangma aro Livingston G. Momin, sakgni A'chikrangni gisepo Law Graduate-LLB pass ka'chenggiparang.
30. Heroine B. Sangma, uan A'chik me'chikrangni gisepo B.Sc. B.T. pass ka'chenggipa.
31. Brownson S. Sangma, A'chikrangni gisepo Additional Director

of Public Instruction - ADPI-Meghalaya sorkario ka'achim.

32. Politson R. Marak, uan A'chikrangni gisepo M.Ed. pass kachenggipa ong'a.
33. Sonaram R. Sangma, Uan A'chikrangni gisepo skanggipa Political leader ba dilgipa onge, A'chikrangna Songdu samsako British Raj-ni somoio jail patok dongpile dakgrikdile jaman chasongna ramako mesoke donangaha.
34. Skylance G. Momin, uan EX-Minister Jenden Ch. Marak-ni depante ong'a. Ua Police kamko ka'e skanggipa A'chikrangni gisepo IPS nomination-ko nianchengan baksa 1993 bilsio uni kakket kamko ka'anina DGP-ni certificate-ko mangipa aro Meghalayani Police Officer-rangni gisepo Indian Police Medal-ko man'chenggipa ong'aha.
35. A'chikrango Indian Engineering Pass ka'changgipa, Shri Omega R. Marak. ~~Son of Shri Roosevelt P. Marak.~~ *V. Takimagne*
36. A'chikrango skanggipa M.S. (Master of surgery) Gold Medalist. Dr. Petrov R. Marak. ~~Village Takimagne.~~ *Dr. Roosevelt P. Marak ni depante*
37. A'chikrango skanggipa M. Div. (Master of Divinity) Pastor Greaterburn R. Marak, Arai mile Baptist Church, Tura.
38. A'chik me'chikrango Master of Divinity-ko pass ka'chenggipa Ms Anse Wanne G. Momin, Shri Linder K. Marak-ni demechik Tura.
39. A'chikrang skanggipa Chief Conservator of Forest ongchenggipa, Tony Travert C. Marak, Tura, L. Swanson W. Momin-ni depante.
40. A'chik Me'chikrango M.Sc. pass ka'chenggipa, Devita G. Momin, Mr. Kulert Ch. Momin-ni jikgipa.
41. A'chikrango skanggipa Batchelor of Architecture, Shri Grover Cleveland R. Marak, Tura. *Computer*
42. A'chikrango Batchelor of Science-ko pass ka'chenggipa, Frida R. Marak, Tura.
43. A'chikrango skanggipa Mining Engineer-ko pass ka'chenggipa, Puron M. Sangma, Tura.

A'GILSAKNI SKANGGIPA DALGIPA DAKGRIKANI ARO A'CHIKRANGNI KAM KA'A.

Iani gimin chengon Reader-IV kitapo rongtalen poraimanaha. Indiba maikai A'chikrang a'gilsak gimikni gimanasiani kamrangoba dakchakaniko on'aha ine jaman chasongba uie ra'china ontisa iano janapgijan donna sikjaha. Oe Garo Hills-ara Indiani ningo aro Indiara British Sorkarini ningo ong'ani gimin, jensalo Europe-o British aro gipinrang dakgrikenganio, British-ni sipai kotokko dakchakna gita British Empire-ni rajani okamaniko man'e A'chikrangkoba dakgrikram a'bao kamko ka'na okamako man'aha. A'chik-rang Europe-ni France a'songo mongsongbate kamrangko ka'aha. Dakgrikram a'bao A'chikrang bang'en si'aha. Ua sigimin Garo Labour Corps-ni manderangko gisik rakamna manna gita, Turani songjatchio sorok rikamo gisik ra'na songdogimin ro'ongo uamangni bimungrangko see donaha. Aro uko da'alona kingking bilsianti July-ni 17 salo manikuenga. A'chikrang Europe-chi 1914 bilsio re'ange 1918 bilsiona ongnasipile kamrangko ka'e rebapilaha. Indake ia dalbegipa A'gilsakoba A'chikrangni bimung dongahanina A'chikrang sakanti rasong chana nanga.

A'GILSAKNI DALBATGIPA GNIGIPA DAKGRIKANO KAMKO KA'NA REANGGIPA A'CHIKRANG.

(SECOND WORLD WAR AND THE GARO LABOUR CORPS)

Skanggipa a'gilsak gimikni dalgipa dakgrikani bilsu 25-ni jamano A'gilsak gimikni Gnigipa dalgipa aro kenbegnigipa dakgrikani ong'taiaha. India British-ni nington dongkuengani gimin British aro Americani sipairangko dakchakna rajani okamako mantaiaha. A'chikrang chengonin dakchakna sigipa, kasachakgipa, bebegipa aro ka'donggipa bilakgipa ong'ani gimin, 'GARO LABOUR CORPS' ine bimungko ra'e Burmaona re'angaha. Hajalni hajal Garo Hills, Goalpara aro Kamrup district-rangoni A'chikrang re'angaha. A'chikrangko 1942, 1943 aro 1944 bilsirango, bilsiprako doldol dake sak 500,600 aro 1000 dake ra'angaha. Ia kitapko segipa antangba schoolo poraiako dontonge 1942 bilsini April-ni 4gipa salo reangaha. Da'alo uchi reanggipa A'chik-rang bangan dongjaha aro je tangkuenggiparangba budepa ong'tokengaha. Aro bilsu 20-ni jamanode uamangni goprangrang chisolko songdoe do'nako de'drang sudrangni gisik ra'ani salrang rebaengaha. Indiba dukni da'alona Second World War-ni Garo Labour Corps-ni sigipa A'chikrangkode 'Recruit Celebration' ine mania dongja aro manina nanggan ineba darangba chanchia dongkuja.

Burmao kam ka'mitingo japrako Garo Labour Corps-ni dormaha Rs. 22, anna 8 onga. Dakgrikram a'bao ong'ani gimin tangka bisil-kosa on'achim.

Garo Hills-ni, Dainadubi biaponi re'chakaton sipairanggita march-ka'esa jaku apsan ge'esa, godom ga'e Dudnaiona re'achim. Nishangram-ni drum, mosok aro begul sikna changgiparang doke dame re'dilachim aro Labour-rangba, Raja namgipako tangbangatbo uko chingni Isol' God save our gracious king, long live our noble king, God save the king ingipa gitko kasrok kasrok ring'e godom ga'e re'achim.

Gauhati-oni walsa salsa rail gario re'e Lekapaniona sokeon aro Stil Wel Gate-ko gabatna skang sakprakan injection biji sutokachim. Maina dingkare abachengani gimin saa rokrogi manna kenakon.

Naga Hills-ni Patkoi a'brirangona soke Garo Labour Corps antangtangna dongchakna gita jamdaprangko rikchengna nangaha. A'bachengode Robibar salrangode Nagarangni wate katanggipa a'bani nokrang Kristianrangde giljarangko ka'achim aro uamang-watangginin a'bani baring jalik indakarangkoba ak'e cha'achim. Antisani jamano chola kingprak aro Khasi happen ine ina ki'sang kotapa donggipako kingprak on'aha. Chana merong, dal alu, bolni ghee aro rasin, iarangko bangen on'achim. Chini cha-rangkoba ration on'achim. Jamanode sinkare abachengode kimilni blanket kingprak on'aha. Mikka wachio inge ba wine re'na gita tarpoulin gro ft 4 aro gipeng ft 2 dalako on'achim.

GARO LABOU CORPS-ni kamrang indake ong'achim. Labour-ni kam Camp ge'saoni Camp ge'saona sipairangni bosturangko olna nangachim. Bostaprako sel 30 bragimin merongko sakprako bosta prak, cha chini, alu dal, ghee tin, tarpoulin aro bara kombolrang.

Jensalo dakgrika bilobahaon Burmaoni katbagipa manderangko me'chik me'a bisa desa-rangko olna bana, jakkindilna aro ripena nangachim. Ramao mande siani manggisirangni kosakko gadape, soa sima minggija sal wal kamko ka'na Garo Labour Corps nangaha. Indake wal sal kam ka'ani gimin A'chik-rang saa dinga man'e ritchani ritcha A'chikrang Burma-o Impal-o aro Camp-rango siaha. 1945 2nd September salo bilsini dakgrika bonahaon Garo Labour Corps-ba dongjaha. Iandake A'chikrangba a'gilsak gimikni namgnina aro tomtomgnina kamrangko ka'ahani gimin uamangni bimungrang -Second World War-ni dalgipa sonani kitapo aro a'gilsakni History ba Itihaas-o dongahanina A'chik sakanti ku'si ong'an baksa rasong chana hai.

A'CHIKRANG INDIA-NI SALGRO SALARAM A'DOKRANGODE BANG BATGIPA TRIBAL JATSA ONG'A.

Oe, A'chikrang (The GAROS) Indiani Salgro Salaram State-rango Meghalaya-na agreba Assam, Nagalang aro Tripura-o bangen dong'a. Bilsio 10-na skang angni sandie mangiminko mesokatenga. A'chikrang West Bengal-ni Coch Behar, Falakata, Jalpaiguri aro Rongpur districtrangoba bangen donga. Anga antangan ua biaprangchina bilsio 10 ba bilsio 15-na skang dingtang kamrangna reanganio bebegipa sakkiko onna jajajaha. Indiaosan ongja A'chik-Bangladesh-oba bangbea ine knana darangba aiao inmanjawa. Mr. Ali Niwas, Asian Ethnological and Entropological Studentrangni 1978 bilsio New Delhi-o tom'anio indake aganaha, "The Garos aro living in Bangladesh more than one lakh but the Garos are not autochthon in Bangladesh". Ali Niwas uan Head of the Department of Bangla, Mymensing Agriculture University. Iarangko chimongani bilsio 10 batahani gimin 'the National Population Growth' rate gita bilsiprako 2.41 percent bariode mesokgimin onggo-na bate batkugen.

1. Bangladesh-o donggipa A'chikrang - - - - 1,00,000
2. Assam-ni Goalpara, Kamrup, Darang, Sibsagar aro Nowgong district-rango.- - - - - 90,000
3. Mikir Hills-Karbi Anglong-District - - - - 1,20,000
4. West Bengal-ni Falakata, Coach Behar, Jeldapara, -
Jalpaiguri aro Rongpur district-rango donggipa - 25,000
5. 1968 bilsio Hills State Movement somoio Tura APHLC Confer-
ence-o Mr Chakma-ni agana gita Tripurao aro Chin Hills aro
Chittagong Hills Track-jolo A'chikrang haida hajal 20-na agre
komijawa ina. - - - - - 20,000
6. North Bank (Assam) Bangpara, Bangalkata, Singgimari, aro
gipinrang. - - - - - 21,000
7. Dimapur-Nagaland-Nepalpati Assam etc. - - - 9,000

BONKAMGIPA KATTARANG (CONCLUSION)

Meghalaya State-ni sasonna skangba, Assam Sorkarini sasonna skangba aro British sorkarini sasonna skangba A'chikranga maikai antangtango sason ka'aha aditako a'bachengao talatna joton ka'aha. A'chikrang maikai sason-o aro songo noko salanti' janggi tanganio namroobaaha ukoba talatna joton ka'aha. Chonbegipa dolni manderang ong'oba maikai uamangni pilak chengoni pagitchamrangni dakbewalrangko ripingbaaha, ukoba talatna joton ka'aha.

British sorkariba Salgro salaram-ni a'brini manderangko Assam province baksa donggenma ba dingtang province-ko dakgenma tik ka'na manchipgija donangaha ine nika. India jakgitel ong'ani jamano District council-ko ong'atna mananian ragkipa jegrikani a'bakkuko ra'baaha. District Council dongaha omangba, A'chikrangni pilak chengoni dakbewal aro songsalni sasonrangde uanbaibai dongkuengachim.

District councilko dakanian Meghalaya State-ko ra'bana ga'chatgipa ga'timra ro'ong ong'ahachim. A'brini sorkarina krengmitingo, India Sorkariko sason ka'engkiparang chugimik miksonganiko masiningjani gimin, a'bachengo dingtang State dabianiko onna rak'en jechakachim. Indiba tikelanirang tom'tomgipa aro niam gita regipa kamrang ong'aniko nikejenan krenge tikelenga uan ong'a ine jamano uiahachim. Indake masimanosa India Sorkari a'brini manderangni da'bienggipa ge'sa State-ko onna ku'rachakaha. Assamese ku'sikni mangmangde APHLC Hill State-ko da'bijaha indiba uamangni ku'sikko, chabewal ringbewalko, jikkim de'baaniko, nokdang ba'ku manrikaniko, a chini nokgipa ong'aniko aro toromko ripingna sika ine Centralni dilgiparang ui'chongmotaha.

Ia dingtang State-na krenganio adita onronggijagipa kamrang ong'aha.

1. Ia ain ba niam gita dakanio mamungba dal'a a'sel ong'arang dongjaha.
2. Meghalaya State-ko manna krengmitingo janggi jama gal'a dongja.
3. A'brini sorkarina kremitingoarang gipin State-rangko gita on'na jechakanio, ra'ona ra'doa, Commission-ni jamano Commission, inquiry jamano inquiry dakgipa dongjachim.

4. British-ni somoion a'brini manderangko tom'dakate ge'sa State-ko dake on'na chanchiengmitingo, Nagarang Indiaoni ma'eke jakgitelna krengahachim indiba Indiani ningon ge'sa State-ko sa man'aiaha, Mezorangba apsankon krengaha, indiba Union Territory-kosan man'aiaha. Khasi aro Garo bilsil 18-na krenge chugimik State-ko man'aha. Indiba mamungba krengpagijagipa, tom'tom dongaigipa Arunachal Pradesh Union Territory ong'aha. Indiba jakgitel ong'na skang Garo Hills-de a'songko sason ka'ani bidingode illeng siksakgijagipa ong'achim.

5. Bilakgipa British-ni sason ka'mitingo A'chikrangni dakbewalrangko gima'atna joton ka'ani grichim.

6. 1922 bilsiona king king Assam Provincial Legislative Council-o Khasi-rangna agre Garo Hills-oni saksaba Member ong'gipa dongjachim.

7. 1937 bilsiona kingking Assam Legislative Assembly-o Garo Hills-on^o darangba MLA ong'gipa dongjachim.

8. British Inner Line Regulatio-ko 1872 bilsioni gipin a'brini district-rangko dakaha aro daonaba dongkuenga, indiba Garo Hills aro Khasi Hills districtrangode dongjachim.

9. A'brini manderangni churoro namrorobaanide, mongsongbate Kristian Mission-aryrangchisa ong'ahachim.

10. India jakgitel jensalo ong'aha unon a'brini manderang tarakbate jakgitele pilak-ni bidingo kamko ka'na man'ahachim.

* Meghalaya State-ko man'ani bilsil 6-ni gisepo 1970 bilsioni 1976 bilsiona je sorkariko rikaha aiao inmanpilachim, ua changni MLA-rang, Ministerrang, daldalgipa Sorkarini Officer-rang nangrime kamko ka'ani a'selsa bakbakan niksenggipa State ong'na a'bachengaha. Uni gimin salsao Garo Hills, a'brini a'dokrangni gisepo nitobegipa, kasrokbegipa, niksenggipa, an'senggipa aro tom'tomani chichang ong'china, chakat A'chik pante, metra krenge kamko ka'kuna hai. Isol A'chikrangna patiangkuchina. Amen.

District Library
West Khasi Hills District
Nongstoin